



週年默想第四冊

MG  
B976-1  
726  
2-4



3 1773 3647 0

# 週年默想

No 416

2000 4-37

**MEDITATIONES QUOTIDIANAE**

**IN TOTUM ANNUM**

Auctore: P. Vercruysse, S. J.

Translatoribus: P. Joanne-Baptista Hiu, 許 采 白

P. Andrea Tsiang, S. J. 蔣 邑 虛

—●—  
上  
海  
主  
教  
惠

准

一  
千  
九  
百  
三  
十  
七  
年

上  
海  
土  
山  
灣  
印  
書  
館  
第  
二  
版  
印



# 週年默想目錄第四冊

## 卷十 十月

初一日	聖母玫瑰瞻禮	一
初二日	護守天神瞻禮	四
初三日	愈十八年病婦	七
初四日	聖五傷方濟各	九
初五日	耶穌赴宴訓賓	一二
初六日	林樹不結實喻	一五
初七日	黨人恐嚇耶穌	一八
初八日	牧人尋亡羊喻	二〇
初九日	爲主從徒之所要	二三
初十日	聖母爲天主之母	二六
十一日	聖母爲衆人之母	二九

十二日	克己苦身之德	三一
十三日	申明克苦之要	三四
十四日	婦人獲銀錢喻	三七
十五日	聖女德肋撒童貞	四〇
十六日	聖女德肋撒之遺訓	四三
十七日	聖母至潔	四六
十八日	客不赴華筵之喻	四九
十九日	命莊僕罷業之喻	五一
二十日	訓人謹慎細行	五四
二十一日	蕩子離親蒙難	五七
二十二日	蕩子先後殊狀	六〇
二十三日	蕩子回心改悔	六二
二十四日	天主仁善先加於人	六五
二十五日	貧富善惡不同途	六八

卷十一 十一月

二十六日	惡富下墮餘訓……………	七一	初七日	三次預言受難……………	一〇六
二十七日	耶穌之和柔忠愛……………	七四	初八日	二徒求尊獲訓……………	一〇九
二十八日	募備經營葡萄林之喻……………	七七	初九日	日里各啟警人……………	一一一
二十九日	續思葡萄林之喻……………	八〇	初十日	撒格散財向化……………	一一四
三十日	心切救靈神火……………	八三	十一日	呼辣匝祿復活……………	一一七
三十一日	諸聖瞻禮前日……………	八五	十二日	國人議殺耶穌……………	一二〇
			十三日	耶穌退居厄弗稜城……………	一二二
初一日	諸聖瞻禮……………	八九	十四日	恒禱勿輟之諭……………	一二五
初二日	追思已亡……………	九二	十五日	瑪利亞以香液沃主首……………	一二八
初三日	恒憶死期之訓……………	九五	十六日	耶穌榮進都城……………	一三一
初四日	二人同禱異功……………	九七	十七日	耶穌望城涕泣……………	一三四
初五日	招富少年相從……………	一〇〇	十八日	都城罰樹警人……………	一三七
初六日	辣匝祿臥病死……………	一〇三	十九日	嘉貧癡異端……………	一三九
			二十日	圖戶殺林主之喻……………	一四二

二十一日	獻聖母於主堂	一四五
二十二日	聖母主保	一四七
二十三日	嚴飭異端諸弊	一五〇
二十四日	十童女迎親之喻	一五三
二十五日	預言審判之威嚴	一五六
二十六日	吾主與徒同席晚餐	一五九
二十七日	耶穌濯拭徒足	一六二
二十八日	耶穌濯足遺訓	一六五
二十九日	耶穌建立聖體	一六八
三十日	耶穌臨別遺訓	一七〇

## 卷十二 十二月

初一日	耶穌祝禱聖父	一七五
初二日	仰賴聖方濟各	一七八

初三日	聖方濟各瞻禮	一八一
初四日	事主豪雄之概	一八四
初五日	預備瞻禮之緣	一八七
初六日	畏避小罪	一八九
初七日	宜則效聖母之德	一九二
初八日	聖母無染原罪	一九五
初九日	萬物證有天主	一九八
初十日	天主本性美善	二〇一
十一日	主性至純無量	二〇四
十二日	天主全能全知全善	二〇六
十三日	天主至聖至美至愛	二〇九
十四日	天主之睿智仁慈公義	二一二
十五日	天主之浩大崇高	二一五
十六日	聖誕前九日敬禮之緣	二一八

十七日	誕前九日敬禮之情	二二一
十八日	敬禮神益之阻礙	二二三
十九日	天主降生之奧	二二六
二十日	天主聖母之福德	二二九
二十一日	天主降生之期	二三二
二十二日	人受救世諸恩	二三四
二十三日	耶穌聖嬰之德表	二三八
二十四日	耶穌聖誕前日	二四〇
二十五日	耶穌聖誕瞻禮	二四三
二十六日	聖斯德望瞻禮	二四六
二十七日	天神報信牧童	二四九
二十八日	牧童往詣白冷	二五二
二十九日	牧童宣傳主誕	二五五
三十日	虔誠事主之緣由	二五七

三十一日	三百六旬之終	二六〇
------	--------	-----

補遺

領聖體之預備	二六五
領聖體指要	二六八
恭領聖體	二七一
聖體之神效	二七三
聖體爲質	二七六
聖體爲諸奇異之標跡	二七九
月省條目	二八二
每日省察要式一	二八四
每日省察要式二	二八九

卷十 十月

月省之思

林樹不結實喻

見本卷初六日

首瞻禮六

敬聖心於聖體

見卷五第二十九題

初一日

首主日

聖母玫瑰瞻禮

月內聖母玫瑰與天主

母等瞻禮、默想題目用於本瞻禮日、其餘默想題目、

仍可依次續用、

定像

想見聖母顯現於聖多明我、授以玫瑰經。

特求

求主賜我聖寵、識玫瑰經之尊與益、而善誦之。

第一端

玫瑰經之來由

玫瑰經始於一千二百有餘年、時法蘭西

南境異端惡燄甚熾、劫奪焚燒、勢難撲滅。聖多明我奉命前往、勸化彼眾、講經論道外、日夜哀求聖母。聖母鑒其誠心、親自顯現、訓其如

何誦念玫瑰經，告其誨民同誦，將得救靈奇效。旣而果驗，異端歸正者十萬餘人，罪人遷改者不知其數。自此玫瑰經遂行於普世，幾爲家絃戶誦。後教化皇准定玫瑰會，頒多恩赦。至格肋孟德第十一位，定斯瞻禮，年年恭行於是月之首主日。原其瞻禮之意，一、固人信德。信主上智，眷顧聖教，及時賜人蒙惠之方。二、增人望德。望主因聖母而憐恤斯人，如聖伯爾納鐸曰：諸恩諸惠，天主欲吾人，皆因聖母而得。三、倍人熱心。欲人虔誦此經，以副聖教之望。當謝聖母，以此妙經賜人，并求寬恕我怠於誦念之非。定志虔誦玫瑰經。

第二段 玫瑰經之尊貴 欲識玫瑰經之尊貴，究其原始，視其經文，思其蘊義，自可恍然。玫瑰經爲聖母親自訓授，上已言之，共含聖母經一百五十遍，仿日課經聖咏一百五十篇。每十遍，先間以天主經。

一遍。思吾主在生行跡一端。合前後十五端。訓人不忘救世主之事蹟。而思想則效之。不但得妥救己靈。且能修成大德。爾曾日誦斯經乎。誦之果能依其義。而盡其宜乎。抑誦之不知心於何在。而諉於時地之不能盡誠致敬乎。如是不識玫瑰經之尊美。亦安望玫瑰經之神益哉。今當自知悔改。求賜爾免陷前失。并思用何善法。以助我虔誠誦念斯經。

第三端 玫瑰經之誦法 誦玫瑰經。欲虔心熱衷。不紛志於他事。殊覺爲難。蓋斯經雖尊妙。而誦之久。習之熟。每易流於疎忽。法之善者。莫如以每端事跡。歷歷懸想。如見之於圖畫。口禱時。可以神目注視。而加意留神。如是行之。心雖不存於經語。而神已遊於主前。而於祈禱之義。亦可無愧。蓋祈禱者。心神向主。陳所欲言也。若能習熟於斯。

則口誦與默禱之工，合而並行。將必覺許多神味，而獲許多神益。勉之哉。祝言

初二日 護守天神瞻禮

定像 想見多俾亞行路，辣法厄爾天神爲之伴侶。  
特求 求主賜我知護守天神之恩德，益深敬愛之心。

第一端 護守天神之尊位 經曰：天主諭令天神，護翼爾於諸路。聖

咏九十篇 天主命天神護衛吾人，爲人生榮幸之一端。憶斯天神，原係至靈無形之體，受造於主，肖似於主。其美麗神能，及其聰明迅速，皆出世人意想之外。其在天主前之品位，如在帝王前之公卿臺輔，榮貴異常。今其日夜爲我伴侶，作我師保，自始至終，須臾不離。主之愛人，何其厚也。我若誠信此理，則燕居獨處，必不敢少形放縱，旁若



無人。必思尊神在側，如見良朋，與之訴衷曲，談心緒，有憂求其慰，有疑求其析，有誘感求其助佑，有艱難困苦求其護恤安全。嘗聞前聖如加彌祿、方濟、加羅撒等，目覩護守天神，與之交遊，是亦其信德之誠，與敬禮之虔，所得之報效也。謝天主遣令天神護守，求天神恕我簡慢之失，自後勤於請求就教，并勉人亦愛敬不忘。

第二段 護守天神之恩德 天神奉天主之命護守我，而施我恩德，不可勝數。今畧舉其四：一、眷顧我身力，捍衛我生命，脫我於諸危險。二、佐理我靈魂之事，愈見殷勤，訓誨我愚，引進我德，佑啟善念，指破魔計，增我毅勇，與三仇交戰，有獲罪於主者，暗中懲戒。三、護守天神於我，宛如辣法厄爾於多俾亞，導我涉履世途，委曲周旋，無微不至。四、將護衛我於死候，助我善終。今我當感頌天神而則效者有三：一、

心志均平，絕無偏倚。無論知愚賢否，皆盡誠守護。二、清潔幽靜。凡塵囂世穢，無能薰染我分毫。三、意氣安和。不以所願不遂，人靈違德，而覺有擾亂。求主賜我盡心竭力，師法其德表。每誦天主天神領守我者云云，而倍深敬愛。

第三端 酬護守天神之法 聖伯爾納鐸訓我所以酬報護守天神者有三，曰恭敬，曰知恩，曰倚賴。恭敬者，因天神常與我偕。知恩者，感激其無數恩惠。倚賴者，以應其眷顧之勤。此爲我人之定分。惜人多不察，卽於是日瞻禮，亦鮮能留神細味。凡屬修士，宜依聖人之訓，一、盡我恭敬，思天神在旁，如見大賓，毫不敢失度愆儀。二、虔心隨其默禱，遵其訓誨，每日感謝其所施諸恩。三、倚賴其神能神力，憂疑中就正之，艱困時號求之。將生前死後，得其扶持撫慰。念向護守天神誦。

祝言

初三日 愈十八年病婦

定像 想見吾主手撫病婦曰，汝病今解。

特求 求主醫我神魂諸疾。

第一端 病婦苦境 經紀瞻禮日，耶穌在堂講道，有婦人十八年負

病，僵僂不能仰視。

路加十三篇

斯婦被魔拘繫，有此景況。此爲奉教

者迷於肉欲，溺於世務之像。財賄佚樂之思，籠絡其心。使其常俯視塵世，惟顧肉身利便，不能舉心靈以向天主，而忘身後無窮之禍福。修德中人，亦有類是者。本宜精勤神業，而反縈心俗務，語言行止，出入起居，不似天上之人。將欲思慕天主，與主締交，不啻挾山超海之難，良可慨也。求主免我三仇之惑，專務振奮於繕靈事主之功。

第二段 病婦療愈 耶穌見斯病婦，命之前曰：女人，汝病今解，遂以手撫之。婦卽舒頌揚天主。同上觀吾主療愈病婦，可卽其地其時，而思當行之神訓。其病之痊也，適在公堂，眾人會集瞻禮之所，公同瞻禮之時。倘其無昭事之誠，不赴主殿，是日不得見主，恐終無療愈之機。以是知堂中敬主諸工，宜忠勤恪守，關係固非淺鮮。因天主之恩，我所仰求之事，究不知繫於何一善功，何一德業，而方能實獲。原不可以歲月之久，工課之煩，而或有怠忽也。且斯婦之病，歷十有八年，始得吾主憐憫。其堅恒含忍，亦可想見。而我欲隨求，而隨得主允乎。念我夙染神病，蒙主賜愈，亦宜效斯人頌揚天主，感激主恩。日後務期善守同堂之規制。

第三端 堂宰詐善 庶民見耶穌行事之榮，殊形欣喜。獨法利塞等

視主榮爲己恥。殊深憤恨。既欲詆誹吾主之行。又欲彰己修德之勤。乃借守規之名。而鼓其如簧之舌。如路加聖史所紀。堂宰以耶穌瞻禮日療病。不悅。向眾曰。可作工者六日。六日之中可來求治。毋於瞻禮日。耶穌在眾人前破其惑。斥之曰。汝輩瞻禮日。疇不縱牛騾飲水。解其羈縛。斯亞巴朗女。被魔拘繫十有八年。瞻禮日不宜解之乎。吾主言時。諸仇愧慙。同上是知詐僞之行。爲主憎惡。當務於長上及神師前。直陳我心緒。庶得主療我疾病。賜我神恩。經曰。主喜與誠樸之人言談。喻經三篇勉之。 祝言

### 初四日 聖五傷方濟各

定像 想見聖人在天。坐寶座。享大榮。

特求 求主賜我識聖人神貧與謙德之深。勉力效法。

第一端 聖五傷方濟各之神貧 方濟各力行甘貧之德，可謂遙乎其極。其父專於貨殖，聖人自幼好施，求以濟急之物，從不吝惜。另聚多金，運送本堂，以作修葺之用。其父憾之，令其於本地主教前辭棄家財。聖人從之，且以身穿衣服，交還於父。曰：斯後更可虔誠禱主，而誦在天我等父者。於是陋食敗衣，每與乞人爲伍。一日往聖堂與祭，聞聖經有云：無聚金銀，無兼衣，無履無杖。瑪竇十篇聖人若以己有爲太豐，卽拋其杖履，以草繩代腰間之皮帶。始行講道，勸人悔過。天主報其堅貞，賜以特寵。回心向化者，實繁。銳意進修者，亦眾。一千二百十年，教宗因諾增爵第三准定修規。三年後，計修院已有六十區。聖人囊空如洗，地無立錫，得建斯院宇，給斯徒眾者，全賴善人哀矜，亦見上主特報其德也。吾儕宜效法聖人甘貧之德，珍重之如垣墉。

愛慕之如慈母。不恥衣食之惡。思維恪守修規。求主益我珍愛神貧之德。亦有時徵神貧之效。身遇匱乏。亦當心存喜悅。

第二端 聖五傷方濟各之謙遜 聖人自商人子。而創立修會。及爲總統。修道者已有一萬二千人。其崇功懋德。嘖嘖被人稱道。然聖人常自卑自賤。自視在衆人之下。終身甘居六品。自擬無德。不敢晉陞司鐸神階。聞有譽言。深自省察。恐見棄於主。而報以浮名。每曰。永生之事未決。不知日後何如。應得於人者。惟輕賤貶責耳。人之美善。皆由天主。惟主宜尊敬光榮。一友在默禱時。見天堂一寶座。華麗異常。聞有聲曰。此以酬方濟各之謙。後此友請聖人自忖。回云。吾乃眾罪人之大罪人。蓋天主賜我之恩。加之盜賊。其功修必百倍於我。倘我不蒙天主護恤。其凶惡更甚於惡徒。可知謙德之寶座。莫之與京也。

我乃於斯謙遜之義，聞之已熟。然不能深思力行，是以德業不見其精，修途不見其進。若能如聖方濟各以己之罪過，己之卑弱，恒存於心，時注於目，庶可望德業有成，日增主寵。蓋謙爲諸德之基，主寵每加於謙遜者也。今賀聖人之尊榮，求聖人轉達，不願如聖人默禱神遊，不期如聖人五傷之印，不望有聖人先事之知。惟望賜我以神貧與謙遜之德。祝言

聖人生於一千一百八十二年，逝於一千二百二十六年，二年後，教宗額我略第九位列入聖品，百年前，共計修院七千所，修女外男修道共十二萬人。

### 初五日 耶穌赴宴訓賓

定像 想見吾主席間如何莊重，動人敬仰。



特求 求主賜我聖寵、兼修內外。

第一段 責人惟急外行 路加聖史紀云、有法利塞宴耶穌、耶穌入坐。法利塞臆度曰、斯人餐前、奚不盥手。耶穌謂之曰、爾輩法利塞精潔杯盤外、而心則盈貪殘惡。十一篇吾主於此、以器皿喻人。非言人不宜修飾外行、惟訓人更當清潔內靈。庶得承歡於主、而獲其神恩。故我欲遵主聖訓、宜謹慎內修、專務實德。而於外貌威儀、亦無怠忽。倘修道之人、怠於整潔端莊之規格、或疎於周旋禮讓之節文、令人鄙薄其身、及其同類、而貽誤教導人靈、亦爲憾事。我當留神加意、願全德詣於天主、及眾人前。屢憶保祿宗徒之言曰、吾儕行善、宜悅樂主心、而後昭彰人目。致哥林多人後書八篇非然者、金玉其外、敗絮其中、烏能免吾主之斥責哉。

第二段 人宜謹修內德 德之宜修於內，而悅樂主心者，可舉其三。

一、神靈清潔。不特盡心免巨忒，且避小過。蓋心身愈淨，天主愈喜與之交遊，而賜之洪恩。二、翕合主旨，不輟祈禱之工。時以一二經語，心維口誦。生命活於主，萬事行於主。如聖保祿宗徒所謂，爲天主之人，而爲全人。致弟莫德後書三篇三心志誠正。思言動作，無不歸附於主，而增益其功。清心也，契主也，誠意也，此三者爲內修之要務。今我自問，我果有是乎。宜在主前，謙卑抱愧，思有以進修之。

第三端 人宜兼治外行 人之視聽，必在外著之言行。故於修道者，每自其外著之威儀，擬其內修之高下。有志淑人拯世者，自當端其品詣，令人景仰。庶能誘掖人，救靈事主也。今揭其最要者三。一曰，行止端莊。語言酬應，不亢不卑。出入起居，且仁且智。二曰，待人忠悃。熱

救靈之火。濟以柔和。盡誠懇之情。兼以睿識。恭良和愛之中。時著清嚴德操。三曰。處事堅貞。執持規矩。正平志氣。遇艱窘。仍能果毅恬安。逢得意。更能謙卑節制。此數者。皆所以飾外修。而形內德也。其事雖非易易。亦非一朝一夕之工。然究非不可造之詣。我宜砥礪以求者。有修之之分。必有修之之助。當細心曲意。謹我行爲。慎我言動。隨時以此省察。則庶乎其不遠矣。祝言

初六日 林樹不結實喻

定像 想吾主儼然宣講。眾人忻然聆訓。  
特求 求主賜我聖寵。俾能結救靈修德之實。

第一端 樹無果實 耶穌講道時。人告以有加理勒亞人見殺於比辣多。吾主乘機訓人。善用其三年內所施之寵恩。結其改遷之果實。

不然，皆將膺主嚴罰。乃設喻曰：有植無花果樹於園，他日覓其實而無獲。謂圃者曰：予覓實於此樹，而未有結者，於今三載矣。亟斫之，曷虛占地爲圃者曰：請主尙待一年，容予周掘糞溉，或可結實。不爾，然後砍之。路加十三篇解經者謂吾主斯喻，不第指如德亞國人，亦指後世之信人修士，天主種之於塵世，移之於教會，湛露之滋，灌溉之澤，春風時雨，得聖寵之栽培，不一而足。念我一人之身，一日之間，被主甘霖，恐甚於億兆人旬月內所沾之露霖。喻微小之聖寵也問今者德行之花何在？修成之實何在？避靜以來，靈魂之進境亦何在？卽當恐惶媿悔，倍益修省之虔誠。

第二端 樹將斫伐 喻人心志淡漠，德不修，過不改。天主之榮，不顯。吾主苦難之功，無效。同類觀摩之益莫沾。修院冀願之恩，寡獲。長上

之期望。徒然。自身之功業。空虛。斯皆如樹之無結實也。我自思之。能不寸衷惴惴。主曰。凡樹弗結嘉實。將斫而投之於火。路加三篇又曰。無用之僕。投之外冥。有涕泣切齒之所。瑪竇二十五篇樹不結實。被人斫伐。無用之僕。被主屏黜。倏忽之間。天主命之謝世。不遑善備。其終若是者。屢有所聞。我猶優游自得。不知驚惕乎。謝主寬仁。至今不加鈇鉞。嚴罰也。求主寵佑。庶能知過而圖速改。

第三端 樹得寬容 園丁愛此樹。爲之求延歲月。更將糞之培之。望其結實。是吾主爲我祈求聖父。延我生命。加我寵澤。助我立功也。若望宗徒曰。吾儕有義人之首。耶穌基利斯督。作中保於聖父臺前。前書二篇念吾主如斯仁厚。自宜壯我心。強我志。乘此所有時光。竭我才智。夙夜勤勞。以副吾主聖心深意。保祿宗徒曰。我於果毅我者。無

有不能。吾主既願澆灌潤澤，喻加以寵恩也。我苟不負內靈之寵，隨從神師之引導，庶可望德臻於實，功底於成。 祝言

初七日 黨人恐嚇耶穌

定像 想見法利塞謂耶穌曰，離此他往，因厄落德意欲殺爾。特求 求主賜我聖寵，不中魔計，不畏人世，而勇於爲善。

第一端 恐嚇耶穌 吾主敷教於加理勒亞邊境，法利塞等見其事功之盛，無能禁阻，欲使吾主去此地，一若有憐愛之情，而爲之憂懼。語之曰，離此他往，因厄落德意欲殄爾。路加十三篇是言乃邪魔之心肝。邪魔恨人爲善，見人勤行愛人救靈之業，恒欲阻止，使之或卽職任，或離處所。時而惑其心志，敗其意興。時而動人憎忌，速之他往。時而慫人嘗毀，冤誣於長上之前，致失器重之心。此種情景，非懸空

設想、實時有其事。聖若望苦修與方濟各類日斯等、嘗身遇之。惟彼等能誠心倚主、得濟斯艱、卒得見其節義。求主增我信德、能勝三仇狡計、而恒心於善。

第二端 耶穌果毅 主對法利塞曰、往告彼狐、予今明兩日驅魔拯疾、三日而後終事。同上猶言我行我事、久暫皆惟我所願、無人可阻我所行。我之死於何時何景、皆已前定。吾主言之若是、可見其堅強剛毅。守職之間、心不因畏懼而搖動。凡修德求道者、亦宜如是。聽長命、行主事、以供厥職、所當敬畏者、惟天主。死於何年何景、權由主操。苟能爲主致命、死於任所、何幸如之。撫躬自問、我之志行、有若是之忠勇乎。恐每託故推辭、請求遷調。究其實情、或畏時事多艱、或虞人情不協、或憾事務紛煩、不逞私心、或憂功業難成、致傷聞譽。然乎否

乎。求主賜我心志之雄，去此柔懦之病。

第三端 耶穌嗟嘆 主繼曰：予尙宜行，迨赴京都受難。緣不可令先知者亡於日路撒稜之外，吾主意謂，可畏者非厄落德、實爾、曹法利塞將死之地，不在加利勒亞，而在日路撒稜。言念及此，不禁動情慨嘆曰：日路撒稜，日路撒稜，爾殺先知，爾擊遣使。予屢欲集爾子民，如鳥伏雛。爾恒抗違。同上可見吾主聖心如何慈悲，如何仁愛。我當效其萬一，亦忘己身之艱困，而憐兄弟之苦楚。求耶穌變化我心。 祝言

初八日 牧人尋亡羊喻

定像 想見耶穌如善牧，肩負亡羊。

特求 求主賜我深恃主心之情，恒得心志歡愉。



第一端 尋覓亡羊 吾主嘗自喻善牧。今此尋羊之喻，亦爲善牧之一證。可見吾主矜憐罪人，心悲靡已。時有法利塞、誹耶穌交罪人同席。主立喻曰：爾眾間，若有人牧羊百頭，亡其一。豈不置九十九於野，而往覓攸亡？路加十五篇其覓之也，迫不及待。急往追尋，無暇飲食，不遑他顧。又其覓之也，恒心果敢。不畏道路崎嶇，行之艱棘，力之勞疲。必欲尋獲而後快。天主於人，亦然。人或惑於魔計，自離天主。主卽呼之回頭，動以良心之恐怖，啟以寵光之默牖，驚以永罰之威嚴，助其痛悔改遷而後已。吾當稱揚感頌主仁。效天主待我之仁，以待我之所屬。

第二端 善待亡羊 牧人旣見亡羊所在，追從之，呼喚之，牽引之，不加橫暴，不施荼毒。且憐其疲頓，憫其困餓。慰藉之，喂飼之，撫摸之。主

曰、獲之甚喜、肩負而歸。同上此牧人愛惜亡羊之景、卽吾主待吾罪人之像。人旣回心歸主、避去犯罪之機、則內靈之憂消除、心志之安繼至。自覺聖神光照、聖寵輔翼、悔罪補過、不見爲難。聽其告解者、動情欣悅。悔過自新者、更多神樂。向時靈魂所失之歡慰、一朝復得。試問爾於此、亦嘗試之乎。吁、吾主。爾於諸事、心何其仁、神何其飴哉。智德經十二篇 我今定志、凡與人交際、務效主心之慈善。

第三端 慶獲亡羊 牧人歸、集鄰友曰、彼亡羊已獲、可胥慶予。吾主自明其喻義、尤足大慰人心。曰、予語汝、天主天神見一罪人悔、樂尤切於見九十九義人、無必悔。同上可知主之寬仁、更無涯涘。是故人於悔改之後、猶思日前之罪過、而多憂愁疑慮、一若未赦者、是亦無端自苦、而侮辱主心。倘日後有此憂慮、當視爲狡魔詭計。當思吾主

之言、而自謂曰。我之改遷、已爲神聖所喜慶、無徒自多憂。是亦深恃  
怙、寬心志、踴躍進前之一助。耶穌爲羣羊之善牧、當向之祈求。 祝  
言

### 初九日 爲主從徒之所要

定像 想見吾主威儀嚴整、訓諭眾人。

特求 求主賜我聖寵、能明吾主所欲、而忠信以行之。

第一端 謝絕親族 羣衆聆吾主之訓、間有誠實之人、心志不與法  
利塞同、願主收爲門下。後聞吾主所示章程、駭然驚異、一時莫解。章  
程之一、主曰人親就子、而弗憎父母妻子昆弟姊妹者、弗克爲吾徒。  
路加十四篇 蓋言人愛父母等、勝於愛主。如父母等爲我敬主之阻、  
我不力爲抗拒。寧承父母等之歡心、不能翕合主旨、是也。故我欲爲

主徒當爲吾主所首欲於我者，卽宜珍重愛慕天主於萬有之上，脫去一切物欲之情。凡能牽縛我心，阻我與主往來者，一概剪除。惟願奉行主旨。試問我之心情，能如是乎。謙卑自訟之餘，求主恕宥。并謝主斷我血肉之羈纏。

第二段 克去己私 主且曰，弗憎己生命者，弗克爲吾徒。同上據聖日羅尼莫云，憎己生命者，言整備捐軀隕命。不肯喪其信德，失主聖寵。并願割截諸奉承私愛，快適五官，及一切玷染靈魂之事，以表事主之誠。聖奧斯定曰，如此憎己於暫時，卽所以愛己於永遠。我欲行此主命，遵此第二章，當務者有二：一、謹防五官之妄用，更防心情之妄動。二、遏抑心志之好高。克制私心之偏嗜。主曰，天國格以力，而強者奪之。瑪竇十一篇審我於此隄防用力之工，多有欠缺。自愧未

能爲主忠善之徒。求主賜我自識之明，自怨自艾。芟去入世之嗜好，以免靈魂之絆累。

第三端 負十字架 人弗荷十字架而從子，弗克爲吾徒。同上此章程之第三。吾主所欲於其徒者，其言甚顯，其義甚明，不必旁求推解。荷已十字架而從主後，言爲愛主之故，甘受諸艱。凡事之煩擾我，磨挫我，逆我心，拂我意者，或人之反我素行，割我所愛者，或加我身靈苦楚者，無不安心含忍。據保祿宗徒云，荷十字架於主後，卽印吾主苦難於我身。隨地隨時，勤行苦刻，以致死於世俗，死於己私，而惟活於主。問我有此苦刻祭獻之心乎？有則殊堪喜慶。若憂疑慙怯，則更宜媿慙。因保祿宗徒有言曰，凡屬基利斯督者，其肉軀，其嗜欲，已釘於十字架。致加拉他人書五篇又曰，人無基利斯督之神情，非基利

斯督之人。致羅瑪人書八篇求主助我，加功修治。 祝言

初十日 二主日 聖母爲天主母

定像 想見聖母坐天庭至高寶座，超諸神聖。  
特求 求主賜我能識聖母尊高，而虔誠事奉。

第一端 天主母之尊 位至天主之母，其尊貴實出神人意想之外。  
卽聖母亦不能自解。蓋耶穌爲天主聖父之眞子，聖母爲天主聖子之眞母。其間實有至親之誼，使聖母造乎無極之尊也。故聖文多辣曰：天主能造更廣之地，更高之天，然不能再造一爲母者，大於天主聖母。聖多瑪斯亦曰：耶穌基利斯督，人性合於天主性。聖母之位，崇爲天主之母，皆緣於無窮之天主，而得無窮尊貴。致受造之物，無有可與之媲美。然吾爲天主之子女，吾之榮位，亦屬出人意外。經曰：得

通共於天主性體。伯多祿後書三篇異哉天人交。人類之主，取締有靈之體，屑畀童胎，生而爲人，隨賜我人類厥天主性。聖母小日課故敬聖母者，更當自端品行，置身物表，方不瀆聖母之尊。屢向聖母曰，且聖且童貞，予以何等頌美舉揚爾。蓋諸天不克容者，而爾以貞胎懷。

第二段 天主母之德 天主母之尊，固超神聖之上，而其聖德，亦卓然無能企及。其最著者，一曰潔德。聖安塞爾莫曰，聖母之潔，宜於天主後，無可比擬，得不媿爲天主聖母。故其始孕母胎時，卽蒙天主殊恩，獨免原罪。古經所謂天主上智之光，瑩美麗之句，聖教會每以之頌揚聖母。若謂聖母於萬有未造之前，已得天主眷顧，已在天主胸懷，而獨耀其潔德之光。二曰謙德。聖伯爾納鐸曰，聖母以潔德悅樂

於主更以謙德產生吾主。聖伯納弟諾曰：受造中無一如聖母之尊，亦無一如聖母之謙。問我於謙潔二德，珍重之何如？愛慕之何如？敬修之更何如？求聖母護我潔，助我謙，定志謹守五官，恒存謙下之心。

第三端 天主母之福 聖母既爲天主之母，其分中應有之福，有四。一、受敬於天主。蓋孝敬父母，爲至正之性理。二、被愛於天主。蓋愛情於火，火生火，愛引愛，一定之理。聖母愛主，自始至終，有加靡已。可知天主之愛聖母，亦出人意料之外。三、凡屬天主者，亦屬聖母。聖母實爲天地母皇，故聖寵之府庫，聖恩之寶藏，無不在其掌握。四、有權於聖子之身。聖子自願屬其權下，順從其命。路加二篇噫，我想聖母之尊榮福德，能不讚揚稱美，而深恭敬倚賴之情乎？拜賀聖母，求聖母加恩錫佑。祝言



## 十一日 聖母爲衆人之母

定像 想見聖母自天寶座，回目俯視吾人。

特求 求聖母賜我識其聖心慈惠，而恒爲其孝子。

第一端 衆人之母 聖母爲吾人之母，因吾人爲耶穌之弟。聖瑪竇路加保祿等稱耶穌爲聖母之首子，諸季之長兄。吾主復活後，自謂瑪達勒納曰，往詣予昆弟。若望二十篇且人與耶穌同一聖父。主曰，予將昇歸於父，亦爾父。予天主，亦爾天主。同上然則人亦宜與耶穌同一聖母。昔吾主身懸架上，奄奄一息，視徒而謂母曰，彼爲爾子。次謂徒曰，彼爲爾母。故聖母爲吾人之母，乃天主之特命，耶穌臨終之遺囑。聖母雖未嘗生我身軀，而吾主之言，不可不驗。當其利刃刺靈，早已開其心門，而納我於胸懷矣。聖賢念此理，多有神移心往，不禁

深孺慕之情。我可借聖達尼老曰：天主聖母，乃我慈母。然當思何以爲耶穌之弟聖母之子。蓋母子昆弟之間，須有以相似之也。

第二端

自示爲母

聖教會時感聖母，以古經之語，語人曰：予爲愛

德之本母，及敬畏，及明智，及聖望之本母。

小日課晚經，出辨德經二

十四篇，據聖教之言，聖母自稱爲母，慈愛吾人，助人敬畏天主，明於

修德，而可望天主賚錫於無窮。古來徵聖母之恩佑者，簡編充棟。問

世間聖凡，賢不肖，孰外幘幘乎。聖師等稱聖母爲憂者之慰，病者之

痊，義者之佑，謬者之正，貧窮者之保，有罪者之托，孤獨者之慰，險危

者之靠，劣弱者之勇，修道者之模，皆有以也。溯我生平，神形巨細，所

得聖母之恩佑，亦難枚舉。今偕天朝神聖，感謝聖母。日中每向聖母

曰：至飴瑪利亞，予望爾永遠保護我等。

聖文多辣語

第三端 吾人子職 爲子之職、當盡之於聖母前者、蔽之以愛之一字。一、愛聖母、因其爲我母。彼因極大慈善、常以濟惠吾人爲懷。二、愛聖母、爲易得其恩寵。從未聞奔其衛、呼其佑、求其救、而虛所望者。三、愛聖母、因天主欲我愛之、怙恃之。凡有急需、皆由聖母而得。四、愛聖母、因得聖母之愛、更以報聖母之愛。且以聖母至爲可愛、受主寵愛最深。我苟真誠愛慕聖母、必將不特愛以寸心、愛以一身。且愛於行事、愛於同類、卽助人愛敬事奉之也。吁嗟聖母、可愛之母、爾之可愛、口舌難宣。願賜我一星之火、灼熱我心。常爲爾純孝之子、歡慰爾慈母之心。此我所至禱焉。願竭誠傾意、向聖母切求。 祝言

### 十一日 克己苦身之德

定像 想見保祿宗徒訓人曰、克苦爾肢體。至哥羅森人書三篇

特求 求主賜我珍愛克苦之德、而篤信行之。

第一端 克苦之理 人性莫不向五官所嗜、因而生無數罪過。遏抑此惡向、而約制偏情之貪嗜、謂之克己。若存超性之志、習行此克己之工、斯成克己之德。而克己之工、與克己之德、自有分別。卽以德論、事有難易、修有久暫、其等級有高下之殊。總言之、克己爲修成之基址。我當始入德門之日、早宜明其義、勤其修。蓋主有諭曰、人欲爲我徒、須克己、日荷己十字架而從我。路加九篇今我自問、我於斯德、珍之何如、修之何在。所謂克己苦身者、原係用力之功。若不知用力、則有始無終、或始勤終怠、可不慎哉。求主賜我聖寵、俾我明其德之意、珍其德之寶、而勉力躬修。

第二端 克苦之要 克苦之要、可於二端視之。在我外者、吾主之訓

表、宗徒之言行、及諸聖賢之懿範、無不示我克己之宜急。在我內者、肉慾之私好、偏情之誘惑、隨時騷動。若不早爲約束、必將貽害身靈。觀斯二者、愈可知苦身之緊要。保祿宗徒曰、私欲之偏、致我不行所願之善、而行所不願之惡。致羅瑪人書七篇又曰、務神功、克制肉情、乃獲常生。八篇故人無克苦、必多罪過、不得救靈。更不能精進於德。念我過多德寡、善志無成功、誦禱無意味。守規盡職、鮮克忠誠。於謙遜仁良、含忍諸德、多所慚愧。非怠於苦克之修、使然乎。愧悔之餘、求主賜佑。定志每以此爲省察之題目。

第三端 克苦之貴 克己苦身者、欲吾主活於我、而爲我身心之主。除我罪種、芟我罪根。去諸修成之阻、刪諸不悅主心之行。又克己苦身者、如若望宗徒所謂、愛天主以誠實、以功行。前書三篇又如保祿

宗徒所謂，偕耶穌同釘於十字架。致加拉他人書二篇，既思克苦之德，如是尊且重，能不欣然企慕，奮然勉行乎。卽力弱多病者，亦多克苦之機，可勤克苦之修。所當務者，恒心果毅，不失當時初進之勤恪。若用力之久，謹行至終，則死後之歡，天堂之樂，有莫可名言者。昔聖伯多祿亞爾剛大拉死後，身繞大光，現於聖女德肋撒曰：「因我苦工，獲此光榮，卽可向此聖人，求其轉達。」祝言

### 十三日 申明克苦之要

定像 想見保祿宗徒謂我曰：專務神功，克制肉情，乃獲常生。致羅瑪人書八篇

特求 求主賜我聖寵，深明克己之要，而勉力修之。

第一端 私欲引人於惡 吾人自染原罪之後，身藏過惡之種，罪孽

之根，所謂私欲偏情是也。因此私欲之偏，人無不貪五官之適便。凡涉於苦身克己之事，則憎嫌畏避，有不期然而然者。經曰：人之覺司，與心之思念，自幼偏於惡。創世經八篇維此偏私，至死難能撲滅。種種偏情，多從而萌茁。如惡草滋蔓，纏縛人心，引人於非禮，幾無一息之停。若不恆心用力以制治之，必將貽禍無窮。今以其引人於非禮者思之。一、目視之非禮，以及意念之非禮。好察庶物，喜閱羣書，樂與開事。長上之行爲，他人之動止，凡形形色色，足以娛目者，無不以盡觀爲快。於是妄議妄思，心生誘惑，而肇獲罪之端。二、耳聽之非禮，以及言語之非禮。喜聽新聞異事，內外之言，無分善惡，欲盡入於耳。於是發爲無端之談笑，無益之浪言，虛廢光陰，違犯靜默，更可惡者，譏評誹訕，心志浮遊。而欲檢心誦禱，愈覺其難。三、睠顧肉身，飲食失節，

寢息無度，過分護恤肉身。種種此類，皆出於嗜欲之私，覺性之偏。哀求吾主，賜我認識何事更當克制。又求加我神力神勇，能從事於實德之修。

第二段 私欲離人於善 上言人之私欲偏情，不但求肉身快適，且憎嫌諸修德之功，及事當勉強而行者。人若不留神致意，往往怠於守規，懈於盡分。神業中，多違忠信。行事間，屢染玷瑕。欲明此理，不必求證於他，撫躬自省，殊可瞭然。試問於規矩中，何以此端守之不覺其難，而彼端多所違犯？若不故欲自欺，必將曰：此之拂我素行，逆我嗜好，不若彼之甚也。問於避靜時，此心此志，實出天主聖意。既明知之，又堅定之，何以不多幾時，一若付之流水，不之顧盼耶？又將曰：因其行之不便，需用勉強之功，而心力柔懦，未能恒其德也。問於預備



默想、行祈禱之工、井及時起身、守院宇之公規、何若是之多怠忽、而不盡其忠誠乎。亦將曰、因本性視若煩絮、以恒久謹慎細心之爲難也。我也念及於此、自覺慚愧、然未可遽爾敗意也。當復振善心、從新定志、不忘戰攻愈恒、功勞愈盛、愈爲耶穌勇兵。我之置身修途、原爲抑伏己偏、全勝己私。以此世爲煉獄、甘願克苦、無稍休息。求主保聖人轉達、增天堂眞福於無窮。祝言

#### 十四日 婦人獲銀錢喻

定像 想見吾主設喻訓人。

特求 求主賜我寵光、能明此喻之意、知所取益。

第一端 銀錢喻天主之寵愛 吾主旣設亡羊之喻、辨法利塞之誣。見上初八日又曰、若婦有銀錢十、亡一、詎不燃燭掃室、亟覓。路加十

五篇亡羊喻與失銀喻，言似相同，而意實迥別。據解經者云，婦人失銀，表奉教人失主聖寵。然銀錢雖貴，終屬有限。而天主寵愛，寶貴無窮。其價，卽吾主聖血。有銀錢，能購世物，有主寵，可獲天堂真福。銀錢與聖寵，不啻天淵之別。人失銀錢，亟思覓之，設法尋之。而奉教之人，身獲重罪，失主聖寵，仍優游自得，不覺時日之久，不思有以復之者，何其愚也。天主之愛情，天產之名分，平日之苦勞，皆爲烏有。天堂之門，爲之閉。地獄之門，爲之開。倘天主立時絕其生命，禍何如哉。爾當憐世人之癡，力圖救援，引之悔改，并求主照牖，凡居暗處及於死影者。路加二篇

第二段 銀錢表善人之熱心。失銀之婦，又可表失熱心之善士。當熱心之候，神靈滋潤，心志欣勤。卽在艱難中，修德立功，契合主旨，亦

不見爲難。因此熱心誦經默禱，每覺津津有味。卽謙抑苦刻，亦覺恬然愉悅。是故於修德之人，凡動其心而致其憂者，莫若失此熱心。因熱心可謂眾善之源，諸德之助也。我若不幸失之，亦嘗思尋覓之，而求復得之乎。抑惟徒自咨嗟，而怨心靈枯淡乎。今宜急務者，燃燭掃室。卽正誠心志，澡雪身神，復我守規之細緻，神業之忠勤，靜默克苦之修爲。庶可獲所失之銀，卽得向日之熱心也。求主賜我恒心勇毅，能遵行此神訓。

### 第三端

獲銀者與親鄰偕喜

主曰：婦人旣獲失銀，聚親鄰曰：已得

攸亡銀錢，共予喜。

路加十五章

從來未有人因一錢之復得，而招親

鄰相慶者。吾主此言，蓋別有深意焉。乃曰：天主天神見一罪人心悔宿咎，其樂如是。同上今試有一修途中人，旣惰而復勤，旣冷而復熱，

在天神聖不將歡欣嘉樂乎。吁嗟余靈，因爾冷淡，而致神聖憂戚者，多矣。宜有以安慰之，而殷勤奮勉。況其中實益，惟歸爾一身。何悠悠忽忽，而不急圖悔改耶。向護守天神，求爲轉禱。 祝言

### 十五日 聖女德肋撒童貞

定像 想見聖女嗟嘆曰：或當受苦，或願受死。  
特求 求聖女轉祈天主，賜我熱心愛慕耶穌。

第一端 德肋撒之神戰 聖女曾自記一事，殊足動人留意。謂進修矢願後，二十年間，恒與天主聖寵相敵。天主迫其絕世俗之交，而本性好與外人來往。曰：我靈一面，覺天主呼喚，一面覺塵世牽連。二十年中蹶而復起，未能剛強果毅。於是心無忠於事主之樂，亦無交遊人世之愉。聖女言之如此，其訓慰吾人者，多矣。一，可知一情之偏，亂

人心志之安平，阻人神修之精進，而不得締結於主。二、聖人聖女與我同類，不免本性之懦弱，行事之差謬。三、聖人聖女等竭力奮飛，修成大德之先，亦有多時不能全合主心。而人屢以懦弱爲辭，不知自勉，亦見其見事不明，而甘於自棄。謝主至今待爾之慈，急行天主久欲爾躬行之事。

第二段 德肋撒之神勝 聖女又曰，一日奉神師之命，懇切求主，賜我明主聖意。當時覺神騰物外，聞天主明語我曰，今而後，我欲爾惟與天神交遊。德肋撒得此神光照耀，聆天主明命，割絕世外牽連，惟望含苦茹辛，以証已愛主之情。於是躬修之精進，不啻載馳載驅。而神恩之寵錫，真如山如阜。每號嘆曰，吾主天主，我爲證我愛爾之情，或受苦，或受死，是所願焉。天主納其忠誠，增其艱苦，內多疾病之痛，

外遭窘辱之憂。侮之爲詐僞者。有之。賤之爲妄誕者。有之。鄙之爲異端及附魔者。亦有之。而聖女歷受種種磨折。能因深謙堅忍。未嘗爲之撓敗。今我思其懿行。當情甘獻身於主。願受天主加我之困。可望天主賚以神恩。求聖女轉祈天主。賜我堅心定志。勉力步趨。

第三端 德肋撒之功業 聖衣會係修會中最古者。至聖女之世。其規矩繩墨。間多弛廢。德肋撒志切淑人淑世。蒙天主默囑其衷。重訂修規。加嚴加密。而修道之士女。咸服彝訓。就其範圍。尊之如師。敬之如母。此亦聖女奇德之所致也。聖女欲成其業。去世前二十年中。焦心勞力。艱苦備嘗。恃神靈之勇。倚主之誠。加以聰明睿智。處事成宜。諸事悉臻妥善。及其謝世升天。見遵重訂之修規。而持嚴整之修者。男修院已有十五所。女修院十七所。至今聖賢代出。碩德迭興。我宜

讚美天主於聖女之洪功峻業，并賀聖女於天主之殊恩異寵。更效法聖女愛主愛人之熱心，樂受苦楚之忠誠，以固我修成之志。求聖女轉求天主，賜得所願。祝言

### 十六日 聖女德肋撒之遺訓

定像 想見聖女德肋撒執筆寫書。

特求 求主賜我聖寵，能以聖女之訓，作我修德之箴。

第一端 訓人如何言語 聖女德肋撒垂許多法言，彙訓，啟迪本會士女。令人披閱之下，不禁油然而感奮。今揭其要端而思之。其訓人言語也，有曰與眾人共聚時，以寡言爲宜。凡己之學問，善功履歷，若無益於人，終不可道及。如不得已而言之，宜示謙退之形，不忘天主之恩。受長上之譴責，苟無大故，終毋推卻。事之未知的確者，毋言一定。

并毋形容過實。凡有所言，未會於心，毋出諸口。屏絕譏評，盡除爭論。聞人講論靈魂之事，須謙恭而聽。與人言語，不拘尊卑長幼，恒示和顏悅色。時叅一二聖善之語，以裨神靈，以免口過。余靈思聖女之訓，如是美善，務宜謹慎行之。求主賜我忠恒。私省之時，不忘察己言語之失。

第二端 訓人如何行事 聖女訓人行事，又曰，與同事之人行事，必須就其性格。如保祿宗徒所謂，於眾人，卽爲眾人，以獲眾心。離奇特異之行，爲院宇中之大忌，宜謹避之。行事之間，目覩天主在鑒，是爲進德之妥法。若無緊要，勿以內心熱衷，顯露於外。非爾分內之事，切勿干預，更勿推究。待人須示溫良，待己終宜嚴肅。每逢喜悅，宜謙恭柔順。遇有憂愁誘惑，當直訴神師，隨其指引。若爲人長上，忿怒之時，



勿加斥責。及至心氣和平，然後訓飭，尤爲穩妥。定時之外，勿擅自飲食。至死勿輟謙遜克苦之工。又須格外虔誠，恭敬大聖若瑟。余靈思此聖女諸訓，未嘗強人以難，亦非過乎人力。黽勉之餘，必多內靈之慰，亦足感悅他人。吁嗟吾主，我有善志，每諉以心力柔弱者，多屬空虛。求爾憐憫賜佑，加我勇毅，敬遵聖女善訓。

第三端 訓人如何思慮 聖女訓人如何言語行事之外，又訓人如何思慮。曰：日中每念清晨默想之理，屢發愛主之情。在他人之身，只思慕其善德。在一己之身，惟憶所犯罪過。念己惟有一靈，惟死一次，惟有一命，且甚爲短促。惟有一永遠光榮，是當競爭。作如是想，自能脫離世幻。隨時隨事，尋覓天主。所願，惟願見主。所懼，惟懼失主。所痛，惟痛未能享主。所悅，惟悅事之引我趨於主，而心志恒得坦然安樂。

也。余靈、自省己身、有何不合斯訓否耶。今當定心立志、依此進修。求聖女轉達、賜我能遵守遺訓、步武芳躅。 祝言

十七日 三主日 聖母至潔

定像 想見聖母執利利亞花、在極美園中。

特求 求聖母賜我識其美德、而師法其萬一。

第一端 聖母爲童貞之鏡 聖母爲童貞之母、係聖教信德道理、永無疑議。聖師所傳聖母矢志獨先、首樹童貞之幟。蓋早知斯德之美麗、在天之榮賞也。盎博羅削主教兼聖師論童貞之修、其書之第二卷、嘗言聖母童貞、及其畢世之行、可爲向善輩之照鏡。見其潔德之模範、諸德之儀型。曰、其爲童貞也、不惟貞於身、且貞於靈。毫無私曲之偏、點染其意念。居心謙遜、措辭莊重、思慮周詳、簡言寡語、勤於誦

閱。不望空虛之富利，而重貧乏之祈求。專心操作，報顏酬應。不求知於人，惟願主鑒其衷。汎愛眾人，終不違忤。見年長者，作以示敬。與同年交，無憎忌矜誇。諸事順從正理，思慕真德。形貌之間，從未犯其親長。言語之中，未嘗離間同人。衰弱者，終不輕賤。貧病者，終不避嫌。步履指揮，聲音言語，無傲慢浮游之態。莫不著其內心之德。聖師又曰：此宜爲爾矜式。觀於是，可知何改何修，何去何從矣。

第二端 聖母爲潔淨之華 聖母之潔，聖賢皆謂無物可比。日雖光明，然據談天者云，其中未免有瑕疵。而聖母不但始終無玷，且因天主特恩，嗜欲之偏，全然息滅。一生不能獲罪。月雖華麗，然時消時長，晦明無定。而聖母之德輝，日新月盛，永無損滅之時。星雖燦爛，然見旭日而隱伏其明。獨聖母之德，見義日而愈形明艷。如晶瑩寶器，盛

飾瑤珠，映朗日而愈見光流采耀也。其珠之飾其潔德，在增其光華者，聖師盎博羅創舉其六。一曰端肅。身靈內外，無非左右咸宜。二曰沉靜。片言隻語，無絲毫之失。三曰節儉。飲食之物，最爲平常，最爲菲薄。惟充飢渴，不供甘旨。凡爲聖教有求於主，另加嚴齋苦刻祈禱之工。四曰寤醒。寢時甚促，且符古經之言，身雖寐，心仍寤。神靈之契合天主，愛慕天主，終不休止。五曰勤敏。事係奉事吾主，整理家庭，及哀矜貧困者，躬親作苦，不憚劬勞。六曰守心。或與人交際，或有事出門，心不離主。慎持三司五官，舉動自得恒悅主心，而感人景仰。噫，聖母之潔，遠超神聖。而其謹慎身修，時深惕勵，猶如此。我也神形多污，柔弱已甚，而不知戒懼。何怪多染瑕玷，行難純粹也。當思何以仰效聖母，讚頌之，慶賀之，并懇切祈求之。

祝言

十八日 客不赴華筵之喻

定像 想見吾主設喻訓席食諸人。

特求 求主賜我聖寵，能勝救靈之阻，且助人偕勝。

第一端 驕傲爲救靈之第一阻 耶穌曰：有人盛庀晚餐邀眾，及時供具悉陳，命僕往速。悉辭。或曰：適市莊，須往視，請爲予謝。或曰：市牛五偶，亟欲駕，請以爲辭。或曰：我新婚，情不能赴。使者返，述於主。主恨，遣使速出，遇貧弱瞽癩，悉携來滿我堂。我確語爾，厥初召客，終弗嘗吾餐。路加十四篇吾主斯喻，示已呼召如德亞人及普世人民，咸歸正教，沒後永享天筵。奈人多自阻，不肯受主寵恩。曰：市莊，須往視。卽益增產業，振作家聲，驕誇自滿，汲汲奔趨人上。此救靈之第一阻也。夫人畢世惟求自榮，不識謙恭敬主，服從主命，而欲思天主宴之天

堂偕享真福，斷乎不能。況世間奔波勞悴，爭求榮祿，及受用未幾，而無窮之苦辱已隨，亦可慨矣。幸我得主信德之光，視明世幻，當深心感謝。然爭名求貴，滔滔皆是。思何以破其昏迷，而俾知事主救靈之榮顯，伏祈吾主普化之。

第二段 貪吝爲救靈之第二阻 曰：予市牛五偶，亟欲駕。卽勤聚資財，貪多務得，日夜思富其田宅，豐其家資，一若此身無死，可永享世間利祿。而生前之金銀錢貝，卽爲其身心之主。甘願爲之勤勞經營，竭盡思慮。此外或別有天主，而欲虔誠昭事，非所知也。此救靈之第二阻也。修德者拋却塵緣，甘貧樂道，恒得心志泰然，以待天堂榮醺。是乃上主殊恩，報之爲要。然何以報之？曰：勤修神貧，素位而行，不負吾主訓喻之深心。且襄助他人，俾知世有之空虛，等於春花朝露。不

若以爭求殷富之熱衷，勤修德業之爲愈。我今謝主，賜我在神貧之路。并求主全我神貧之德，時新甘貧之志，樂受清貧之苦。

第三端 肉欲爲救靈之第三阻 曰，我新婚，情不能往。卽以婚姻之故，不遑赴宴，即不享天筵也。吾主之意，非言婚配爲不善。惟言肉情之嗜欲，最易引人於不潔。靈魂旣蒙不潔，自覺重濁，難思天上之事，更難修天上之業。此救靈之第三阻也。修道之人，潔身事主，尤當自嚴防閑，以免整潔他人，自受玷污之譏。當體吾主聖心，遵吾主聖訓，寤醒祈求，免陷肉身之誘。今懇切求主，降福我拯世淑人之業。使普世人民，迷途自返，卒能享天上之筵。 祝言

### 十九日 命莊僕罷業之喻

定像 想見眾人環繞耶穌而聽講。

特求 求主賜我善能聆主之言，遵主之訓。

第一端 莊僕之憂慮 耶穌謂門徒曰，富人有莊僕，惡聲聞主耳，緣耗厥財。主呼之曰，攸聞汝事何事，出詳爾產若何，茲後且休，毋掌我業。莊僕私自度，主命罷業，當如何。耕鋤力乏，乞食臉羞。路加十六篇富人，天主也。莊僕，我也。我受天主產業，雖似微薄，而所值甚多。肉身五官，靈魂三司，度日之時刻，自主之權能，超性之恩寵，及一切事物，供給事奉我者，皆是。將有一日，吾主詳察其業，精算其賬。而我之經營治理，不能合主聖意。且多私耗其資，不能歸奉。是日之憂愁窘苦，當如之何。今問爾之計簿，固能清楚乎。主欲與爾會計，能無愁慮乎。求主賜我自識之明，整潔我神形諸事，不致臨時侷促。定志敬行省察之工。



第二段 莊僕之黠智 莊僕自忖曰、獲善策。我脫莊後、彼定延我偕處。緣召負主者眾、問其一曰、汝負我主若干。曰、百斛油。曰、受券、疾坐書五十。問次、汝負若干。曰、百石麥。曰、受券、書八十。家主歎美惡僕善策。蓋今世子於厥事、智慧甚越明光子。同上吾主言此、非許斯僕之不忠、實惜我人爲靈魂之事、不若世俗人爲世俗之事、聰明智巧也。蓋專務修德之人、隨從吾主、原爲明光子弟。然於修德凝道之功、猶是懵然不識、殊堪媿怍。蓋以世人作事之明、爲我修行之鑑。且復振我初進時之熱心、以臻全德。

第三端 吾主之結語 耶穌重申結語曰、吾語爾、以惡瑪滿即言貨財積之朋、謝世時、彼引爾使入於永福。同上或有疑者曰、身處貧乏、何能符主訓言、以財貨交結友朋、使之爲我求主、助我入天耶。不知

時能勸富厚之人，樂善好施，賑濟窮人。且能行神哀矜，以憫人困苦，引人救靈。更能專務神功，勤領大赦，讓於煉靈，而使之早享天福。是功行之最爲便易，最爲有益。出乎爾者，必反乎爾也。今我可多行仁愛之功，可多聚高朋於天。而不知殷勤慰恤，預爲之計，無乃不免主愚鈍之譏乎。可向護守天神，懇爲轉祈。 祝言

### 二十日 訓人謹慎細行

定像 想見吾主曰：人忠於細行，亦忠於大事。

特求 求主賜我剛毅恒心，得忠於細事。

第一端 忠於細行 吾主論莊僕罷業之喻後，又語曰：人忠於細行，亦忠於大事。路加十六篇斯言雖簡，而其義甚富。人於細行之忠信，當爲修德之準繩。其故殊多，一緣於天主。我有愛主之分，卽宜於行

事間證我愛情。此無他，惟在平常日用之間，忠誠謹慎，恪行主旨。二緣於他人。我欲拯救人靈，加人實益，而無天主聖寵，曷克成功。然欲蒙主聖寵，必須慨然事主，而於細微之事，亦著我忠貞。三緣於己身。主曰：忠於細行者，得忠於大事。卽謂人先謹小慎微，庶於大患臨身，巨魔誘惑時，可望得勝，而奏功。余靈深思此理，當發爾信心，認主言之真實。捫心自問：平日之行爲何若？事主之忠忱何在？求主賜我堅剛之志，行之有恒，因無斯二者，不得爲忠也。每於省察時，不忘此端之義。

第二端 不謹細行 主又曰：不義於小者，亦不義於大。同上斯言出。天主上智之口，永無差謬。示人於規矩中，習慣懈怠，自以爲無甚緊要者，必貽禍重多。何也？因細事之不義。一失至珍之天寶，靈魂之功。

德、必也甚多。二、神靈多染瑕玷，他人雖不覺，而在天主前，實難寓目。三、大阻天主聖寵之功用，拒絕天主本欲賜我之恩。四、引人漸陷於冷淡，并能貽害同人。更能因一人之寬縱，致一院之廢弛。思念及此，極宜驚惕。須省我起居行止，或有不忠於主，抱愧於心者，卽日除之。

第三端 不忠之故 忠守規則，善盡職任，行事謹慎細心，關繫非淺。此理此訓，我已聞之熟而知之明。及至實際工夫，每恨不能如願，而多愆忒，何也。蓋恒忠於細行者，必先知謹慎。多用心力，多行克苦，習行遏欲防情之修爲。無奈人之本性，好自寬縱，自爲說辭，每將怠者之言以自慰。曰：希聖修成，不必泥於瑣事。或曰：予非新進，身非初學，不必若是迂拘。或曰：予性惆儻，予心慷慨，所謂大德不踰閑，小德可出入。此等辭說，皆違吾主聖心，爲身修大害。當絕之，惟恐不早。經曰：

慢忽細行，漸陷巨惡。辨德經十九篇又曰：敬畏天主者，分毫無懈。釋虛經七篇聖方濟各沙勿畧曰：人不善於小事，而能卓立於大事者，未之有也。求聖人轉達，賜我聽其言，師其行。祝言

### 二十一日 蕩子離親蒙難

定像 想見蕩子離父遠行，父乃黯然目送。

特求 求主賜我聖寵，恒能依附天主，忠於聖召。

第一端 蕩子離親 耶穌曰：昔有的人生二子，幼者懇父析以應得產。父強從之，分厥資財。未幾，集資蕩遊遠方。路加十五章聖日羅尼莫謂吾主意中，父表天主。二子表世間二等之人。一等忠誠事主，恪承主命，如長子瞻依膝下，不忍離親。一等放其心志，行事乖違，如幼子携資別父，異地遨遊。試問我之生平，能恒如長子，未嘗離主乎。能免

幼子之少年情性，妄用自專之柄，不思天鄉之福，而喜蕩遊客路，致大父心憂乎。天主或免爾此禍，或曾在此迷途，而喚爾旋返，置爾於今日之地，尚可補爾前愆，慰爾親心。爾當何如用其恩，勵爾行。感恩痛悔，且願多受苦辛，以報主德，而勤行補贖之工。

第二端 蕩子遇難 幼子遨遊異地，既富資財，又免父親約束，自以爲快心適意，莫此爲甚。不知世間佚樂，究屬空虛。主曰：因冒色無度，耗其所有，金盡囊空，地適涸饑，乃匱乏，投附一鄉民，令彼赴莊豢豕。彼欲豕食之荳穀以充饑腹，而無與。同上吾主謂人犯主命，放蕩形骸，以求身心之福，其原委有如是。亦謂修道者，捨其曩日虔誠，而欲依戀世物，縱適五官。然曾不幾時，已消耗聖寵之資，覺志氣日餒而不充，心神時濁而多穢。於是神樂之飴，清心之福，削除盡淨，真可憐

生矣。問我生平閱歷，然乎否乎。祈主還我救靈之樂，而以大德堅之。  
聖咏五十章 日內戒縱五官之適。

第三端 蕩子自悲 饑餓難堪之際，追憶曩日居家富厚，今反不如當時服役之僕，最爲酸心。慨然歎曰：我父幾許傭僕，皆得宿飽，我於斯饑饉將斃。同上爲人牧豕，卑不足爲人齒，傷何如之。聖基所曰：此乃人離天主，違大父之酬報。眞如達味所謂類於蠢獸也。爾之流離，或未必若斯汗下。或爾早入修途，身居凡俗之上。然問爾行詣之超卓，能如爾品位之崇高乎。庸常信友能於誦經領主時，多嘗神味，飽飫主寵。爾則反覺神糧匱乏，力量虛微。此之謂家本席豐，而不免死於饑餓也。今日聖胡蘇辣等十一位童貞致命慶期，求其轉達。祝言

二十二日 蕩子先後殊狀

定像 想見一鵠面少年，爲人牧豕，與豕同羣。  
特求 求主賜我聖寵，能深惡使我遠主諸事。

第一端 蕩子居家 山邊溪畔，見有屋舍儼然，綠陰四繞，花木扶疏，人謂此蕩子家也。父最慈惠，兄甚孝友，僮僕多恭順。安居樂業，衣食無憂。不識作家之苦，未聞人世之艱。游人至此，未嘗不歎爲福地，而低徊不能去云。吾謂修道之人，所有佳境，其清幽亦若是。遠離塵世紛囂，恒依殿宇爲居，不爭名利，不干榮祿。往來昆季，共相和愛。師長殷勤，預籌神形諸急。有大德士謂其弟子曰：嗟予神昆，可明悉吾儕聖召之尊，自將欣然砥行，毅然前進。蓋知之愈明，珍之愈重，愈能奮興而有恒。蕩子苟識其間樂境，當不思離父遠遊，自貽伊戚矣。我今



懇切求主，賜明聖召之尊，增我珍愛之情。凡逢憂苦，可偕達未聖王自勉曰：予靈奚爲憂鬱，而昏擾我。聖咏四十三章

第二段 蕩子遠遊 去父母之邦，作狹邪遊。無何，囊金已盡，友朋輩亦皆遠避。子身異域，又遇饑饉，旣多嗜欲之蠹，加以寒餒之苦。於是形容枯槁，面目憔悴。百結鶉衣，與乞人爲伍。伸手求憐，每受人譏刺詬辱，苦何如也。余靈，倘爾落於淡心之禍，可於蕩子鑒爾景象。逐一審視，殊深憫恤。憐蕩子，尤宜自憐。思何以復我靈魂所有之良貴，而脫其窮厄。求主助我力行此意，定志恒避冷淡之機。

第三端 蕩子豢豕 不得已，投附鄉民。鄉民吝嗇甚，見其窘促，尤薄待之，令豢豕。無歇宿處，日夜與豬猯同羣。亦無物充饑，幾與羣豕爭食。嗚呼，斯牧豕者，原係富家子弟。回溯當初珍羞滿席，自奉甚豐。出

入起居，必有傭奴隨侍。今將餓死，不值一豕之命，是果誰之咎歟。修身立德者，隨從吾主，本爲事之至榮，任之至輕。人反嫌其煩重，妄想世俗之虛浮，不惜以心爲形役，而受魔鬼之挫折。是較蕩子之屈抑，殆有過之，無不及也。緬想斯世，蚩蚩者實繁有徒，恐爾未嘗不在其數。幸早得主光之照，已作窮途之返。此後自當加功進善，以動天主之慈心，忘爾前日之癡迷。聖奧斯定至三十歲，行同蕩子。及一旦回頭，至終專心愛主。今我求其轉達，賜能師法其痛悔謙遜之真，愛人救靈之切。祝言

二十三日 蕩子回心改悔

定像 想見蕩子涕泣漣漣，奔投慈父懷中。  
特求 求主賜我虔誠倚望主仁，而得心志安舒。

第一端 蕩子回心 人有言曰，嗜欲盲人目，苦患啟人心，觀蕩子而益信。當潦倒不堪之境，乃始回心自悟。深知日前離父之非，心中懊惱，口舌難宣。思欲脫已厄，而救已生，惟有歸向父前，求其恕宥。曰：嗟，盍起而歸。往告我父曰：我獲罪於天主，並獲罪於爾，今後不堪稱爲爾子，惟視爲僕役之一。乃歸往父。路加十五篇吾主言此，所以訓我者三：一、際遇艱難，備受窘抑，自覺心靈昏擾，當知此爲天主醫我心，助我修省之機。二、當此困頓，不惟不宜灰心敗志，且宜深自審度，思何以免神靈憂患，用其妥善之方。三、望天主畢竟賜我恒心剛毅，服其良方，以沾神益。今宜求主恕我前愆，定志遇愁苦時，不忘趨赴主前。因其如保祿宗徒所謂，實爲仁慈之大父，安慰之天主也。致哥林多人後書一篇

第二段 蕩子歸父 吾主言蕩子歸時其父待之之情曰未至家父遙見之因檻樓異常不之識及知爲幼子愴然情動子前行跪伏膝下哽咽曰父我獲罪於天主並獲罪於爾已不堪稱爲爾子父見其痛悔不待竟言携之起抱其頸親其面路加十五篇此慈祥之父非他卽我儕日誦在天我等之父天地萬物之大主人當傾心孝愛竭誠事奉者也若於行事之間存奴僕之懼心志憂疑慮主曾否忘我前罪一若憂天主心量之窄如爲慳吝之主是無端自苦亦深辱主仁我今自訟識見之愚求主寬宥日後事主更宜全然倚恃以增我歡欣愛慕之情。

第三端 蕩子享膳 吾主於蕩子之父描寫天主聖父之仁謂旣見子悔罪真情赦其前罪忘其舊惡後更欲復以己子之分乃命僕曰

亟取鮮衣衣之。戒指飾其手，履韞納其足。可牽肥犢以宰，肆筵設席。緣我斯子，已死復生，已亡復得。遂張樂宴喜。同上此慈父之行，一一徵於罪人遷改之時。蓋天主仁慈，不但宥人前愆，且還其所失之寵。鮮衣者，罪惡之赦，心靈之潔也。戒指者，聖神之福庇，及與主和好也。履韞者，堅強果毅，恒心行善，步履天衢也。肆筵設席者，食天神之糧，服長生之劑，與主偕燕而愷樂也。嘻，天主之爲父，若是寬仁。人非木石，當思何心以愛之，何爲以報之。懇切熱衷，向在天大父認罪求赦，并發熱愛。祝言

### 二十四日 天主仁善先加於人

定像 想見蕩子之父，見子轉回，抱其頸而撫慰之。  
特求 求主寵照，賜我益明主善，而愛之益熱。

第一端 主善未盡形容 連日既思蕩子一喻，茲可進思天主無量仁慈，更顯於先加人之聖寵。當蕩子歸家，其父待之逾格寬宏。倘人以爲天主仁慈，形容已盡於此，是猶以燭火之光，卽爲杲杲紅日也。其父之仁厚，固出人意外，念之，每欲動人泣下。然不過表天主仁慈之一分，未見天主仁慈之全功。惟言其納受之仁慈，而非言其先加於人之寵佑。亦祇爲恕人悔改之天主，而非見爲尋覓強梗罪人，動其回心之天主也。夫仁善之德，加於人極困之中，最足感人心服。所以受恩者，每多思慕其恩人。想蕩子之歸，得其父若是寬仁，中心感愛，自可懸揣而知。然天主待我，勝於蕩子之父，百千萬倍。而我能漠然無覺，淡然不知愛慕乎。當發愧悔愛主之情。定志念愛德誦，勿再有口無心。

第二端 主善殊見形容 若欲將天主先加於人之仁善盡形容於蕩子喻中。則吾主宜言其父隨之於客路。尋之於娼窩。當其艱厄之時。躬親往視。不責其游蕩。惟勸其旋返。許以田產房屋。衣食資財。速之及早歸家。此乃天主聖寵先加於人之用。誘掖人悔改之方。固有如是者。然吾主立言設喻。惟循事理之常。若謂蕩子之父。有若是之行。恐駭人聞聽。較難取信於人。蓋此類慈祥。非於無窮天主。固無可得而言也。天下人溺於罪戾。卒能興起。可證天主之仁善者。不知凡幾。試問爾躬。或亦非箇中人乎。非天主情深悲惻。先加寵佑扶掖。返自迷途乎。卽爾相識人中。豈無聞前後如出兩人。而嘆主寵之奇者乎。敬謝天主曰。伊人等因何蒙主眷懷乎。及於人子。猶盼視之。聖咏  
八章 主果行仁慈於我等。我等歡然。一百二十五章 今而後。當留心

助人識主慈善，乘機稱頌主仁。

第三端 主善莫可形容。以人事而喻天主之仁，雖造夫至極，而猶憾未盡形容。蓋天主教仁慈，無物可擬，無言可喻。其所以如此者，爲其性量無窮無盡，而人之聰明終屬有限。以有限之聰明，莫可量無限之德性。在我者，宜奇主仁愛之深，欽主仁德之崇。言論中，時揚主善行事間，時報主恩。盡我心思智慮，助人信識主而事奉之。庶幾晷盡涓埃之報，而頌主美善於無窮也。求耶穌賜我識其聖父之善，永得傾心愛慕。祝言

二十五日 貧富善惡不同途

定像 想見富人在地獄中號曰：我在此火焰，苦不堪言。  
特求 求主賜我寵光，知世有之不足恃，益勤功德之修。



第一端 吾主喻言 吾主立言訓眾，謂有綺紈子弟，鄙吝而凶殘，惟耽樂是從。曰：昔有富人，日服朱袞繡絺，樂豐筵長飲。更有乞人，雖甚窘，然安貧飽德。曰：乞者名辣匝祿，徧體瘡痍，臥富者門，思饜席間餘瀝，無與。有犬來舐其痕。二人結局，較生前迥異。曰：乞人死，天神接送亞巴朗懷。富人死，墮地獄。路加十六篇世間貧富之不同，今古皆然。然事有昔之所無，而見於斯日者。設使富者博施濟眾，甘貧好道。貧者忻然聽命，榮主繕靈。則或富或貧，殊途同歸，胥堪慶幸。若問斯幸，何自而來，知爲吾主福音之訓，思有以頌謝稱美之。交接之間，慎無分貧富，而用其愛情。

第二端 喻言之旨 吾主斯喻，意欲破除時人成見。蓋如德亞人，概以斯世福祿爲人有德之憑，亦爲有德之報。而以艱難貧困爲其罪

戾之罰。於是見人生而爲貧，或身遭困難者，擬爲罪人，而鄙棄之。且擬人生至大之福，卽田產之多，資財之富，而營求之。其誤不已甚哉。而今人之意見，亦類多如是。是以財貨之貪，未嘗減損。卽奉教之人，爲利祿而牽至地獄之途者，不知凡幾。我苟有心挽救，而轉之生路，則往來酬酢之間，自可指破迷津，喚醒癡夢，使之誠求真福。如以匱乏機便爲辭，我恐適證爾無救靈實意，豈不可愧。求主增我信德，及救靈之火，務於言語間，證我信心。

第三端 喻言之益 我人默想此喻之義，可得實益於我身靈。實益維何，卽輕視諸凡與時俱盡之物。如生命之安樂，勢利之憑依，才學之名譽，事功之顯耀等，皆是。又能珍視心靈之實德，樂受謙卑困苦，以報主愛，以補己非。人旣深知其理，則見己穎悟之淺，身力之弱，讀

書處事，皆不如人。動輒受人鄙薄，憂患無人慰問，遇此情景，自不心  
愁志敗，而生怨尤。且思天主仁慈莫測，其所以待之若是者，欲玉成  
謙遜，含忍克己諸德，以備無窮榮福於天。將感謝天主，自慶幸福之  
不遑，何愁之有。凡欲精於修德，結契主心者，尙其知所勉乎。向吾主  
耶穌誠求誠禱。 祝言

### 二十六日 惡富下墮餘訓

定像 想見耶穌語人曰：富人死，墮地獄。

特求 求主賜我不失敬畏之情，時防獲罪於主。

第一端 思地獄之益 日昨默想富人隕獄，殊動人地獄之思。我可  
以地獄之理，隨時作默想之題。將地獄之苦，銘諸肺腑。庶常存畏主  
之心，不敢獲罪於主。蓋卽精進於修德者，時亦心志昏蒙，偏情搖憾。

非念地獄永苦之刑。幾無以持其善志。故吾主教誨眾人。訓迪宗徒。每以地獄驚惕之。是知地獄之思。助人增進德修。殊非淺鮮。而無可慢忽。聖方濟各。玻爾日亞。每想己身如在地獄苦海之邊。以信德之目。注視無數神人陷落其中。自謂曰。方濟各。不見爾應至之地乎。爲爾罪過而應下之獄乎。爾之應受斯苦。甚於斯羣魔。亦甚於斯諸靈。而斯魔斯靈。獲罪之數。及悔改之機。皆不及爾之多也。於是聖人謙遜自賤之心。油然而起。幾令人莫測其深。於是不敢自恃。樂從長命。常恐陷於傲魔之計。於是茹苦含辛。克己補贖。雖超越尋常。亦不覺爲苦。宛若以地獄之火。反增其熱心之火。而倍益其愛主之誠。救靈之切。我當效法聖人。如是以思。將見德業日進無疆。豈曰小補哉。謝主賜我。得此良法。務善用之。

第二端 思地獄之苦 我人於身後事，雖信之堅固，然無能明審其情形者。欲思地獄之苦，寧以末日吾主斷惡人之語，體味之。曰：爾輩凶禍，離迷我，入永火。瑪竇二十五篇何謂凶禍，卽爲天主降殃棄絕，永不能得其慈憫。禍於靈魂，禍於明司記性。常悲怨自己，因空虛卑陋之物，而失天堂真福。禍於肉身，禍於五官百體，偏受莫名之苦。何謂離迷予，卽謂在地獄，與主永遠遠離，永無相見之日。天主爲惟一福樂之源，離之則絕無他望，再不能稍有安慰之想。何謂永火，卽謂在地獄，被火漸漸薰炙。倘死在火中，已慘酷不堪。今焚之於烈火，永不能死。其刑之苦，更何如也。吁嗟，蚩蚩者氓，苟能以地獄常置目前，時深驚惕，其猶將安然獲罪乎。旣獲其罪，猶不思速卽改悔乎。猶以立功補過，克己遏欲，爲難乎。無寧如聖奧斯定曰：願主鍼砭我，焚炙

我於斯世，而赦免我於永久。求主以地獄之苦，時掛我懷，庶能勇於爲善立功。經曰：憶爾末時，將永不獲罪。辨德經七篇亦能使我遇順知謙，遇難知忍。忠於聖召，熱於神火。雖無司鐸名位，而隨處可行宗徒之功也。今天神月將盡，向護守天神求以地獄之景，常置我目前。

祝言

一十七日 耶穌之和柔忠愛

定像 想見耶穌手撫孩童而祝福。

特求 求主賜我聖寵，得昭彰耶穌聖德於我身。

第一端 耶穌之和順 吾主與法利塞暨明經士，論婚配之理，言童貞之貴。其時有人獻嬰孩，求主手撫，爲之祝福。其事諒必出自爲母者愛子之情，奈不得其時，殊形煩擾。故門徒斥責之。耶穌見而不悅。

曰。容孩就我，勿禁。瑪竇十九篇、瑪爾谷十篇、路加十八篇聖史若以  
閒筆紀此瑣事，然正所以見吾主和順之德者亦多。和順者，心志溫  
柔，意氣安恬，人欲就見，或與言，恒能怡顏納聽。此類之行爲，不特屬  
下者深望於在上之人，卽凡從事修途，以愛人爲事者，皆宜致意。試  
問爾於斯，果能無歉乎？未嘗以冷眼視人，示人以難親乎？抑惟與外  
人恭順，而於昆季多形艱梗乎？有，則深自愧悔，務於煩冗時，加意以  
溫雅待人。

第二端 耶穌之柔惠 吾主不但容人携嬰孩親近，且與以柔惠之  
憑，著其慈愛之心。聖瑪爾谷紀曰：乃懷抱嬰孩，且手撫，且祝福。十篇  
吾主柔惠斯孩，其心至潔，其意至高。於斯嬰孩，見已聖父之肖像。珍  
愛斯至寶靈魂，爲天主所造，以永享天福，天神所樂以結伴者也。爾

於所屬之孩童，未嘗不覺心之慈惠，愛之柔密。然此柔惠之情，能專繫於信德之理，而不雜以本性之情，與嗜好之偏乎。須知戒慎，切勿自恃。蓋有德業過爾，學問勝爾者，因疎於防閑，漸違禮制，不能固於肌膚之會，而挺立至終。當向天主曰：於魔隱計，主救我等。行事之間，恒隨智德之導引，務存心志之潔清。

第三端 耶穌之訓迪 吾主於祝福嬰孩之候，另顯其愛人之切，神火之熱，乘機垂訓聽講諸人。既謂其徒曰：容孩近我。又曰：天國爲若輩所有。予誠語汝，人不類嬰孩，承受天國訓言，弗克入。路加十八篇在此數語，戒法利塞等之傲慢，勸人隨從己訓，效嬰孩之誠樸，而易於受教也。觀吾主之表，當隨地隨時，著我救靈之志。而應酬談笑之間，可以一二微言，畀人實益。且遵吾主之訓，當法嬰孩之至誠。誠於



主前，行事恒正直其心思。誠於長上之前，開陳衷曲，毫無隱闕。誠於昆季之前，待人接物，無行詐僞。求主賜我師主之表，從主之訓。祝言

### 二十八日 募傭經營葡萄林之喻

定像 想見吾主設喻訓人。

特求 求主賜我明其喻言之義，而獲益於身靈。

第一端 招募傭人 天主簡人於天國，擬家主農出募傭，定每工一錢。已初復出，觀市中閒立幾人，謂之曰：汝等亦之予葡萄林，予酬汝若值。傭承往。午正申初更出，亦復如是。時幾酉初，又出，觀立者幾人，曰：汝曹曷爲終日閒立於此。彼曰：無僱。曰：汝等亦之予葡萄林。瑪竇二十篇 家主卽人類之主。葡萄林卽斯人類，內含救世主根株。傭人

乃古祖先知民長及諸宗徒。天主歷時遣於斯世培植斯人。訓以待救世主而沾其寵澤。工值卽人賴救贖之恩而獲功德之償。享天堂永福。今當感謝天主經營斯葡萄林培植斯人類之殷勤。嗟夫世人不良不生葡萄多生榛棘。依撒義亞五篇恨我身之不德不能副主栽培溉澤之恩。而今而後尙其勉諸。

第二端 資給傭人 及暮主謂督司曰呼傭給資始給未至迨至首至。其所以如此顛倒之故解經者謂吾主已自明之曰斯爲先者後後者先。蓋言如德亞人得天主之召奉教而入天國者先於他國人民。然以大概而論其人辜負主恩進教歸真者後於他人。故主又曰請者多簡者寡。蓋言天主召國人行上升之路者其數實多且無人不在其數。而用聖寵之恩聆宗徒之訓自居於簡者之數者無幾人

也。同上今我謝主，賜我在聖教會內，并求天主爲如德亞人歸化。聞簡者寡少之言，自慶得主聖召，幸在熱心之路。更思自勉在簡者之中。

第三端 傭人訕毀 幾酉初，至者至，每獲一錢。首至者默付工資益厚。然亦每獲一錢，受而訕之。曰：斯輩後至，工惟半晷，我等整日任勞耐暑，主例彼與我等同。主謂其一曰：吾友，予未有不義及爾，爾豈不與我定一錢乎？欲酌彼，同酌爾，豈不可行予所欲？抑爾目自惡，緣予自善。同上吾主於斯，預言如德亞人之奉教者，見異邦人信從聖教，同其一例，將有怨訕之言，亦預示宗徒將何如斥其誹謗。而宗徒果能會悟吾主之意，終有以糾駁斯人。宗徒行實十一十五等篇，故人於教道之途，不可以年歲之多，卽爲過於他人。又見後進者德茂聲

隆更不可憎忌而生怨尤。今日爲聖西滿達陡瞻禮，慕其營作主林。賢勞卓著。祝言

二十九日 續思葡萄林之喻

定像 想見家主給資於傭人。

特求 求主賜我聖寵，勤敏於吾主之林。

第一端 募傭 天主所刻意經營之葡萄林，卽我人之靈魂。植之以理性之光，溉之以吾主聖血，殷勤託之於吾人，自晨及暮，自生至死，勸我善爲滋培，庶結聖功果實。更勵我以應得之資，卽爲天堂永遠真福。故人或幼或壯，或艾五十歲謂之艾，或老，均宜順時竭作，服力於斯林，而不容稍怠。今試自問於志學之歲，卽十五歲時也，始進之時，誦習之年，以及諸歷試之日，果能無逸無曠乎？若此年華尙未全

往方在巳初，自宜力勤樹植。年歲已在午正，或在申初，正當事業興隆。精明幹練之時，尤宜知所操守，慎勿心馳志騖，怠於自修。務於愛人作苦之中，日宜勉進於德。痛我向日之蹉跎，求主憐憫。願我異時之補救，賴主寵恩。以今日爲始基，至終身而不變。

第二端 給資 工完日暮，然後家主有給資之令。示天主賞報，不在

此生，而在身後。吾主以一日比人一生，蓋以永遠論之，千年如一日。伯多祿後書三篇訓人勿嫌力作之久長也。傭人無論先至後至，皆獲一錢。因人之功德雖有淺深，福量雖有大小，然皆同一天堂，同享一天主，同滿心靈之樂。片時作苦者，與竟日辛勞者，獲資相若。蓋天主酬報吾人，不以年歲爲度量，而以誠懇爲權衡。人之熱心切意，可以補時日之短促也。念此諸理，多能裨我躬修。當深思之，咀味之，發

信德之情，倍我虔誠。庶幾失之東隅者，東隅言日出處猶可收之桑榆。桑榆言日沒處。

第三端 備怨 訕言之傭人，先得家主之僱，先勞於葡萄林者也。其所以訕言者，因其受資等於後至之傭，且因受資後於他傭，若被林主所簡忽也。諳於神修之學士，謂吾主於此，遺訓先進之人，而指示耆老易犯之過。如浮誇傲慢，忌嫉猜疑，自以爲應得格外之恩，客或有憤懣不平之氣。且或因身力之衰弱，而一任心靈之縱弛，諸類弊端皆是。我當以先事之明，修德之勤，預防斯禍。更宜如達味聖王恒求主佑曰：暮年，勿棄我。力憊時，勿舍我。聖咏七十章向在天聖父葡萄林主，求賜始終勤勞於主林，終不偷惰焉。祝言

三十日 心切救靈神火

定像 想見耶穌曰、汝等亦之子葡萄林。瑪竇二十篇

特求 求主賜我聖寵、能明救靈尊妙、以熱救靈之神火。

第一段 事在主前莫大於救靈。從來切願愛人、行救靈之功、到處傳揚聖教、務增信人之數者、卽廣天主神國於世也。教人信識眞主、同伸愛敬之忱者、卽合天主造物之向也。助人倚賴耶穌、仰受聖血之益者、卽襄吾主救世之功也。堅人愛主輕世之心、勵人好善惡惡之志者、卽佐聖神寵錫善靈之業也。故聖弟阿尼削曰、助人救靈、乃主工中最聖而神者也。我當謝主召我於斯地位、以救人靈魂爲事。平心而論、恒當愈顯主榮。倘或於所訓子弟、分長幼貧富、所駐堂宇、別大小高卑、所助病人、視貴賤智愚、此皆出自虛浮驕傲之心、多傷愛德之行。求主賜我能免諸弊、力行救靈之事、盡其所宜、更喜行人

所藐視之善工。

第二段 悅樂主心莫甚於救靈 一人之靈魂、在天主目中、珍於世間萬有。凡熱於神火者、不但欲光榮天主、且欲援斯靈、納於天域、以樂主心。細觀救世主一生事業、專爲救靈之故、而立嚴齋虔禱、含辛忍辱、受難被釘諸功。則知救靈之事、其悅樂主心爲何如矣。宗徒等洞明此理、故不避千辛萬苦、不辭跋涉之勞、不畏鼎鑊之刑、思有以拯救之。惟恐失此靈魂、而莫慰主心也。試問我之神火何在。我於吾主葡萄林中、効力之勤惰如何。自省之餘、能無愧悔否。當發愛主愛人之意、願甘受多勞、以救多靈。求賜聖教廣揚、并賜我能善行本分中愛人之事。

第三端 立功樹德莫盛於救靈 救靈之事、既最悅主心、自宜立功



最易而得酬最厚。達尼額爾先知曰：訓多人以義者，將如列宿，耀於無窮永世。十二篇雅各伯宗徒謂：人惟救一靈，已足動天主慈心。曰：挽一罪人於邪路者，救己靈魂於死，且掩己罪惡之多。五篇觀此，凡意在淑人之修院，其間人士，雖尚未躬行救靈之務，或朝夕講求，預備日後敷教之工，或多勞身力，惟盡瑪爾大之職分，或賢勞主事之後，因年老力衰，困守一椽，皆當有所歡慰，知所奮興。蓋一身之肢體，其用雖異，而其向實同。斯一會之人，其事雖殊，而其功亦同。向聖方濟各沙勿畧求其轉達上主，賜我一星神火，能效其忠貞慷慨，心切救靈。祝言

三十一日 諸聖瞻禮前日

定像 想見眾聖人聖女在天享無限光榮。

特求 求主賜我聖寵，得瞻禮前日當有之情。欲得其情，日中以下

列三端之義，着意縈懷。

第一端 諸聖之攻戰 聖人者，非生而爲聖，乃修而成聖，與吾儕無異。皆爲亞當之裔，皆有私欲之偏，皆有獲罪之危。其間多有爲七情纏擾，三仇阻厄，甚於吾儕者。然能忠勇直前，毅然力戰，願潔身而效死，不肯忤主以偷生。其信德之堅，愛德之純，無物可攻，無人可奪。我爲信友，有志於道，旣多救靈之法，又多修成之助。然不見肖似聖人者，非因戰事之不力，心志之愚懦乎。當知我欲繕靈希聖，苟不力戰，不克成功。主曰：天國格以力，而強者奪之。瑪竇十一篇求主增我神勇，定志力攻我首惡之偏。

第二端 諸聖之戰勝 聖人旣能力戰三仇，又能恒心用修身之助，

畢生不忘主訓。曰：至終有恒者，乃升。瑪竇十篇於是世俗之欺凌威逼、邪魔之凶橫狡猾、艱難之種種毒刑，雖本性甚柔，本身甚弱者，亦皆有以取勝，而克奏膚功。我之所缺者，非意願之美善，乃行善之忠恒。噫，若能悉行我初進時，及避靜內所有之善志，今豈不幾成大德者哉。然我自省，清晨所定之善志，未能行之於亭午，是則過之不見改，德之不見修也。今我自恨德業無恒，性情浮泛，而重新我志，思有以忠信篤行。

第三端 諸聖之光榮 諸聖之戰勝三仇，著其忠恒者，原爲事奉天主。而天主擢之天國，使知日前事奉之天主，卽目前享見之天主，實具無窮榮福之天主。其崇德報功之厚賜，雖盡舉人間福祿，莫可擬其絲毫。按信德之理，聖經之訓，天主所備愛己者之施報，從來目所

未覩耳所未聞、心思所未喻者也。致哥林多前書二篇我今思念諸聖在天之福、當覺心靈踴躍、偕保祿宗徒嘆今世之苦、不足準異日之榮。致羅馬人書八篇非惟不畏蒺藺前、且當如聖沙勿畧德肋撒等、渴慕世艱、證愛主之心。卽將日內之勤勞、奉獻於主。求本名聖人轉祈主佑、賜我剛毅忠恒、步其芳躅、卒能偕其共享天榮。祝言

卷十一 十一月

月省之思

預防猝死之義

見卷九三十日

首瞻禮六

聖心之慈憫

見卷五第二十八題

初一日

諸聖瞻禮

定像

想見諸聖在天享無窮真福。

特求

求主賜我聖寵，能略悟聖人在天之樂，而知奮勉則效。

第一端

天堂上毫無苦患。設有人自海外來曰：余嘗遊一福地，佳

勝非尋常可比。風和日麗，水秀山明。田不須耕，自生美穀。園不必種，自產名花。到處芳草如茵，綠陰成幄。紛五色以相映，閱四時而不凋。又有瓊宇玉樓，連雲蔽日。雕梁畫棟，錯綵鏤金。維彼居人，相安無事，不知忌嫉，不解爭凌，無寒暑疾病之災，無衰老死亡之患。聞是言者，

必將謂此特臆撰之虛境耳。然在地者固爲空談，在天者乃爲實事。聖若望論天堂曰：至此，則再無死亡，再無哭泣憂愁。默照經二十一篇蓋信德之理也。假令世間果有此福地，人必不畏艱阻，而思涉履其境矣。乃人於天堂，而偏不思趨赴也，不亦異乎。今我當歆慕天堂，而時深企望之情。

第二段 天堂上充滿福樂 天堂之福樂，卽享見天主性體，萬善萬美，無窮福樂之源。享此福者，其福最全。全於靈魂三司，記憶之專精，足包古今美備之事。知識之高遠，能超人世宏博之才。愛欲之充盈，克遂心性恬愉之願。且全於肉身五官，采色娛目，聲音悅耳，異香撲鼻，美味適口，徧體晶瑩。彷彿耶穌聖身。總之神形歡樂，無不極其全備，無不歸於中正，而無失節之虞。此本吾人當想望之福，乃多置之

不顧。偏依戀於卑陋塵寰，實堪憐憫。若能如保祿宗徒身遊天表，卽惟瞬息之間，嘗其神樂，豈不將移易我心，而厭斯世之溷濁哉。今賀享福無窮之聖人聖女，求彼扶掖我趨赴天路。

第三端 天堂上福樂無窮 天堂之尤足動人渴望者，乃福樂無窮盡之期。若以身心享福，千萬年終無變易，疑將厭足而見煩。當知此乃粗鄙之想，不識天主無窮之義。因天主爲無窮之天主，有無窮美麗，無窮可愛。神聖常得時新其福，而終無匱竭之憂。緣有限之神人，終不能畢享無限之天主也。我當透達斯理，自將奮發前修，效保祿宗徒曰：斯世之苦，不足準異日之榮。更將脫離世幻，恨不得早享天榮。偕達未聖王曰：予靈渴，惟活主，何時至，見天主臺前。聖咏四十一篇求聖母諸聖之后，增我信望愛諸德。賜我輕視世有，以願望天堂。

之志，證於實行。向諸聖祈求。 祝言

初二日 助救煉靈之緣故

追思已亡日

定像 想見多少靈魂在煉獄中，呼號救助。  
特求 求主賜我聖寵，有救煉靈之熱心。

第一端 爲天主之故 煉獄靈魂賴天主寵愛，與天主契合，甚於世間大聖。因再無失主聖寵之危，而天堂爲其所必得也。天主極愛斯靈，然因先有定命，罪債未清，無能享受天榮。惟在世信人爲之祈求，代行補贖，可減縮其煉苦日期，早升天堂享福。故煉靈升天之遲速，權由我操。而天主亦甚願我救助斯靈，我若怠忽於斯，卽我無意慰悅主心。今當復我矜恤斯靈之志，勤領大赦，讓之於彼。是亦救助煉靈，最爲利便之一法。當奇天主之義，罰惡之嚴，卽於其寵愛之靈，細



微愆忒，亦不稍含容。定志每晨望得日中可得之恩赦，以讓煉靈。  
第二端 爲煉靈之故 人宜急救煉靈，爲煉靈之故。一、因其苦甚猛，  
據聖多瑪斯等博學士云，世間諸苦及諸致命之刑，莫可與擬。且不知  
斯苦止於何時。故聖教准行週年之禮，不限年數。二、因煉靈無能  
自救，待助甚殷。三、救煉靈爲我愛主之本分。因煉靈爲吾主之肢體，  
救之卽如救吾主。經曰：我在囹圄，爾顧我。瑪竇二十五篇殆亦謂此  
也。四、因煉靈中，或爲親屬，或爲恩人，救之亦爲公義及恩情之責。噫，  
我若聞煉靈哀號啼泣，心胸恐將裂碎。今將此理，逐一思之，可知助  
救煉靈，爲增修愛德之功。多有善士，矢願以諸補贖之功，盡讓煉靈。  
教皇本篤第十三位准，凡立斯願者，一、司鐸每舉彌撒，可蒙全赦。如  
在特恩臺上行祭。二、信友每領聖體，或瞻禮二與祭祈求，亦得全赦。

三、凡恩赦本不可讓人者，亦得讓於煉靈。於是知救助煉靈，亦務之至美，功之至大者也。余靈，尙其有意於斯乎？求賜永安於已亡諸信者，主俯聽我等。

第三端 爲我人之故 援救亡靈，雖爲愛人至重之責，實爲愛己至要之功。生前死後，獲益良多。一、畏天主公義之嚴，自深恨罪之心，而勤於補過。二、拯救煉靈於獄，卽增己友朋及主保於天。三、死後亦將多蒙主惠。經曰：哀矜者乃真福，爲其將蒙哀矜。瑪竇五篇由是思之，願獻我今日與祭領主之功，及諸恩赦，以救煉靈，又將細定我日後事宜，加何善功，行何補贖，以慰煉靈待救之心。仰賴耶穌聖心，求救煉靈。 祝言

初二日 恒憶死期之訓

定像 想見一修道者，臥床將死。

特求 求主賜我聖寵，俾思死候，而知急於善生。

第一端 死之奧妙 念亡者煉靈之苦，殊動人死候之思，庶幾先期預備，以裨益未亡之身靈。人之於死，最係平常，而其間實含奧妙。何則，蓋人皆知此生將有一死，神形之永遠禍福，俱繫於斯。故人事之至重且大者，莫如死。若以常情而論，人當殫心竭慮，以圖穩妥其事，安善其死。豈知事之忘於懷，淡於心者，亦莫如死。甚且大抵畏思死，忌言死，此係事之不可解，而我所謂奧妙者也。捫胸自問，何嘗月內一次經營其事，而自謂曰：今我若死，將有何望，將有何懼，或升或墮，究竟如何。苟得幸生，何修何改。恐每聞人死，竊自慰曰：我可無虞，力猶強，年猶壯。或曰：我年雖邁，然身力尙健。若是之思，豈非愚甚。所以

然者，多故之中，其一故爲最眞。因慎思死候之餘，必當遏制偏私，克我本性，改我前行，而我正以斯爲難。於是以死候之念，遠過於心，而安於自欺。思念及此，宜深愧悔。更毋忘聖多默更比之言曰：凡以死期常置目前，而日備之者，福人也。師主編一卷二十三章勉之慎之。

第二段 死之預備 人之有死，猶日之有暮。設想爾死時已至，身臥床褥，力匱神疲，命在呼吸，靈魂將離肉身，赴天主前聽審，有二者可以自問。一曰：方寸間有何事未安，何疑未釋，似爲難見主面。吁嗟予靈，今尙有時，可就正神師，可預籌身後大事，死候欲爲者，可及早圖之。二曰：平生言行，自擬何如。每有好善之徒，臨終時不勝悲愁，自慨曰：憐我一生，不務熱心，不知克己，未曾勤修實德。今見幾許怠忽，幾許欠缺，幾許過惡。噫，主若肯延我時日，假我數年，我將除舊更新，集

功豎德，異於曩日之行也。余靈爾或非此類之人乎。求主光照爾明，猛省己身，逆料其時，願何如敬主，何如行爾神業，又願何如待人，何如守職，何如忠行爾志願。更思所缺何德，天主欲爾何爲，行何祭獻，茲乃隨主寵光，嚴整爾修，復振爾心，可簡略書之，經聖母之手，獻於吾主。今主猶爲仁慈之主，未爲審判之主，尙可爲也。當體味聖母經語，并向聖母曰：天主聖母瑪利亞，爲我等罪人，今祈天主，及我等死候。祝言

### 初四日 二人同禱異功

定像 想見法利塞側目而聽耶穌。

特求 求主賜我聖寵，樂聞主訓，而忠心從之。

第一端 法利塞之祈禱 耶穌見人矜負厥義，輕視他人，因諭曰：向

有二人，偕登聖殿祈禱。其一法利塞，其一稅吏布俾加諾。法利塞昂立默念曰：謝主，俾我異若眾，眾或竊盜，或犯義，或奸淫。謝主，俾我異斯稅吏。我每一主日，齋二，收穫產，獻什一。路加十八篇凡人於方寸中，或染傲病，每不自知覺察。而其見惡於主，爲害已靈，殊非輕淺。吾主此諭，特訓人留意於斯弊病。或私擬人不如己，自爲賢於他人。或暗中竊喜己行之善，一切克苦之功，及所受之殊恩異寵。問我平素，能盡免於斯乎？有多大聖，每念及此，時深惕勵。而我不知戒慎，豈自愛之偏，在我者不若在彼之可愛乎？求主光照我明，灼見己心之隱微曲折，及一切驕矜之念。當向天主曰：主憐憫我，我尙無謙，無謙則無德。

第二端

稅吏之祈禱

稅吏遠離聖臺，弗敢仰視，惟拊膺曰：主，憐我

罪人。同上。吾主於此稅吏之行誼，示人祈禱之準繩。蓋其祈禱之所，以悅樂主心，增益己功者，爲其心志克謙也。謙於所居之地，身近殿門，不敢登進。謙於所著之形，鞠躬俯首，弗敢仰視。謙於所出之言，認己罪過，惟倚主慈，求主憐憫。吾人之祈禱，望主納受而得所求者，亦多賴謙遜之心。經曰：謙遜者之求，透達雲霄。辨德經三十五章今我求之，每不見諾者，庸非心無謙遜乎？求主賜佑，自認己弱，毫無所能。另於誦禱時，記憶身靈卑污，惟倚天主慈悲，望賜恩錫。

第三端 吾主之斷語 以常情而論，如德亞人見二人同進聖堂，禱主擬法利塞心深意遠，行祈禱高妙神功。若稅吏者，盤踞堂隅，不知所爲。卽曰誦經，亦不過諺所謂無心經而已。然天主視人心蘊，迥異人之意見。主曰：吾語汝，斯人斯人指稅吏也歸時，厥德義尤勝於彼。

彼指法利塞也。蓋自上必被黜，自下必受陟。同上故勸爾勿以外貌取人，亦勿求稱譽於他人。且勿以昆季景仰爾，或長上器重爾，而私心得意。寧思無錯悞者，乃天主判斷我者，亦天主。當誠求示我何事不愜伊心，何德我所宜修，而汲汲圖之。庶臨終時，獲多神慰也。聖嘉祿主教每日默想數晷，最勤祈禱神工，今日爲其瞻禮，求之轉達。

祝言

### 初五日 招富少年相從

定像 想見一般富少年，跪主前問道。

特求 求主賜我聖寵，忠應主召，日務修成。

第一端 少年問主 一日，耶穌訓眾時，有一富且貴之少年，趨跪主前，問曰：善哉吾師，吾何修可獲常生。瑪竇十九篇，瑪爾谷十篇，路加



十八篇。此少年遣人懿訓良多，恪恭於主，不恃勢位，虛心求教，切意救靈等，是也。其尤足爲我取法者，願知當行之善，當進之修。不問主避何罪，改何過，以救己靈，而問何修以獲常生，可謂知本矣。惜乎我人之行，每多反是。默想省察之間，只留心於一身過惡，思圖迴避，一若人生敬主，惟有畏避犯罪而已。不知當更上一層，清晨卽計將行何善，預籌一日之功行，將何如整治我修，精進於德，并求天主助佑。昏暮，謝主助我善行其事，而思來日更善其行。若是，則於道德之途，自能心曠神怡，時多進境。較之踽踽然，惟知畏罪戒惡者，不可同日語矣。求主輔我翼我，能循斯訓，而勉力行之。

第二端 主答少年 耶穌曰：欲入常生域，須守誠。少年曰：我自幼遵守，我尙何缺。耶穌流盼憐愛之曰：爾欲爲完人，往售諸有，施貧乏。將

得天上寶，可來從予。同上。吾主愛斯少年，而優待以至高之品詣。訓其以虛幻貨財，許多憂苦之資，易無窮珍寶，至真至純之福。以此世塵氛，易天堂榮國。少年若悟吾主法言，從吾主聖訓，福祉多矣。我今讚美天主，自慶得隨主後。定志當何如，忠於從主之途。

第三端 少年憂戚 少年聞吾主許以天上寶，宜其懽忻踴躍，捐世有而相從。乃事有大謬不然者。經紀其聞言感然，怏怏而去，因家資甚豐。瑪竇瑪爾谷路加同上。若欲知斯少年之究竟，或上升，或下墮，聖奧斯定謂其靈魂未必能救。非爲其不遵主訓，不從十誠外主語之言。實爲其志氣不剛，不知勝富利場中之誘惑。觀其去後，吾主有言曰，富人入天國難。是知聖師之語，良非無因。若其早能應主呼召，當可免於永禍。何乃繫戀貲財，未得脫然無累也，不亦哀哉。今我脫

去世俗牽纏、而身置修途者、實係天主殊恩異寵、宜盡我心力以圖報效。向耶穌虔祈。 祝言

### 初六日 辣匝祿臥病死

定像 想見有人以辣匝祿病告耶穌。

特求 求主賜我萬事能恃怙主仁、兼能順從主命、遏抑肉情。

第一端 有人報病 吾主顯無數聖跡、證己爲天主子。其命辣匝祿死而復生、亦爲諸跡中至無可疑者之一。蓋其地近日路撒稜京都、其人殷富尊榮。四日前都中紳耆、多往弔其門、送其殮葬。是以聖跡情形、尤爲昭人耳目。我且以事前之景、略思之。經紀辣匝祿臥病、厥姊妹遣人告耶穌曰、主、爾所愛者有疾。若望十一篇斯言之訓人者、有二、一身處憂患、宜迅速赴主、無待求人無效、而後思求主佑。二、欲

主納我所求，不必煩言冗語。惟曰：主，爾所愛者有疾。言雖簡短，意味深長。聖奧斯定謂此語，乃善禱之式。吾可向主曰：主，爾所愛者，至今受爾恩愛，有加無已。今茲有疾，神形多苦，望爾憫憐。且可以斯語，屢誦於拜聖體時。

第二端 耶穌回音 耶穌謂使者曰：斯疾不致死。即永離人世也。惟爲天主光榮，俾天主子於斯顯揚。後謂其徒曰：子友辣匝祿寢寐。同上故聞吾主言者，皆意辣匝祿無不測之虞。豈知沉疴莫挽，不幾時已長逝矣。因情論事，姊妹二人早通音問，盡其惻誠，望主賜以安全。今見事已至此，未免動搖其信，而生憤慍之心。然仍無怨無尤，悔已求之不力，不能速主親臨，免兄一死。互謂曰：主若在此，兄當不死。若望十一篇 閱聖經所紀，觀二人之行，其信德之誠，倚望之深，固未嘗

少有損減也。我有時不得所求，或所得者反於所求。試問當時能不灰心敗志，隱憾徒然禱主乎？抑能安心聽命，翕合主旨乎？我當常謂吾主曰：願天主至義至上至愛之旨，且承行，且頌揚於無窮世。此經可得一百日大赦，特於憂苦時，虔誦此經。

### 第三端

耶穌遲緩 聖若望紀曰：耶穌慈愛瑪爾大暨瑪利亞暨辣匝祿。同上雖愛伊人，然欲賜以逾格殊恩，先加之以艱窘，試之以巨患。任辣匝祿死，使姊妹悲傷。故既聞友人臥病，仍留其地者二日。途中載宿載信，及其至，病人死已四日。同上今天主待其所愛之人，未嘗異是。有時若拒其祈求，增其辛苦，磨其心志。所以然者，正欲增其功，煉其德，而一旦愈顯已聖愛之奇也。故我若身逢斯境，當益壯我心，益堅我志，益純我倚主聽命之誠。庶德愈磨，而愈耀其光也。向吾

主祈求。 祝言

初七日 三次預言受難

連下三日之默想，係耶穌往白

大尼亞途中事。

定像 想見吾主偕宗徒同行，與之言受難事。

特求 求主賜我聖寵，俾時憶吾主苦難，而多蒙神益。

第一端 吾主明言苦難。耶穌自若爾當河，往白大尼亞辣匝祿第途中事跡，多足貽人神訓。其間一爲與徒復言已將受難，且以受難情形，語之尤詳。曰：適上日路撒稜，人子將付於司教暨明經士暨老長者。渠等決以死。又付異教人，且侮且唾且鞭且殺。惟第三日復活。瑪爾谷十篇，路加十八篇。吾主屢以已苦難告人者，因常以此事縈懷。而尤於此事，顯其至愛於人也。嘗曰：口所言，出於心所盈。瑪竇十

二篇則聆其言者，不從可想其心乎。我若欲還愛耶穌，慰其聖心，獲其神錫，宜時念其爲我所受之苦，樂與人論其所歷之艱。且於與崇拜主時，恒頌其甘心被難釘死之功。發信望愛慕感激之情，自願多受艱辛，以報主愛。定志告解領主時，思主苦難，以助痛悔之誠。

### 第二端

宗徒弗達主言

吾主言已將受難釘死，至明至顯。乃聖史

紀徒等弗達斯言，若隱於彼，而不知所謂。

路加十八篇

且亦有弗主

言者，如瑪竇紀伯多祿曰：無此事哉。主弗罹斯禍。

十六篇

蓋徒等擬

吾主爲救世主，宜將大顯榮光於世。今聞其死若是慘酷，眞爲事所不解。其成見之偏，致昧於主旨，有如是者。天下無論尊卑貧富，拘於成見，窄於識量，則不明正教之理，或互與爲仇，或不識修士之行，多誹謗之言，亦古今所同慨。觀諸徒之偏見，殊可原諒乎斯人。且我每

有事、未嘗身試。而曰、不能服斯勞、不能居斯職、不能少斯物件、行斯善工。此非執於偏見使然乎。若能剛毅勇果、行見向之所謂不能者、當不啻駕輕就熟矣。求主賜我思議他人、心存忠厚。行事間、不惑於意見之偏。

第三端 吾主預言之向 吾主明識徒等錮於成見、不悟其受難釘死之奧。而又諄諄語之者、可揭其三故。一、免徒疑怪、使伊等他日既見其苦難情形、一如今日所預言。則知其受斯苦難、實出自愛人至極之情。二、提振諸徒慷慨忠盡之意、以報涓埃。三、欲諸徒明悉其所許天堂榮位、乃爲謙卑苦辱之酬。我當務思吾主苦難、獲此神益、庶不負吾主疊疊訓誥之深心。是幸。向耶穌爲我安心受死者、求賜明達吾主苦難之言。 祝言



初八日 二徒求尊獲訓

定像 想見若望暨雅各伯二徒偕其母跪主前求恩。  
特求 求主賜我謙遜之心。

第一端 二徒謬妄之求 耶穌往白大尼亞途中言已將受難死而復活。雅各伯若望昆仲二人與其母造主曰師願賜予輩所求曰奚欲我爲於爾曰賜予輩於爾榮福一坐爾右一坐爾左。瑪爾谷十篇瑪竇二十篇若是之求且求於吾主預言苦難之後殊見其粗鹵無知且主嘗許十二徒異日坐高座將判義撒爾十二支其榮已甚大。今昆仲二人本爲漁夫猶以斯榮爲未足而求最崇之位可知高傲之偏入人骨髓不論知愚賢否均所難免世間紛爭攘奪皆肇於斯卽爲隨從主後有志撝謙甘貧克己者時亦有好名干位之思我

當何如戒慎警惕哉。求耶穌聖心賜我效法其謙。屢省我言行，有無驕矜之氣。倘或受人挫抑，宜遏制憤慍之心。

第二段 吾主回示二徒 主黜二徒傲心，曰：爾等弗識攸求，不知默西亞國不在此世。不知欲得爾所求，先當多受苦楚。欲偕予同榮，必先偕予同苦同辱。爾克飲予將飲之爵乎。賴予寵佑，異日固飲。惟與汝左右座，罔係予。予父備斯位，而與之者，自有其人。同上自吾主之言觀之，可知諸凡祈求，若非切實於獲享天主，救護己靈者，可無存必得之心。蓋我多有弗識所求，多有自謂關係救靈榮主者，而天主不以爲然。宜求天主賜我聖寵，能以天主之意爲意。凡行祈禱，方寸間隱謂主曰：倘此事悅樂主心，裨益予靈。祈主俯聽我等。

第三端 吾主訓迪二徒 十徒聞兄弟二人之求，憾之。耶穌召之曰：

爾輩知世之侯王，鎮攝其民。又爲上者權制屬人，汝輩則不然。汝輩中欲爲大者，可爲爾僕。又汝等中欲爲首者，可爲爾役。如人子來，非役人，乃役於人。捨命以救多衆。瑪竇二十篇我可細味斯言，謹從斯訓。深省我平素之行，如何離合。自擬日後，當何以依我聖召，專務修成。何以遵主教誨，法其謙卑。今日爲諸聖第八日瞻禮，向素所仰賴之聖人，恃怙之主保祈求。 祝言

### 初九日 日里各啟誓人

定像 想見耶穌行至日里各城，有誓人乞憐。

特求 求主賜我寵佑，善行祈禱。

第一端 誓人之乞憐 若爾當河與白大尼亞間，有城名日里各，耶穌經其地。有誓人坐道畔，乞食，聞從者謹譁，問爲何。答曰：耶穌納匝

助諸行過。大號曰。耶穌達未子。垂憐我。前行者止勿喧。渠聲愈高。曰。達未子。垂憐我。路加十八篇此誓人之求主。可爲善矣。而可爲我取法者有三。一、求之以時。甫聞吾主將行過。知爲可獲主錫之機。卽呼號耶穌。後果蒙主憐憫。而得其聖跡奇恩。若其濡滯疎慵。恐終無開矇之福。我因懈玩。而失主多賚。良可惜也。二、求之懇切。覺已目瞽之苦。乃大聲呼救。我之求也。委靡無力。豈非己身之困乏。不知覺察乎。三、求之堅恒。耶穌雖若置罔聞。眾人又禁阻。乃再三呼號。不知中止。我苟亦能恒心求主。必將見諾。而多獲祈禱之效矣。偕宗徒向主曰。求主訓我祈禱。路加十一篇該省我於祈禱中所有之失。而修改之。第二端 命引瞽人至 吾主聞瞽人號呼。心深憫惻。其初若不之理。而遲施其惠者。所以試瞽人之信心。與怙恃之情也。旣而主止步。乃

命引瞽人來前。問何欲。曰。主。錫我獲見。路加十八篇天主有時不卽納我祈求。亦爲裨益我靈。且欲我如瞽人之自言己苦。而告以所需之急。非主不知我困。實欲我明識主爲諸恩之主。亦欲倍切我恃怙之誠。益增我祈禱之虔也。思及於此。知吾主愛人之深衷。固難度量。偕瞽人向主曰。賜我獲見。能明主旨。得知神業。定志於形神諸困。深恃主仁。誠求主惠。如孝子於慈父母然。

第三端 許瞽人得視 耶穌曰。見。爾信救爾。瞽應命立見。乃從乃揚主恩。眾亦咸丕揚。同上瞽人已得所求。其信其恒。均已獲報。然吾主之仁。不惟啟其矇。錫其視。且開其心目。賜以聖寵。使入救靈之路。於是揚主之恩。頌主之德。認主爲天主所許之默西亞。而隨從其後。百姓既見其事。既聞其言。卽同聲揚主。口碑載道矣。今我所受主恩。較

瞽人所受、尤多且大、當偕瞽人欽崇讚美感謝天主、并效瞽人德表、明目以見主、健步以從主、熱心以揚主、燃救靈神火、助人信識光榮天主、向救世主求賜寵佑。祝言

初十日 撒格散財向化

定像 想見吾主舍撒格家。

特求 求主變化我心、如當時變化撒格。

第一端 撒格欲見吾主 主啟瞽目、聲聞速布、迄日里各人皆稱譽、宛有奏凱之榮。然吾主之榮、不若前此千六百年、若蘇厄進斯城之耀其威武、而允爲救世主經其地、施人神化也。其歸化者中、聖史特紀其一、以垂訓我人。謂吾主近日里各行際、有稅吏長名撒格者甚殷富、欲覩耶穌爲何人。因行人稠沓、厥體侏儒。侏儒、矮短也。弗獲見。

趨升桑樹，俟主過而望之。路加十九篇欲近視一多行靈異之奇人，  
此固人之常情。然撒格之願見耶穌，據解經者云，爲天主寵光之效。  
因其心切見主，猱升樹上，不惜人嘲，乃得主賜以意外之恩。我苟敏  
速剛恒，隨從主寵，不將亦多蒙賚錫哉。悔我怠忽之非，當務留心於  
主寵之啟佑。

第二段 耶穌舍撒格家 耶穌至，瞻視之，曰，撒格速下，今日我當舍  
爾家。同上撒格聞之，中心慶幸，不可勝言。意其一面遣人先往家中，  
謂耶穌將至，囑家人善爲整備。已則偕主同返，禮意優隆，概可想見。  
然經文簡略，惟曰伊亟下，欣喜迎歸。同上吾主於聖體內，有意臨格  
人心。而善靈每若不免殷憂，神情惶恐，甚非所宜。當如撒格，既知主  
將來貺，心寬神悅，惟望速卽降臨，以慰素願。而虔誠怙恃，潔修預備

之行。求主赦我領主時所獲之過。領主前，清晨初醒，可思主語曰：速下，今日我當舍爾家。

第三端 撒格歸聖化 撒格留主於家，獲多神恩聖寵。身爲稅吏，國人皆賤爲罪人者，不轉瞬間，已爲義人，將臻聖域矣。按教宗聖格來孟德云，撒格日後師事聖伯多祿，授則撒勒亞府主教，觀其當日言行，自可恍然。其謂主曰，願以家貲之半，施濟貧乏，倘有非義取人者，償以四倍。耶穌曰，今日救此一家，蓋人子來覓救敗亡者焉。同上我當效撒格之慷慨，將我善心美意，速卽力行。前日言行不善，驕矜輕躁，干犯他人，當以嘉言懿行，加倍補之。庶不負主顧問之恩，而善用其救贖之功。謝主屢降我心，多加厚惠。求救世主益我愛火，報主愛情。既不能愛之適如所宜，定不欲辜主愛德，負主聖心。祝言



十一日 呼辣匝祿復活

定像 想見辣匝祿應主喚而出墓。

特求 求主賜我信肉身之復活，厥信更能活潑。

第一端 瑪爾大迓主 耶穌至白大尼亞，辣匝祿死已四日。瑪爾大聞耶穌至，趨迓，謂之曰：主若在此，兄當不死。耶穌曰：爾兄將復活。瑪爾大曰：予知末日眾人復活，伊亦然復活。耶穌曰：予爲復活，並爲生命。人信予，雖已亡得活，凡活而信予，永不死。爾庸信是。曰：主，予固信爾爲基利斯督，活天子降世。若望十一篇我於此如見吾主亦然。謂我曰：爾庸信是。可乘機堅我信心，知肉身將來復活，而發信德望德之情。且信德愈活，則行苦刻祭獻之工，愈能果勇。當振奮我心，甘受艱苦。思此身爲敬主救人，愈多勞悴，則異日復活時，愈麗愈榮。愈

多福樂。

第二段 瑪利亞見主 瑪爾大潛告瑪利亞曰、師至、召爾。伊聞、卽起以行。如德亞人在室弔慰者隨之、言其往墓哭焉。瑪利亞赴耶穌、見而伏其足下。曰、主若在此、兄當不死。耶穌見彼哀、且見偕伊來之如德亞人哭聲悽愴、自動哀心。問曰、爾曹置伊何地。曰、請主來視。時耶穌亦墮淚。如德亞人曰、何其愛彼之深。亦有曰、斯人敢胎瞽目、弗能令之不死。耶穌詣墓、復深愍惻。墓乃岩洞、有石掩閉。同上於此一事、殊多聖訓、茲惟揭其三。一、瑪利亞二聞主至、卽起而行、離弔慰諸人、求慰於耶穌足下。訓我與其受慰於人、不如求慰於主。蓋主爲敬畏者之大慰也。二、吾主見姊妹二人嗚咽、不禁潛然泣下。以示親朋悲感、我當分其愁苦、與之同憂。三、主憐姊妹兩人之痛、思活其兄以慰

之。我亦可取法於斯。雖不能活人之死。亦不能復人所失之財。然能救人靈魂永命。復人聖寵之資。以獲天堂之產。何不動此仁心。行此善事乎。體主心之善。而知所感勉焉。

第三端 辣匝祿復活 耶穌曰。移石去。瑪爾大曰。臭矣。蓋四日於茲矣。耶穌曰。予豈未云於爾。倘爾信。將覩天主榮光。眾移去石。耶穌舉目曰。父。予謝爾。因爾允予求。予知爾常允予。予斯言。爲茲環圍黎庶。欲伊信爾。實遣予。言竟。巨聲呼曰。辣匝祿出。死者卽出。同上。吾主行斯奇跡。不特爲救辣匝祿一人。實爲救當時之眾。及後世庶民。欲人知其至能至善。思愛慕之。而師法之也。我宜讚揚主能。稱頌主慈。偕瑪爾大與瑪利亞向主申謝。祝言

## 十二日 國人議殺耶穌

定像 想見如德亞人聚集一處，議殺害耶穌。  
特求 求主倍益我愛主之熱誠，事主之慷慨。

第一端 主仇忌嫉 聖若望紀如德亞人見耶穌奇行，復活辣匝祿，多投誠信服。間有人往法利塞，告耶穌攸行。司教暨法利塞聞之，一如災害臨身，不勝驚駭。會議曰：我輩奈何？斯人多行奇跡。若姑任之，人皆信從。若望十一篇司教等忌嫉之偏，形於言語。究其故，因主多行奇跡，責其積弊。於是傲惡恚恨之心，無能遏抑，而思置救世主於死地。古來德望優隆者，因疏於戒慎，每陷巨惡，貽累無窮，皆此司教之類也。我今撫躬猛省，恐每因一欲之偏，大會諸情之議，而圖害吾主，召禍身靈者，亦不知凡幾。深心痛恨，思何者爲爾之首惡，宜速急除之。

第二端 主仇飾辭 凡人錮於私欲，必羞露本來面目，往往借辭以文飾。故司教暨法利塞互謂曰：若姑任之，人皆信從，奉之爲默西亞尊之爲國王，羅瑪人將來滅我城邑，殄我國民，奈何。同上世有人與主爲仇，嫌惡聖教，本出自妬忌之心，而文其言曰：爲國家之利，斯民之福。云云。若是者，固屬堪憐。然教會中人，以德行之外貌，飾其嗜欲之偏，尤可慨焉。吝嗇而謂之節儉，紛爭而謂之義憤，私愛而謂之仁德，饕餮而謂之保身，忿恨而謂之神火。此類之弊，指不勝屈。求主照我明，正我心，再勿自欺，而加意勤修。

第三端 主仇決策 卒乃彼之禍心，不能久藏。其中有當年主教事者，名蓋法，宣言曰：爾輩不知所以，亦不思一人死，以免舉國亡，實爲爾益。斯言也，非伊自吐，緣是年伊爲掌教，天主啟之，預言耶穌宜死。

爲國民，且不惟爲國民，亦以天主子散處者聚於一。此後眾皆思殺耶穌。同上蓋法位居教首，行雖乖戾，而言合主旨。以是知司鐸施行聖事，不以其德，而以其權。凡領聖事者，總可必得其神效，而致益身靈。如德亞人自有此議，日以殺主爲事。世有多人亦類此者，自閱某書，心神放蕩，志氣浮囂。自遊某地，傲僻忤人，變詐險惡。自偏某念，性情頗異，舉止都非，德業一概荒疏，惟圖逞其私願。噫，交人接物，時多獲罪之機，可不深其戒慎哉。今宜謙恭寅畏，求主賜佑。 祝言

### 十三日 耶穌退居厄弗稜城

定像 想見吾主與宗徒靜居曠野。

特求 求主賜我聖寵，深明避靜之關係，務使不失其神益。

第一端 避靜神工之向 耶穌知國人謀欲殺已，不復顯行於如德

亞人間。往近曠野地，有城名厄弗稜，偕門徒居焉。若望十一篇吾主受難前約半月，往隱僻處，淹留數日，示人避靜之要也。我每年行此神工，若能行之盡善，則不第爲終歲之益，且亦爲終身之利。今可以避靜之向，先思之一。屏離一切外務，誠心專習神業，求明於認識自己，而復整躬修。二。補已往之失，因在天主前，年內多抱咎故也。三。自定日後修規，圖熱心於悠久。夫居常神業之工，原足以持我愛主之心，增我熱中之火。奈因習慣行之，每若徒循故事，而心靈常覺冷淡。故人行避靜，亦所以專精神業，庶恒能善行於將來也。觀此，可知避靜之關係，重而且大，行之不可草率。求天主宥我前過，賜我恒存避靜中之熱誠。見避靜時去之愈遠，愈當思保存其神益。

第二段 善行避靜之法 一。思一年內，爲人勞悴，今盡數日之時，專

務自修，於理實爲至當。又思天主於無始之際，早有意於斯避靜，加我逾格神恩。且我身靈之救，及終前之備，諒皆有繫於此。二、奮發己心，剛強己志，切願善行其工，望主賜我聖工神益。三、勤行祈禱，加以苦刻善工。仰懇聖母轉達，庶蒙天主寵恩。且人宜用斯法，而善行其工，其責甚大。蓋避靜之恩，異恩也。審判日，天主將問爾何如受之地獄中多少靈魂，苟得此恩，今日已成賢聖。況我有淑人之職，恐多有人靈之助救，賴我避靜內所熾之神火，可不忠勤虔恪乎。誠心想望，倍切祈求，行避靜及行平日善工，宛如臨終末務。

第三端 保存避靜之益 欲保存避靜時所有之熱心，而不失其神益。一、宜於未出靜先，畧記平素之行爲。在天主前，何病宜除。他人前，何過宜改。且審記何以事主，何以修己，何以待人，及一切內外當務。



之急。二、宜以此諸端、陸續爲私省之目、并月內屢以此爲默想之端。三、每月宜定期收歛己心、詳究修省諸工、行之何若。德業之途、有無進境。此乃保守避靜神益之良法。我嘗每年避靜、果依此法、恒心行之乎。悔已往之虧缺、自勉於將來。夫耶穌退居一事、粗觀之、若無關緊要。細味之、則知終身平日之行、多有賴焉。向退藏之耶穌、求賜熱愛避靜神工。祝言

#### 十四日 恆禱勿輟之諭

定像 想見耶穌語眾曰、宜恆禱勿輟。路加十八篇  
特求 求主賜我聖寵、恆得承行斯訓。

第一端 恆禱之緣故及法式 經紀吾主訓人當行之事、鮮有如訓人所禱之勤懇、甚至勸人恆於祈禱。吾人所以宜恆禱者、因恆居困

乏、恒需主寵。欲力攻勝敵、忠全職守、不忝爲天主之忠臣孝子、非祈禱不爲功。故吾主亦曰、求則得。瑪竇七篇猶言多求則多得、少求則少得、不求則不得。至論恒禱之式、行法頗多、其最容易者、習念一二經句、得以隨地隨時。心維口誦、是亦一道。傳記大德士名類斯、姓琿德者、習向主曰、天主、我行諸事、無不爲爾。故其心靈與主締交、恒行禱主之工。爾將或曰、我靈恒能契主、勝誘居艱、必多神勇。立功修德、必多前進。固我心之願、我身之福。須知此福在爾掌握、爾旣願之、可自取之。惟宜效法前聖前賢之勤勉耳。求主加我心力、自擬當有何爲、習誦何經、以符主訓。

第二段 祈禱中輟極宜防閑 吾主旣言宜恒禱、又云勿輟。且取譬以語衆曰、郡有聽斷官、上不畏主、下不禮人。在城有嫠婦、往請雪厥

讐冤。彼久不理。旣而自念曰。我雖不畏主。亦不禮人。然此婦頻煩。可雪其冤。以免恒聒我耳。主曰。爾聽此不義官之所言。知天主簡越者之日夜哀號。而彼任其負屈哉。路加十八篇此吾主以淺喻深。令人知恒求不輟。必可蒙主垂憐也。乃吾人每遇困急。虔誠求主。及不得所求。而中途停輟者。比比皆然。不知主卽不遽允我求。不可敗我誠求之志。若此孀婦。亦如是憚煩。恐終不得上官之雪其冤獄矣。且人之不恒於祈求者。每以爲卑陋罪人。難望得主允諾。不知人宜祈求。適爲其有罪過。若以罪過而疑畏主慈。則丐者宜以己貧乏。而不敢乞援於富者之門矣。豈通論乎。依聖教之理。祈求爲主恩之鑰。人苟謙心求主。無求不得。主言求則得。不分聖賢凡俗。卽有時若不允所求。實則賜人別項恩寵。愈爲奇珍。而人未之知覺耳。吾主旣訓人以

言、又訓人以行、往往徹夜求主。路加六篇求賜我師法主表、遵行主訓。祝言

### 十五日 瑪利亞以香液沃吾主之首

定像 想見瑪利亞、瑪達勒納以珍藏香液、沃耶穌首。  
特求 求主賜我聖寵、俾能如瑪達勒納之愛慕耶穌。

第一端 瑪利亞之行事 前瑪達勒納泣悔己罪、曾以香液沃吾主於席間。今主將受難、前六日、館於癩者西滿之室。晚餐時、伊又持精貴之香液一觔、溢吾主之首、香馥滿堂。又注吾主之足、拭以己髮。若望十二篇、瑪竇二十六篇、夫髮與香液、原係浮幻之物、昔瑪達勒納以之飾身。今不惜用以敬主、殊見其遷改之誠、感主之惻。我當法其懿行、隨機表我知恩感德之心。隨地品端行粹、吐令德之馨香、如保

祿宗徒所謂成基利斯督之芬芳也。致哥林多人前書二篇且香液沃主足，亦言德詣感悅他人，而恩澤加於艱困之人。問我向日之行爲何若。求主赦我鄙吝，將前日獲罪之物，祭獻於主，以表忠誠。

第二端 茹答之言行 茹答心貪香液之值，見瑪達勒納如是慷慨，

不禁悻悻然語人曰：此液曷弗售三十金，以濟貧乏。是其貪婪之志，假愛德之名以自掩。聖史謂其所以言此，注意不在貧乏。蓋司橐人所獻而已，實盜之也。若望十二篇於此動人深思者，在茹答爲不良已甚，身爲宗徒，而言詭行貪，妄訾人榮主之功。在吾主，爲至極溫良，雖知其狡詐，而仍迴護其名，不加譴責於人前，惟微言規訓。深嘉瑪達勒納行詣曰：曷累此婦，其於我行美功，先傳我軀，行葬我禮也。我實語爾，此福音傳普世，亦將述其行，而念其人。瑪爾谷十四篇今我

當賀瑪達勒納得此褒榮。求其轉達，賜我法其愛主之忠誠，事主之慷慨，并效法吾主勿傷人面目於眾前。

第三端 眾人之行止 聖若望紀如德亞人聞耶穌在白大尼亞多趨視之。十二篇此如德亞眾，可分四等。有知耶穌復活辣匝祿事，得主寵照，知其爲救世主而往見之，並賀辣匝祿復生之福。亦有惟喜聽新聞，惟願見一異行之人，更欲見一死而復活之人。更有自行其好，不知覺察，且若不屑究主奇行，不思置身救靈之路。卒有與主爲仇，如聖史曰：撒責首等，思欲兼殺辣匝祿。夫聖教顯榮之遇，與此聖經所載，千古一轍。良善人得其感化，熱心輩得其安慰，梗戾之徒深其忿恨，更有多人，若無知無識，執迷於嗜欲之偏，貨財之幻，父書徒讀，不解變通。我若憐惜斯迷妄之人，可益我神火，并求主普化之。

祝言

# 十六日 耶穌榮進都城

定像 想見吾主騎驢入城，眾人歡呼迎接。  
特求 求主賜愛耶穌之火，灼熱我心。

第一端 耶穌預備入都 耶穌赴宴之明日，即今聖枝瞻禮，往日路撒稜近白法熱在阿里瓦山麓，命二徒曰：前有村，爾至彼，遇羈轡老牝小牡二驢，解送於予。如或禁，謂之曰：主有用，人即許。瑪竇二十一篇在斯一事，有多超奇之跡。一、吾主之上智也。視遠物一如近物。二、吾主之大權也。萬物皆爲彼有，聽彼處置。三、二徒之順命也。承斯疑難之命，毫不推辭。四、村人之爽直也。聞主欲用其驢，任徒牽解。然我不惟宜奇之而已，更有當務者三：一、自投主懷，任其制治。知其愛我。

無比。凡事裨益予靈者，無不明，亦無不欲。二、獻我諸有，盡我身力才學，以供主用。三、懷遵主旨。如逢長命，雖不知其義，似覺爲難，據信德而行，自見成功。求主賜我聖寵，使我立身行事，不違此訓。

第二段 耶穌榮進都城 當吾主入城時，人歡迎景況，殊足動人凝思，而感發心情。吾主跨駒前往，旣形儼儼氣象，又見溫溫雅度。眾目注之，又心嚮往之。念其三年中，多行奇跡，洪施德澤，感戴之忱，烏能已已。於是城市與鄉間，不約齊來，迎其入都。或解披衣鋪地，或上樹折枝墊路，或前行，或隨後。咸舉聲曰：天主降榮，下福於達末之子。王因主名來，爲殊福。和平自天，光榮於至上者。瑪竇二十一篇，若望十九篇。凡我行愛人之業，有時受人稱賀，頌爲有才有德之人，當不忘歸榮於主。且慎勿以美譽動心。須知今日懽忻歌舞，五日後大呼釘



殺人事無常，往往而然。但因時論事，國人是日之熱心，良足爲吾人取法。夫熱心成於三事：心也，口也，手也。心以愛主，口以頌主，手行善以榮主。都人士兼備之。我今後切願有熱心之實，廣揚主名之榮，行事屢務誠正我心。

第三端 先知預言之驗 吾主此次榮進都城，用驗先知匝加利亞預言曰：慈善爾王，乘牝驢暨厥小駒，而來視汝。當時明經士，豈有不知其理，乃迷於傲惡，錮於妒忌，私相告曰：爾見吾儕所爲，分毫無益，遍天下咸將附伊。若望十二篇且向吾主曰：師，禁諸弟子。耶穌曰：予語汝，斯人若默，頑石將鳴。路加十九篇斯言固然，他日羣徒畏避，無敢作聲時。乃石自碎，墓自闢，而感憤吾主之死。夫耶穌，吾王也，出征討逆，別無武備。惟以慈善之利器，攻魔力之凶頑，勝人心之傲惡，使

人披肝瀝胆，踴躍相從。余靈，啟爾心門，使榮福之王可進。聖咏二十三篇 向慈善之王，感頌其恩，服從其化。祝言

### 十七日 耶穌望城涕泣

定像 想見吾主行近城郭，揮淚咨嗟。

特求 求主賜我聖寵，俾永免斯城之責。

第一端 主哭都人不信 時民眾歡聲震野，迎主入城。聖史記耶穌

幾迨國都，望城涕泣。

路加十九篇

吾主當身受榮顯之時，忽而潛然

墮淚。此非思他日慘死，而爲之愛心也。蓋其死也，實出自心甘情願。

其渴望此死，已非一日。嘗曰：予有洗宜受，血宜傾流，方厥事成。予

悵奚似。

十二篇

是其所以悽惻含悲者，實憐斯民惑於異端。心目瞽

盲，不肯回頭。又憐彼將見絕於主，而受不忠之罰。故曰嗟，若爾今日

亦知事有係於爾平哉。今烏知攸隱於爾目哉。十九篇觀吾主斯泣，知多遺訓吾人。一、勿戚戚於一身暫苦，須惴惴於羣靈永禍。常行苦刻，哀求天主。獻我善工，望賜斯人遷改。如吾主既爲城民哀泣，又繼以救贖諸苦。二、宜時存慘悔謙抑之心。勿以一時順適，而浮游我志。三、謹防不忠之失。勿致辜負主恩，以貽後悔。古來大德聖賢，多驚惕於此。我何獨不知戒慎乎。自愧身靈多罪，每致吾主心愛。時宜求主赦免。定志此後於敬主救靈之事。分外虔誠，以慰聖心之悲痛。

第二段 主哭都城將毀 吾主愛惜日路撒稜甚於他邑，因斯城係聖父選爲己民之京都。時宇宙間，惟有斯城建華堂寶殿，欽崇眞主。以故經內每以聖城或天主城稱之。今因斯民無德，不久將見傾毀。吾主不得不傷心隕涕。因曰：定期且至，乃敵四面立壘，攻圍逼爾。

將悉崩、爾子悉滅。城頽屋傾、其石悉散、無相帖合。緣爾弗識天主降顧之時。路加十九篇吾主此言、雖本出於悲惻之心、實亦由於仁愛之情。蓋時人聞其語、相傳弗替、俾後人見其事、而畏主嚴威、回心悔改。後踰三十八年、此城果爲羅瑪重兵圍攻、饑餓之苦、慘不可言、未乃殄其民、滅其邑。吾主預言、絲毫不爽。吁嗟余靈、當知此城傾頽、卽爾所獲重罪之像也。爾日前領洗、所有天堂名分、所得天主恩寵、何等珍重、何等輝煌。平時修德立功、亦多心志和平、神靈美富。比一獲重罪、旋皆化爲烏有。有信德者、能不爲泣涕乎、恐吾靈之城、亦嘗遭此巨禍。謝主賜我克有重修之幸、深感吾主無限仁恩。痛世人沉迷不醒、憐吾主憂戚彌殷。今爲諸辜負主寵者、懇懃懇摯而求。祝言

十八日 都城罰樹警人

定像 想見吾主指無花果樹曰。汝後永不結實。

特求 求主賜我聖寵。恒結常生之實。

第一端 耶穌飢餓 耶穌清晨回城。有飢意。瑪竇二十一篇。吾主傳教三年。每藉哀矜餬口。其間飢腹不充。何止一日。然聖史特於此記之者。一。訓人凡有救靈榮主之務。須奮勉前行。勿因事涉劬勞。或食用不便。而半途意餒。二。訓人當知耶穌盼救群靈。甚於飢者求食。渴者求飲。不可不修德立功。使主有飢不得食。渴不得飲之苦痛。三。訓人切勿惟貪口腹。講求世味。一任神糧匱乏。當常領性命之糧。務使神魂飽飫。雖肉身稍有饑餓。無庸汲汲以圖。今我反身自省。果能遵飢餓乃真福。饜飫爲永禍之訓乎。求主佑助。使我時念主訓曰。人生匪獨繫於飲食。而思奮勉於將來。

第二段 耶穌覓果 遙見無花果樹，葉頗茂，往覓取。既近，翠葉外，罔獲一實，緣無花果期未至。瑪爾谷十一篇果期未至，而主欲摘取，可知其意不在樹，而在人。蓋欲借樹以喻人也。人有似樹之茂盛可觀，翠葉叢叢，而不結實者。一、爲如德亞人，只重教禮外規，及經典文辭，至於實德，則未之能修。二、爲冷淡信友，有奉教之名，教中規制，與經言要理，亦甚明悉。至於敬主愛人克己，諸實在善功，則皆茫然不知。三、爲一種修德者，語言行止，尙似道學中人。至於神業工夫，精修實際，一概徒循故事，心意慵疎。以上各弊，皆吾主當日所見不結實之樹也。捫胸自省，當深自儆戒。求主宥我怠心之過，不至有名無實。

第三端 罰樹警人 主謂樹曰：汝後永不結實。樹立稿。門徒見之，驚愕曰：何遂稿。瑪竇二十一篇噫，樹木無靈，何罪可罰，而吾主竟罰之。

此正借以警人也。蓋天主於人，既望其爲善結實，乃竟絕無可取。一旦吾主降來芟斫，收其靈魂，投之永火，其警愕更當何如。斯時欲修德立功，結痛改之實，瑪竇三篇徒自恨其晚耳。念及於此，當急自勉力，刻意勤修，無荒無怠。且宜憐惜世人，冀免其身靈剪伐。向耶穌求，再加恩，不卽伐滅。祝言

### 十九日 嘉貧癩黜異端

定像 想見吾主對公檯坐，視貧癩投資。

特求 求主賜我善行諸事，致能承其嘉獎。

第一端 褒獎貧癩投錢 吾主於末後瞻禮三，在殿多垂聖訓。嘉貧癩投資，窮法利塞納稅之間，辯撒杜責復活之難，皆爲同日事。我今卽以此三者，作默想三端。一、經紀耶穌對公檯坐，觀衆投資。諸饒財

者投頗多，有貧嫠至，僅置一文錢，值惟黍粿。耶穌集門弟子曰：確語汝，斯貧嫠所投，較眾人投匱者尤多。眾人出其所餘，斯獨以不給，而盡捐所有脯資。十二篇世每有雄才壯志，而慨事不從心者，如或因衰老而無能，或因多病而乏力，或因年輕而未用，故於愛人之事，救靈之業，不免多務瑣屑之行。然於此貧嫠觀之，知吾主鑒賞吾人者，不在外著之事功，而在內存之心志。此正可以自喜，亦可以自慰。當發我信德之情，專務行事，惟求悅樂主心。

第二段 窮貢賦之詰問 二、經紀法利塞會議，陷耶穌於出言之失。遣徒暨厄落德屬人造耶穌曰：吾識師洵誠實，誨引天主真道，無所顧忌，無視勢位。請示納稅於責撒勒可否？耶穌洞厥奸心，曰：詐善者奚試我爲？出視稅錢。彼卽出視之。耶穌問曰：斯像斯字爲誰？曰：責撒



勒主乃曰責撒勒之物獻責撒勒。天主之物獻天主。渠聞駭異主智。乃辭退。瑪竇二十二篇想主仇設此疑難。已費多少經營。後遣使主前陳言。辭氣溫恭。又極巧詐。令人有進退維谷之勢。不料主竟以片言窮其詰問。脫其詭計。宜其反命曰。從未有若斯人講論。若望七篇修德之人。每爲世俗妬害。旣難指摘其行爲。遂伺察其出言。旣難妄言以誣之。遂用甘言以惑之。局中人當如何謹肅。效法吾主之智。求主賜我上智之恩。與慎言之德。

第二段 駁復活之謬辯 三、經紀撒杜責黨素不信復活。來難耶穌曰。七人相繼娶一婦。復活時。斯婦爲誰妻。蓋七人皆夫。耶穌曰。爾輩差謬。緣不明聖經義。暨天主能。人自死復生。不婚不嫁。如天上天神。瑪爾谷十二篇旨哉如天上天神之一語。以肉身而有天神景象。得

有無損輕快透實光明諸奇如保祿宗徒所謂將復活如神致哥林多人前書十五篇而仍享五官福樂夫此福樂之境世人之明悟莫能想像然依天主所訓理無可疑我若稍有信德將此身後之福常置目前行見動靜言爲自能無心於世幻而爭求不朽於上天祝言

二十日 圃戶殺林主之喻

想像 想見吾主公堂訓眾。

特求 求主賜我時慎厥修終不陷於圃戶之無良。

第一端 培植萄林 吾主在司教暨民長前設多喻言其一謂有人租葡萄林於農夫屆期遣僕往收果稅農人先後或傷或殺卒又殄其愛子司教等聞喻皆知吾主以農人指己言其多受主賚而辜恩

負德，犯主義怒。然此喻之立，勿謂吾主僅指司教，實亦兼指我人。今可研求喻意，以裨益心身。耶穌曰：有家主植葡萄林，繞藩籬，鑿酒池，築高塔，租於農夫而遠行。瑪竇二十一篇家主，喻天主也。葡萄林，喻教會與修院也。藩籬，喻教會之規矩，修院之範圍，以及神父長上之捍衛也。酒池，喻天主恩寵之源，修德立功之境地也。高塔，喻吾主攸居，保護在林諸人，聖體龕是也。主植斯林，不知費幾許經營，今授之於我，欲我善爲園藝，望多生果實。我可不自勉乎。須謝天主聖召洪恩，賜我居其林園，常奮力於作苦之區，庶及時納果稅於家主。

第二端 圃戶昧良 採葡萄時已近，遣僕往收果實。農人繫其僕，或傷或殺，或投石擊。末遣厥子，農人曳於林外，殺之。同上吾主言此，雖明諷當日昧良之如德亞人，亦隱指後來怙惡之信友，及不忠之修

士等。蓋人不聽善勸，不改前惡，妄用聖寵，肆行無忌。與當時如德亞人，天主頻遣先知大聖，責善規過，而彼不顧良心，盡行殺戮者無異。求主赦我硬心之罪，賜以新寵，復振我避靜時所定善志。自今以後，不敢再負主恩。

第三端 園戶受罰 主問如德亞人曰，迨林主至，何以處此農夫。僉曰，是惡人，必將殄滅。葡萄林宜別召農人，得以時輸稅。耶穌曰，故我語汝，天主國將奪於爾輩，而畀結實之異邦人。同上吾主末後數語，修道者尤宜知警。蓋修道者，多年栖息主林，而卒不免遭此不幸，實足令人代爲咨嗟嘆惜者也。若爾欲免斯殃咎，須將爾寸衷委曲，直訴神師。不但解明爾罪，且開陳爾種種誘惑艱辛，憂思疑怖，更務謙遜謹懃，隨其指引，則庶乎其可也。祝言

二十一日 獻聖母於主堂

定像 想見聖母三歲時，跪在主堂，自獻於主。  
特求 求主賜我聖寵，效法聖母自獻之忠誠。

第一端 聖母自獻之速 今日聖教會行聖母獻堂瞻禮，記憶聖母三歲時，至日路撒稜聖殿，獻身靈於主。蓋據時俗，伊父母携往堂中，託之賢嫠，俾得追陪殿內，供奉主事，兼靜習女德。俟至及笄，始歸家擇配。乃聖母志念之高，早已超諸物表，倚自上之寵光，知惟天主能滿其心，得配其靈。故矢志獨先，首獻終身童貞之願。余靈爾見聖母有聖德父母，早能携獻主堂，多聚珍寶於靈，自將賀聖母多福。不知爾自幼得親師訓迪，且於初領聖體時，亦獻心身於主，識修德救靈之路，是亦類聖母之福也。若能忠心至今，靈魂亦多實德矣。問爾固

何如哉。謝主恩。悔己罪。經聖母手重獻身靈。勉補前日之不忠。

第二段 聖母自獻之全 聖母因全心愛主。故爲主全棄諸有。舉父母膝下之瞻依。世間財貨之享用。肉身無辜之快適。一概捐離。時爲女子者。望爲天主降生之母。嚮無守貞之事。而聖母創獻童貞之願。情甘絕望於斯。所存者。惟一己自主之權。然據安瑟爾莫聖師之解。謂聖母於大司教匝加利亞前。亦矢順命之願。可知聖母之獻。最爲純全。修德者。立善志。發聖願。亦嘗自獻於主。凡平素言行。皆當日新其自獻之功。然試問五官之用。心情之動。果能全歸天主。而私情偏志。毫不僭竊於其間乎。求主光照我明。知我心分於何物。亟思追還於主。并時防我肉身自愛之私。

第三端 聖母自獻之永 聖母既獻主後。德業日進無疆。臻於盡美。

盡善。所以然者，因不但不私取其已獻，且能日整其所獻，以增聖三之悅樂。故天主卽依聖母忠忱之量，日以新寵加之。領報之日，天神特稱其滿被聖寵，女中爲有殊福者，正以此也。厥後數十年中，無日不積功累德。及其登進天上聖堂，身靈所聚之富，所蓄之寶，誠無人可以測量。我嘗奉獻善心好志，亦多憑真切緣由。至於實在工夫，每不能恒心敏慎。獻於晨者，不知行於午。獻於晝者，不知行於夕。觀之聖母，不將抱慚無地乎。恭賀聖母，懇求聖母，獻我於主。且賴其轉達，焚熱我心，堅貞我志。祝言

一十二日

聖母主保

此題用於瞻禮本日，其餘可按日依

次續用。

定像 想見聖母居九品天神之上，吾主謂我曰，斯爲爾母。

特求 求主賜我倚恃聖母之情。凡欲人爲我主保，必須其人深知

我苦，且能助我，更肯救我，於是默想三端如左。

第一端 聖母之智 經紀耶穌第一聖跡，變水爲酒，實緣聖母之請。而聖母之請，因知設宴者酒醴已空，恐其有難以爲情之景。並非有人先商之於聖母也。故聖史曰：酒幾罄，聖母語耶穌曰：酒罄。若望二篇是可見聖母智慮周詳，無微不至。世之爲母者，子女未解饑寒，多苦於不知子女所求。今聖母之明，上照天國，下耀遍地。我有急需，自無不在洞鑒之中。將我神形諸艱諸難，諸急諸困，訴於聖母，託身靈於聖母。憂苦時，不忘趨赴聖母之懷。

第二端 聖母之能 聖賢每謂聖母以天主之能爲能。凡事天主可命而成者，聖母可求而得。以故聖教會稱聖母爲大能者貞女。大能



於聖父前、因爲其愛女。大能於聖子前、因爲其眞母。大能於聖神前、因其爲潔配。噫、愛天主如聖母者、愛聖母如天主者、又爲母者愛其子、如聖母愛吾主、爲子者愛其母、如吾主愛聖母。豈聖母有望於主、而主不遂其願哉。然聖母亦有望於爾、望爾改過、望爾避罪、望爾修德。爾乃竟拂其意、虛其望。是天主榮寵之聖母、反多受侮辱於爾、有是理乎。求聖母寬宥、拔去我病根、除滅我偏情、加增我毅勇。爾欲增聖母之榮、思當何爲於聖母。如是、始表我孺慕之忱。

第三端 聖母之仁 凡見人有危而不思施救者、非仁也。若聖母則異是。一日、聖母顯於聖婦彼利日大曰、予乃天上皇后、仁慈之母。予乃義人之樂、導引罪人至天主之門路。予不欲施以慈惠者、世無其人、不因予轉達、而獲主恩寵、或輕邪魔之誘者、亦無其人。若非判受

永罰之罪人。未有若是之見絕於主，以致無可得子挽回，而不復蒙主眷顧者。後又結以數語曰：故世有人能賴子慈善，救己身靈，而不知倚恃子仁，自投永獄者，禍哉哀哉。余靈體味此言，自多安慰，自深仰望。當與聖伯爾納鐸向聖母曰：聖母，汝既爲仁慈之母，豈可棄絕我哀憐之輩。蓋仁慈不必用於聖人，而宜用於罪人。我爲大罪之人，則我大有分於爾慈。我最可憐，則我最宜得爾矜恤。我爲罪人之首，是我首需爾慈悲。敬誦求聖母轉求加恩經。 祝言

二十二日 嚴飭異端諸弊

定像 想見吾主在殿訓眾，責法利塞等人。

特求 求主賜我避法利塞人諸病，免主貶責。

第一端 嚴飭舍本求末 法利塞與明經士等，傲惡之心愈固，吾主

救靈之火愈熱。憐斯民不識不知，受彼欺弄，禍害身靈。於是當受難前，將諸弊端，概爲道破，嚴加飭責。欲斯民不爲彼蠱惑，亦所以垂訓我人。乃曰：禍哉爾詐善之明經士，暨法利塞。薄荷茴香蔣蘿，十輸一律之重者，若義若仁若信，而反遺棄。譬哉爾導，濾蚘而吞駝。禍哉爾詐善之明經士，暨法利塞。外潔杯盤，內盈攘奪，暨不義。譬彼白堊塋，外允美，內儲死人骸，暨諸污穢。瑪竇二十三篇吾主斯言，不惟責當時學士而已。今奉教與修道人中，每有以微末小事，告解是勤。而於根本要務，缺畧不知。是皆濾蚘吞駝之類。亦有惟修外貌威儀，人前似爲有德。而天主目中，殊多過惡。是又如白堊塋，外美麗而內污穢也。求主賜我聖寵，能見己靈之境。若知身無實德，當視萬事爲空虛。

第二端 嚴飭欺己誤人 法利塞等不惟不肯信奉吾主，抑且多行

欺給誤人救靈大事。吾主亦痛惡之。因又曰。禍哉爾詐善之明經士。暨法利塞。爲爾閉人天國。旣自絕於天。又阻人登進。舉重難之任。壓人之肩。己則一指弗動。同上間有談道之人。自怠修行。而笑人有志進修者。亦有人論領聖事。修德行諸規模。求全責備。任意苛煩。令人幾不能躋其高妙。而意敗心灰。此皆法利塞之徒也。問我能嚴於持己。寬以待人乎。凡訓於世者。果能修於身乎。當深愧悔之情。務期言行相顧。

第三端 嚴飭驕矜貪利 躬行厥事。冀欲人見。闊厥帶。廣厥襟。賓筵喜居上位。公堂喜據首座。藉辭長禱。蝕嫠婦產。同上釣名沽譽。爲吾人之通病。染是病者。每難自行覺察。此其病之所以爲隱也。且犯是病者。德業反爲罪過。此其病之所以爲毒也。可不慎哉。至於衣裳冠

履過欲講求。卽在俗之信人，在教之婦女，尙宜戒慎。身置道德之途，而亦不免此咎，更不知何以爲情矣。若夫眼界高廣，渺視俗人，輕貧重富諸弊，世每有以之議修道人者，勿謂其辭皆不直，所謗皆出無因。然果直與否，茲姑弗論。在我者，惟宜謙恭謹慎，不論長短所在，亦不供人謗讟之資，如是可耳。求主賜我免法利塞諸人之弊病。祝言

### 二十四日 十童女迎親之喻

定像 想見吾主曰：爾宜醒，蓋爾弗知日與時。

特求 求主賜我常存信德之光，愛德之火，隨時得歡迎主至。

第一端 童女分智愚 天國擬童女十人，持燈迎新婿與新婦。其中愚者五，智者五。愚者持燈，不携油。智者盛油於器，而持燈。瑪竇二十

五篇童女信友像也。新婿與新婦。吾主與在天榮福之聖教會也。燈。信德也。油。善工也。盛油於器。積功德於身也。十人俱持燈。言奉教者。皆有信德也。愚人持燈不携油。謂人徒有信德。不知立功。是以不見信德之明也。諸向善輩。惟求外來之名譽。外形之貞潔。外著之熱衷。而於修德實際。如心志清貞。愛人克己。真謙諸務。則皆茫然無識。是直癡童女而已。反躬自問。有無羞愧。求主賜我上智。增我修德之虔。思吾主於數日間。將來召我。我當何爲以迎之。

第二端 童女之寐寢 新婿延遲。眾就寐而寢。半夜誼譁。新婚至。宜出迎。眾女卽起。整治厥燈。時愚者謂智者曰。請與吾些油。吾燈將滅。知者答。恐不足供吾與爾。寧至市。市焉。同上。吾人當宴安無事。以爲死期猶遠。專心俗務。且有沉酣於罪過之中。卽修德之人。時亦睡眠。

模糊、怠荒神業。誰知適於無備之時，主乃忽焉命召。至此而欲求助於人，或思立功補過。殊覺倉皇失措，自悔不及矣。今者時尙未至，正可藉吾主聖血之寶，賴諸聖轉達之恩，市油以明燈火，懋德以耀心身。勉之望之。每晨可念保祿宗徒之言曰：時已至，宜起於宴眠。因靈魂之救，迫於初進之時。致羅瑪人書十三篇

第三端 童女判殃祥 新壻至，齊備者偕彼享宴，而門則扃矣。踰時，愚童女至，曰：主，主，請啟門納吾。伊答曰：予實語爾，予弗識爾。故爾宜醒，蓋爾弗知日與時。同上在此一事，可思者三：一、燈油齊備，而偕新婚享讌者，卽善人偕主享天堂真福也。天門扃閉，永無隕落之虞，再不若世上之苦樂靡常焉。二、主謂愚人曰：予弗識爾。爾行弗師予表，爾心不隨我意。遂予，爾乃爲惡之徒。瑪竇七篇厲哉此言，能不懼哉。

三、主曰、爾宜醒。又曰、予語爾者、亦語眾人。曰、宜醒。瑪爾谷十三篇聆此訓言、可知修道人與世俗人、均宜常醒。醒於祈禱、醒於補贖、醒於種種善工。庶免與愚人同科。聖母爲上天之門、又爲極智者貞女、求其轉禱。祝言

二十五日 預言審判之威嚴

定像 想見吾主乘雲降世、審判萬民。

特求 求主賜我聖寵、常能整備心靈、隨時可赴主前聽判。

第一端 審判先兆 吾主於末後瞻禮三日、講教畢、出堂。門徒稱羨殿宇之壯麗。吾主復爲之預言、聖殿將毀、都城將滅。嗣又以來日審判先兆、告之曰、日月諸星、時將有兆。太陽埋厥光、太陰晦厥明、天星隕落、地人危迫、海浪猛闢。是故厥容憔悴、爲懼。且俟將加於普世、諸



天之德悉動。路加二十一篇、瑪竇二十四篇、吾主一生、常著其仁良慈愛、甘受萬苦、以救吾人。及後日復來人世、將於天地萬物前、顯天主之公義、申義人之冤抑、加惡人之恥辱。則其威嚴至極、天地間、無一物不代震赫怒。經云、記憶末時、可永免於罪。若爾愛情冷淡、無力以禁向惡之偏。當以審判之嚴、時惕爾心。向主曰、彼日威嚴、主救我於永死。日課經句

第二端 審判景象 時人子厥號顯空、人子乘雲始臨、厥儀至赫、厥威至嚴。遣天神力吹號器、旋巨聲高呼自四風。四風卽四方也自茲極、迄彼極、聚萬眾於臺前、而區分焉。如牧別羊於羝、置其羊於右、羝於左。向右者曰、予父聖福者、偕來享天國、予父於世初攸備於爾者。謂左者曰、爾輩凶禍、離逃我、入永火、爲邪魔及諸惡神而設者。同上

試思黑暗之中，倏忽間耀光奪目，十字現於天際。爲善之人，在世素遵主訓，日荷已十字架，苦身克己。當時見此十字架，得與肉身復活。其歡慰當何如。惟寡信之奉教人，及不忠之修道士，混於羶腥之羶，雜於邪慝之徒，與一家之昆季，一會之同人，永遠睽離。其恥辱傷痛，尤何如。求主賜我於審判之思，能得神益，以副主當時遺訓之心。更務於憂疑之中，勉行審判時所願行之事。

第三端 日備審判 其日其時，聖父外莫之知，天神亦不知。瑪竇二  
十五篇死之日時，固莫能知，然所能知者，人皆有一死，死後，靈魂先受主判。判之殃祥，卽繫於死之善惡，實繫於生之藏否。爲今之計，惟有凜吾主之訓，曰爾宜醒，蓋不知家主何時至。瑪爾谷十三篇故苟欲於審判日，毫無驚懼，須自今以始，晝夜謹行省察。審問爾思言行。

動。聖善爾內外諸工。庶幾有備無患。臨時得心慰神怡也。向日後審判死生之主。求賜我善行省察之工。生前自審自判。祝言

### 二十六日 吾主與徒同席晚餐

定像 想見吾主坐於廳中。偕宗徒晚餐。

特求 求主賜我恩寵。得赴主聖筵。常有妥善預備。

第一端 備晚餐所 耶穌受難前日。厥徒就之曰。欲備食巴斯卦於何所。耶穌遣伯多祿暨若望曰。爾進城。遇人携水瓶。隨之入室。謂家主曰。師曰。館舍何在。何處偕我門徒食巴斯卦。伊將示爾廳一所。宏敞而張設。在此備之。徒往。果遇如主言。乃備巴斯卦。具羊羔等物。瑪竇二十六篇。路加二十二篇。當思斯留名萬世之廳。吾人心靈之像也。若欲主降臨宴息時。得免不恭之咎。有必當知所務者。一。爲宏敞。

卽慷慨我意志，不可器小。凡主有欲於我，切勿介介然有難色。如不犯大罪外，其餘諸善工，一無所爲。二爲張設。卽裝飾我靈魂，以諸德之輝。如活信熱愛，以及深謙切望等，皆是。凡領主時，須備此諸德，謹慎行之。

第二端 同食羊羔 屆時，按教律在日沒後一點鐘。耶穌蘸坐，十二宗徒偕席。耶穌謂之曰，吾甚願於受難前，同爾曹食此巴斯卦於斯一堂話別，將與爾至愛之憑，遺爾至珍之貺，以誌不忘。路加二十二篇夫斯祭獻之羊羔，須刳割者，吾主受難慘死之象也。今吾主與徒行斯古禮，同席食之，未免目擊情動。然其心志，仍是安愉。容顏，仍是和悅。此中皆含有至訓。卽欲吾人動驚奇愛慕之情。定志凡遇艱憂，毅然忍受，心志不爲搖動。惟恭行主命，善盡己職而已。體味主言，發

知恩感愛之情。并思何以酬報。

第三端 警負心人

荊答：「昨往司教議付主於彼。」曰：「曷賄我，我必得付汝。」彼約銀錢三十。瑪竇二十六篇吾主見付於人手，雖出自心甘，然不可默默無語。若茫無所知者，故席間謂徒曰：「實語爾，爾輩中與我同餐者，有一將負我。」門徒聞言，憂甚。各曰：「主是我乎？」曰：「十二人之一，偕我納手於盤者是。」人子往，如已書。但負人子者，禍哉！其人不如無生。瑪竇谷十四篇吾主抱此傷心之痛，仍以仁愛爲懷。雖不明指荊答之名，而懲儆其負心。若是剴切。荊答有靈，應亦驚醒。奈何如癡如聾，不思悔改。究其罹罪之由，無非不遏情欲，不避罪機，輕忽細過，貪求小利所致。於是知吾人旅世，無地可平安無虞。彼天神隕自天庭。原祖逐出地堂。荊答居耶穌門下，亦不免陷於永獄。吾可妄恃地

位之聖善，而弗慎修爲哉。切勿自恃，須盡去己私，求主賜以恒德。  
祝言

二十七日 耶穌濯拭徒足

定像 想見吾主持盆提水，來往諸徒足下。

特求 求主賜我明悉主謙，隨其遺表。

第一端 主濯宗徒之足 古教將廢，新教將興。古教梅瑟所定之羔羊，將革除其禮。新教耶穌天主之羔羊，欲飽飫吾人，於是先爲諸徒濯足，示凡領聖體者，宜勤修謙遜潔淨諸德。聖史若望紀曰：晚餐既畢，主起離席，卸表衣，白帨纏腰，持盆盛水，欲濯徒足，拭以腰間之帨。  
十三篇 吾主降來人世，已卸却其主性榮光，等於我人。今又卸却其表衣，作賤者之服役，謙德之至也。我不能卸我習氣，不肯卸我傲心。

卽於衣履之間，猶欲出人一等。何所行之反於主乎。深心愧悔。求主賜我真謙之志，不再陷於驕矜。

第二段 伯多祿之謙遜 首及西滿。伯多祿徒曰：主，爾乃欲湔吾足。耶穌語之曰：予茲攸行，爾今莫知。後日乃知。對曰：匪僅於今，永弗諾。主湔予足。曰：倘予弗濯汝，則弗能享予。同上。伯多祿信雖大，謙雖深，如是執意不聽主言，究屬非是。修德者，所當留意謹慎焉。蓋辭榮自下，原係謙遜之心。古多賢聖，類皆如是。然旣知爲長命，而猶固爲退讓，亦非聖賢之行。且天主統御普生，拯世贖人，其淵微莫測之妙，世人每不知所以。惟有順承其旨，安行其命，相期一日得明其理，可耳。故無論何恩何寵，主旣欲加之於我，我雖自審無功無德，總宜謙恭承受，不可過於畏卻，以拂主心。求主滌潔我靈，俾得時承主錫。偕達

味聖王曰，再求多洗予逆行，而潔清我罪逆，聖咏五十篇日中可屢誦此經。

第三端 伯多祿之順命 伯多祿曰，若茲，奚趨弟足，手首憑師欲洗，不敢方命。耶穌曰，潔人但須濯足，身已清潔。同上伯多祿聞吾主申儆之言，如雷霆震耳，卽俛首伸手，露足，任憑洗濯。亦可見其愛主之熱，受教之誠也。特是前過拒主洗者，今又過欲主洗。謙遜之人，縱有過與不及之嫌，然總易於轉移，不至終於固執。吾儕信人，於回心改過，洗滌前非後，欲赴天神之筵，亦惟是濯去足上之塵。卽旣發上等痛悔，或旣向司鐸告解，滌淨垢污，正不必過於憂慮，恐前日神工不妥，時求總行告解。如伯多祿之旣欲沐其首，又欲洗其手，殊多疑懼。然惟當聽神師之指引，如伯多祿聽主訓諭也。深願望領聖體之情，



體味神領聖體誦內之諸義。 祝言

神領聖體誦 吾主天主，賜我諸德，又望賜我聖寵，云云

二十八日 耶穌濯足遺訓

定像 想見吾主謂宗徒曰：予今豎表，爾視以師。  
特求 求主賜我謹聆聖訓，時時事事，摹仿而行。

第一端 濯茹答足 徒等既聞主與伯多祿言，又見其濯伯多祿足，遂皆不敢退卻。不勝謙遜愧慚，任主濯拭。獨茹答心同頑石，竟毫不動情。其殘忍固執，與吾主仁善悲傷，俱出人意外。試思吾主在其足下，暗中謂之曰：吾弟吾友，爾有何不快於吾，而欲付我於仇乎？吾今濯爾足，更欲洗爾靈，望爾速卽悔改。毋執迷於惡，毋詐僞至終，致受無窮之苦。時吾主聖淚如殊，雙雙落於茹答之足。而茹答若無知覺。

全不關心。噫，哀孰甚焉。然今日吾主於聖體內，仁愛慈祥，謙卑哀痛，較昔日在荅答足下，何止百倍。聖賢注想至此，每不禁動情感泣。而我乃淡然無味，是何異荅答之冥頑耶。求主感化我心，燦熱我心，毋效荅答之負心。

第二段 諭徒相濯 濯徒畢，更衣表衣，復席而云。爾其知予茲攸行，爾皆稱予爲師爲主，爾言然。蓋予爲主爲師，猶濯爾足，正示爾宜相濯。若望十三篇吾儕之患，不在不知主行，而在不師主行。吾主所行，世人多有未得知者。吾因天主格外之恩，已得知之。若非善用吾知，而不思效法，知惟增我咎戾耳。知之，又能行之，斯乃真福。同上我今撫躬自問，果能遵主言訓，行吾所知乎。耶穌爲我師我主，我爲其弟其僕，凡其加諸屬下者，卽其欲我加諸同人也。倘不知所仰法，悖矣。

夫濯足爲謙遜愛德之表。我能謙己讓人。代勞救困。事雖卑下。亦不畏避。是卽我洗濯人足之機也。求主聖心之火。焚炙我心。時能樂行謙愛之工。

第三端 師法主表 曰。予今豎表。俾爾相師。同上吾主平生言行。辛勤謙抑。苦難慘死。無非爲我。我自應感激其恩。稱頌其德。然吾主素願。不在人空口之讚揚。而在人實心之則效。不特效其濯足一端。而且效其平生諸表。不論行何事。受何苦。有何修德之機。或苦克謙遜。或良善愛人。憶念吾主豎表於先。我乃取法於後。如見其常在目前。凡思言行。皆以吾主爲模範。此則吾主聖心之厚望。亦吾主臨終之遺囑焉。余靈勉旃。按特求之意。向吾主虔祈。 祝言

### 二十九日 耶穌建立聖體

定像 想見吾主手捧麵餅，仰天祝禱，定聖體大禮。

特求 求主賜我聖寵，使明識耶穌而愛慕之。

第一端 立聖體之奇 至奇哉，吾主於聖體內，所顯之上智全能至善也。上智者何？奧妙之跡，盡人聰慧，莫能思及。身將與人永別，而仍與人永偕。定此聖體聖事，陪伴吾人，直至世末。此其無窮上智也。全能者何？因司祭數言，而變餅爲體，變酒爲血。餅酒之形色雖存，而餅酒之體質已滅。俾領之者，實領其聖軀寶血。此其無限全能也。至善者何？既願殺身以救世人，復將聖軀寶血，膳養人靈，更自爲獻品，百千萬年，日日時時，爲人作祭主之犧牲，代人祈主。且其建此聖體聖事，適值惡人謀害之時，亦明知日後爲人侮慢，而乃施恩賜愛，慨然不吝。此其無涯至善也。余靈念及於此，須大發感恩還愛之情，思報

主德於萬一。拜主時，屢以此義縈懷。

第二段 立聖體之禮 耶穌取麵餅，分與厥徒曰：爾各食此，此卽吾軀體也。又取爵而謝，與徒曰：爾各飲此，此卽新約之吾血，將傾注爲爾，及爲衆人，以得罪赦。瑪竇二十六篇，瑪爾谷十三篇，路加二十二篇。吾主言：此卽吾體，此卽吾血。不言此卽吾體之影，吾血之像者，因實以己體血，作吾神糧也。吾主於領洗聖事，以水滌人罪污，於堅振聖事，以油固人信德。今若惟以麵酒養人靈命，有何不可。然耶穌愛人之心，與慈母愛子無異。慈母愛子，雖他人亦能哺養，然必自乳之爲快。且吾主亦可以己體血之一分，飽飫人靈。乃竟以內外諸有，全畀於我。欲己之神形，締結我之神形。欲己之五官三司，恩寵我之五官三司。噫，思及於此，吾當如何感謝欣慕。當如何求主百肢之功，赦

我一身之罪。余靈思之哉，此何等恩愛哉。

第三端 宗徒領聖體 吾主以超性之光，射入諸徒之靈，使之堅信聖體奧理。於是咸驚主恩之新奇，不勝謙恭孺慕以領之。領後，覺神靈怵悅，遠超世味甘飴。惟茹答心志他馳，無敬愛諸情。故食天神之糧，而毫不知味。又按聖師所傳，吾主遣若望宗徒送聖體於聖母，在相近之室。聖母所發虔恭熱愛之情，非人口舌所能宣。我當效法其分毫，偕領聖體之聖母，向主虔求。 祝言

三十日 耶穌臨別遺訓

定像 想像己身亦在宗徒中，聽主聖訓。

特求 求主賜我遵主訓言，虔修諸德。

第一端 耶穌慈愛宗徒 大凡慈父知己將死，其憐愛子女之情，更

爲親切。荅去後，吾主與十一徒作別。其情繾綣，殊足動人遐思。謂之曰：小子，予與爾偕，無多時矣。徒聞此言，未免愁緒縈懷。主慰之曰：予父宮內多處，我往預備爾處。庶幾予何在，爾亦何在，不使爾爲孤子。我誠諾爾，爲爾宜往，祈聖父別遣安慰者聖神，永與爾偕。汝若愛予，必可心樂。吾主更知異日之艱難，欲免宗徒驚怯，因壯之曰：人將絕爾殺爾。斯時幾近，爾將涕泣憂愁，世將喜樂。然爾憂爾愁，轉成真樂。予之平安留於爾，予之平安賚於爾。昔予拔爾於世，今爾心志可毅，予已勝世矣。若望三十三、四十五、十六諸篇吾主訓慰宗徒，亦卽訓慰吾人。且訓慰宗徒之時，未嘗無吾於心也。吾今體味主言，可深熱愛倚賴之情。每當困苦憂愁之際，可憶主言以自勉。

第二端 耶穌囑徒相愛 吾主顯已慈愛，安慰宗徒，如慈父愛子，再

三致意。諭之互相和愛，並示以永遠同心同德。謂之曰：攸命乎汝，惟相愛耳。若望十五篇然吾主欲諸徒行斯愛德，較向時更全更美，與以新式之愛。謂之曰：予與新命於爾等，欲爾相愛。且爾相愛，如予愛爾等。爾相愛，眾將知爾爲予徒。蓋愛德，實爲吾真徒之號也。十三篇余靈問爾之愛，能如主諭乎。能法主表乎。爾欲深獲主心，虔修此愛德，可也。主曰：如予愛爾等，言斯愛宜超越性情，汎愛眾人，迎人意願，忍人煩數，憐人患難，施人恩惠，實心實事，度量甚寬也。爾旣知愛情多缺，當思何修以補之。

第三端 耶穌諭徒祈禱 吾主不欲已徒有何匱乏，又囑其善行祈禱之工。曰：爾賴吾名而禱予父，予父悉允爾禱。凡爾賴予名禱予，予亦允爾禱。若望十四篇吾主此言，蓋謂人恃主德義，賴主勳勞，或求



聖父、或求吾主、無願不遂。後又曰、汝等居於予、予言居於爾等。求爾所欲、必成於爾。十五篇此復訓人欲遂所求、必當常順主命、常契主心。與主合而祈求、則所求者、自無不得矣。余靈冀主滿爾願欲、允爾祈求、時務契合主心也可。向慰懃話別之耶穌、盡訴衷情。祝言



## 卷十二 十二月

月省之思

三百六旬之終

見本卷三十一日

首瞻禮六

聖心之慷慨

見卷五第二十六題

### 初一日 耶穌祝禱聖父

定像 想見吾主舉目仰天，祈求聖父，諸徒注目視之。

特求 求主賜我明達，主所求之深意，而仰體主心。

第一端 求爲自己 吾主將顯世，誨人之三年前，先行祈禱，以興敷

教之工。今將謝世離人，亦行祈禱，以終傳道之業。耶穌既撫慰宗徒，

懇懃訓諭，相與話別。若望經紀吾主舉目向天，求聖父曰：我父，時已

至，榮爾子，俾爾子榮爾。十七篇一節此吾主求父榮己，欲世人信認

之，愛敬之，終身事奉之。其所以求此者，無非欲令人悉歸聖化，大彰

聖父之光榮也。又曰：予已榮爾於世，爾委予之工，悉已奉行。四節可見主求榮顯，早已忠於己事，以斯榮爲己苦勞之酬焉。吾主於此垂有三訓：一、凡行愛人之工，先後皆當求主，庶可得善工之效。二、人宜先救己靈，顯主光榮。若汲汲於救人，而不思自救，何益於己？愚孰甚焉。三、爲善立功，慎毋始勤終怠。庶臨終時亦可向主曰：委予之工，悉已奉行。今求主寵佑，深自奮勉，務期遵主彝訓，得日進於修途。

第二端 求爲宗徒 主欲宗徒永相和愛，謂聖父曰：父，爾付予者，因爾名保存之，使彼相合爲一，如我輩然。若望十七篇十一節又欲宗徒於混濁之世，全真完璞，不染其污。曰：父，予不求爾取之於世，第求爾保之於惡。若望十七篇十五節又欲宗徒優入聖域。曰：父，聖彼於誠實。若望十七篇十七節蓋謂使彼恒修實德，能爲聖人。此三者，主

爲宗徒求之，亦卽爲吾求之，吾亦當自行求之者也。今試三省吾身，能平矜釋躁，諸事不傷和愛，以副主心乎？能謹慎自持，不被世累，常得志潔神清乎？能遵主訓諭，進修實德，不至自欺乎？謝主爲我代祈，并求賜我以所求之諸德。

第三端 求爲信人 主行祈禱時，如見後世信人，皆在目前，欲彼等常一心信主，爲之求曰：父，予不獨爲斯人，指宗徒也求，凡緣斯人言，而將信予者，予亦爲之求，使彼合成爲一。若望十七篇二十節又求聖父賜諸信人共享其榮福，曰：我父，爾付予者，予何在，予願伊等亦何在，使伊等見爾畀予之榮。同上二十四節余靈深思，吾主祈禱之言，何敢忘其切愛我人之厚意。且因吾主祈禱之工，爾已有信望愛超性之三德，益當藉其勳勞，增爾德義。庶得見天主榮光，揚天主恩。

德於無窮。向耶穌聖心、求賜善禱。 祝言

此後爲耶穌受難始末、其默想諸題、見二卷聖灰禮儀後。

初二日 仰賴聖方濟各

今日係聖人謝世之期、即其瞻

禮前日、

定像 想見聖人在天、爲人所主。

特求 求主賜我倚賴聖人、幸承主錫。倚賴聖人之故有三、卽下列

三端、

第一端 聖人神能之大 聖方濟各蒙主非常榮寵、特具神能、多顯靈跡、殊足動人欽敬、而深倚賴之心。聖人未列聖品之前、教皇究其生平所行聖跡、計死而復生者二十四人、其餘諸跡、計八十有八。其死後聖跡、祇印度地方、賴其轉達、得死而復活者二十七人。麻拉加

主教管轄之地，大小聖跡俱有憑證者，約計八百。至於西洋等處，蒙其恩佑者，更難悉數。記念及此，自當熱心倚賴聖人，求爲主保。況爾從事修途，有志淑人，以繼聖人事業，尤宜望聖人助爾成功。爾自思欲得何恩，卽自思須行何善以得之。謝主賜聖人爲我主保。求主賜我誠心倚賴。日中每思，明日瞻禮，勉力修功，庶幸承所望之恩。

第二端 聖人愛人之切 聖人愛人之德，實爲古今所罕見。身爲教宗欽使，手握東洋教務全權，乃在臥亞島，人見其行乞於市，以轉濟貧人。其愛人爲何如乎。因其愛情之深，無一事不致其所愛，雖身命之危，亦弗顧。其愛德之廣，無一人不被其所愛。雖蠻荒之陋，亦弗遺。若有人爲其親愛逾恒者，卽其隱謀嫁禍之仇。此則愛人中更進一層矣。今聖人在天之愛，未嘗減於在世之時。我何不仰恃其愛，而求

我所需之恩乎。且聖人之愛，未嘗厚於人而薄於我。而我之所求未獲者，無乃我求之未誠乎。想聖人將死，猶以中國人民，念念不忘。豈其今日在天，見我虔心懇禱，而反置之不顧乎。宜深倚賴之情，勤行祈禱之工。

第三端 聖人救靈之勤 聖人最著之德，乃救靈之神火，濟世之熱心。推其意，直欲普世之人，悉奉正教而後快。故常勤於勸化，雖遇艱困，亦不能阻其敷教之工。一日，將往冒勒島，親友謂此去，惟命堪虞，含淚止之。聖人愕然曰：倘此島多金玉珠寶，商賈將爭先趨赴。我爲救人之靈，而反畏葸不前乎。豈可以濟世救靈之志，反不若爭財求利之勇乎。余靈爾，旣效聖人離鄉背井，以務救靈之事，亦宜倚賴聖人受寵之優，求爲轉達，俾得如願以償。頌聖人在生之德。賀聖人在



天之榮。懇賜允我所求，并賜異端及外教者，棄邪歸正。 祝言

聖人生於一千五百六十六年四月初七日，一千五百三十四年八月十五日初矢修願，後四年晉陞鐸德，復矢顯願，又後四年四月初七日往印度，一千五百四十九年八月十五日進日本，後三年十二月初二日歿於廣東三洲島。

### 初二日 聖方濟各瞻禮

定像 想見聖人在天堂榮福中，俯視吾人。

特求 求主賜我識聖人德業之奇，自知奮勉。

第一端 聖人事業之奇 溯聖沙勿畧一生事業，洵可謂天主以宗徒懋績，復新於聖人之身。其能宣未來事，通諸國方言，顯行靈跡之多，化人奉教之眾，山川跋涉之勞悴，不但可與宗徒相衡，且間有駕

乎其上者。蓋其親手授洗者，共一百二十萬餘人，聆其教而信奉，眞主者，約二百國。所行之路，伸長計算，可繞地球三轉。噫，聖人之事業，可謂奇矣。然或有人慕聖人奇行，自慨地位卑微，長才淪屈，謂苟能遇知己而大受，將賢聖之宏功，不難復建。而考其平日之操修，尙未能忠信篤行。識者每嘆其自欺已甚也。嘗有少年修士，籲懇聖人帶往襄理教務。聖人曰：爾救人心熱，殊屬可嘉，然慎勿自誤。蓋人未有不謹細行，而能卓立於大德也。細味此言，求主賜我恒心果毅，謹守庸言庸行，而藏器待時。

第二端 聖人謙遜之奇 觀聖人功業之大，凡歐洲人士，固無不聞沙勿畧之盛名。而聖人謙遜之心，則事事歸功於主。其自視欽然，若絲毫無善，爲主最下之僕。人有慶其事功者，乃謂之曰：我若有微善，

實賴諸神昆祝禱勳勞耳。其敬長之誠，尤爲出衆。凡奉書聖衣納爵，必跪而繕寫。常求遣人前往，以整治其行。輔翼其修云。噫，聖人之謙遜，可謂奇矣。吾於主前，無多善事，謙德之修，宜若易易。豈知私心自滿，凡少受屈抑，卽不勝悻悻於衷。斯無他，昧於自知，使然也。聖奧斯定曰：明於自知，斯深謙德矣。當媿悔前愆，效聖人謙己尊主之行。

第三端 聖人熱心之奇 聖人勤勞主事，日夜幾無寧晷。而於默禱神工，行之仍極能深遠。蓋其與天主締交之密，卽於夢寐間，亦未始間斷。旁人每聞其號嘆曰：吁，至聖聖三。吁，至聖聖三。口誦此經，心維天主，生養保存救贖寵佑之恩，不禁愛情焚炙，涕淚雙垂。每目注苦像，口親之餘，其情亦未嘗異是。天主乃以異跡，徵其墮淚之功。當聖人在東方敷教十年，人見沙勿畧府中一苦像，每瞻禮六，渾身流汗。

噫、聖人之熱心、可謂奇矣。我嘆神業中、心志乾枯、卽領主時、亦覺淡然無味、每歸咎於職事之煩。觀於聖方濟各、亦可知咎非所咎矣。若能循規蹈矩、效聖人忠慎於神業諸工、行見心靈懇摯、而多道味之滋矣。向聖人祈求代禱、俾能師法於萬一。 祝言

初四日 事主豪雄之概

定像 想見吾主志氣豪雄、甘負十字架陟山受死。

特求 求主賜我聖寵、俾事主亦能有豪雄之概。

第一端 豪雄之義 行沙勿畧瞻禮、旣畧叙其功德之奇、而原其所以致此者、則豪雄二字可以括之、夫所謂豪雄者、激昂從事、慷慨圖功、一往而莫能禦、發憤其心、積健其力、百折而不可回、以之事主、卓然超乎凡庸、以之救靈、毅然勝諸艱阻。人苟明斯豪雄之義、則非徒

慕其名，尤須求其實。求之如何，當念所事之天主，本性無窮美善，待我又何等仁慈。身非木石，能無感戴，必思盡心竭力，有以報之。以此類推，自覺心雄氣豪，而於榮主救靈一道，不以克苦祭獻爲難矣。求主廣我道心，賜我勇於爲善，將能勵大志而不餒，亦能勝大任而無虧。

第二段 英雄之要 由前說觀之，可知英雄之詣，洵爲修德者至要之務。蓋不豪卽不勇，不勇則怠，怠則過分愛惜肉身，而畏勞憚苦之弊生矣。不雄，則不剛，不剛則弱，弱則無能激勵精神，而遷延推諉之端起矣。從此神業諸工，罔知欣感。秉彝諸德，漸致銷亡。甚至白日虛拋，反以良規爲多事。清晨遲起，輒以細故爲飾辭。此誠所謂未老而先耄，無病而自呻者矣。若是而欲希賢希聖，不亦憂憂乎其難之哉。

余靈念此，恐亦未能盡辭其咎。當自謙自訟，用主寵光。審己當何修，何補，且思何以奮我豪雄之氣。求主助佑，每於修德中，自壯其心。曰：爲主今日微勞，將獲主天堂重賞。予靈勗哉。

第三端 豪雄之益 聖依納爵避靜神書有曰：按事主之大度，人將蒙主寬宏之施報，而日益其超性之寵恩。是知前聖馳驅主道，時見其精進不窮者，爲能於主前，雄其心而豪其氣也。爾有志欲與聖哲頡頏，究不外乎天主之寵佑。而寵佑之分量，概視爾用力之淺深。然則爾欲用力，莫若勉爲豪雄。輕世金書有曰：忻進要功有二：去阻一行善一。一卷二十五篇言力攻內心之偏，及修成之阻，而勇行急需之德，日進於善也。願爾身試其言，亦將多蒙主錫，應知先聖先賢之不我欺也。求主保聖人，代祈上主，賜此豪雄之德。祝言

聖母無原罪三日敬禮

初五日

預備瞻禮之緣

敬禮 第一日

定像 想見一故園、滿目荒榛、間生一利利亞花、都麗異常。  
特求 求主賜我明達敬禮聖母無原罪之緣、而倍切虔誠。其緣一

係天主、一係聖母、一係吾人、即以下默想之三段、

第一端 緣於天主卽偕天主光榮聖母 天主於無始之始、超拔聖母於原祖諸子孫中、賜其獨無原罪者、因預選爲己聖子母、而榮之於諸神聖之上也。我今於聖母無原罪瞻禮之前、盡誠敬禮、卽行天主永遠存心之事、而圖益顯聖母之榮。且將偕天主光榮聖母、而賀聖母之福寵獨隆也。因於此三日間、屢想聖母慶期已邇。天下信民皆整治心身、欲與諸天神聖、共賀其殊榮。則我預備之勤、敬禮之虔、

亦當不讓於他人。求護守天神助佑，可於一定之時，記憶瞻禮日將至，而務熱我善心。

第二端 緣於聖母卽行最樂聖母之事。聖母始胎時，備主福寵，特免原罪之染。斯於諸恩中，最爲聖母珍重。今推聖母之意，設一萬不得已之想，情願失其餘諸福，卽爲天主母之榮，亦不顧惜，而不願此身一時之偶染罪污。可知吾人恒頌聖母無原罪之福，虔誠預備其瞻禮，乃甚愜聖母之心。然須知預備瞻禮，尤能深愜聖母之心者，不僅在頌禱之儀文，要自有當行之急務。卽凡事之違聖母意，而稍能點污我靈者，務卽銳意避之，是也。求聖母增我恨罪之心，賜我心身日增瑩潔，深自隄防，謹避日常之過。

第三端 緣於吾人，卽行最裨身靈之事。聖師學士皆謂天主施人



寵賚，無不由聖母之手。論聖母愛人之心，初不異乎常人之母。雖分惠諸子，靡有不愛。然尤樂加恩於孝敬之子，特獎其心意之美也。故盡誠敬禮，其無染原罪，悅樂其無玷之聖心者，必多承其恩愛。大有益於心身焉。所謂虔誠敬禮者，尤宜於此數日內，勤修聖母珍愛諸德。如謙遜、仁愛、心熱、救靈等皆是。聖若望、伯爾格滿及亞爾方索等，敬禮聖母無原罪，格外誠懇，多蒙聖母眷顧，錫以神恩，求伊等轉達。

祝言

初六日 畏避小罪 敬禮第二日

定像 想見聖母泣人罪於十字架下。

特求 求主賜我聖寵，俾增我憎惡微罪之情，而深知畏避。

第一端 小罪傷聖母之目 我欲悅樂聖母，而承其恩寵，必宜心清

神潔、避諸罪過。蓋罪雖微小、實傷聖母慈目、而爲其所深惡。何則、因人獲小罪、靈魂實被獄魔之毒、如生瘡疥於玉肌、而損其華麗也。維斯靈魂之華麗、乃聖賢所寶貴、天神所欣慕、耶穌聖血之重價所代贖者也。一旦以微罪損之、聖母能不爲之目擊心傷乎。思念及此、自當戒慎怵惕、畏避小罪、更當畏避習犯之小罪。庶幾不傷聖母之目、永承聖母之歡、而蒙其恩錫也。撫躬猛省、殆未免瑕疵百出、而阻聖母恩寵之泉流乎。亟宜痛懲、改諸小罪。

第二段 小罪傷聖母之心 吾人在天主前、不但罪之大者、增我主苦難、卽罪之小者、亦增吾主苦難。吾主爲聖母愛子、而我乃有意挫磨之、豈不傷聖母之心乎。夫人戒犯大罪、不敢從新釘死耶穌、固已。然不知努力自勉、稍行克己之功、而故犯微愆、將被釘之耶穌、屢加

以苦痛、抑何忍哉。捫心自問、恐一年之內、一月之間、此類之行、不知凡幾。如是者、若向聖母而言曰、聖母爾爲我母、我願愛爾、且願愛爾子耶穌。我不欲置爾聖子於死地、釘爾聖子於苦架、然姑逞我私意、日常加以微痛、應不至大傷爾心。噫、若是而可謂慰聖母之心哉。不能慰聖母之心、猶可望聖母之恩哉。深心悔恨、求聖母爲罪人之托、賜我加謹於素犯之愆而改之。

第三端 小罪遠人於聖母 孝子之於慈母也、終身不失孺慕之誠。卽不得已而作客他鄉、亦時切旋歸之志、冀承膝下之歡。爲子者宜然、而信友之於聖母、亦莫不宜然。故達尼老等聖人、切願速離塵世、早得享見聖母、永侍左右。因彼熱愛聖母之誠、較世間純孝之心、有過之無不及也。乃我自問生平、語言行事、不知戒愼、日多罪過、重添

日後煉火之薪。則是甘延歲月於煉獄，不惜與聖母久離，而猶誇於人曰，吾願熱愛聖母，其誰信之。求聖達尼老轉祈，賜我有愛敬聖母，恃怙聖母之實德，不愧爲其佳兒。庶幾蒙其慈惠。 祝言

初七日 宜則效聖母之德 敬禮 第三日

定像 想見聖母在納匝肋，潛居一室，幾無人顧問。特求 求主賜我聖寵，能日增德業，恒爲聖母孝子。

第一端 聖母爲謙遜之表 聖母生平之德，其最著者，一曰謙遜。二曰順命。三曰含忍。今在無原罪瞻禮之前，可深思之，而則效之。庶能慰其心，而蒙其寵也。據明師之論，好潛修其德，喜人不己知，而樂受人藐視，是爲謙遜者之實行。而聖母一生，無非如是。偕吾主三十年同居下邑，隱藏其種種超奇之福德。一切行止，宛若平常婦女。及吾

主敷教三年，德化流行，事功赫濯，而聖母不與焉。當國人踴躍歡呼，迎主入城，顯榮已極，而聖母亦不與焉。獨於吾主受釘山頭，身懸苦架時，聖母侍立其旁，備見吾主慘苦之狀，備聞惡黨侮辱之言。此無非欲立謙遜之表，以示我也。乃我於行事之間，每尋榮顯之機會，爲釣名沽譽之地。卽或有時偶行謙遜之功，亦不免隱懷求榮之念。若是而謂效法聖母，信乎哉。讚揚聖母備極尊榮，彌深謙德。自媿最爲可憐，猶多倨傲。定志於傲魔來誘時，謙心向主曰：主憐我罪人。

第二段 聖母爲順命之型 觀聖母順命之行，知其極珍斯德。而爲其子女者，當師法其儀型。至論聖母之順命，於理爲至超，於事爲至備，於品詣爲至純。當三歲入堂之後，謹守堂規，恪遵長命。居若瑟家，雖尊爲天主聖母，而其性之和順，更著於外。凡起居動作，無不隨聖

若瑟之意。責撒肋爲教外之王，而聖母一聞其報名之令，卽速裝就道。產子無損童貞，乃取潔之禮可免，而仍行種種行爲，無一非順命之極則。我欲承歡膝下，必須勤修聽命。凡命之合我意者，固當聽之，卽命之拂我心者，亦宜聽之無違。不論命出何人，命行何事，恒宜根於信心，憑於愛德。視長上代天主行權，而遵行之如奉主旨。問我於斯，果何如乎。苟願修全斯德，當求聖母輔佑。日中行事，務使斯願無虛。

第三端 聖母爲含忍之式 聖母爲含忍之德，歷盡艱苦，抑制本情，翕合主旨，實造乎其極，而無以尙之。蓋天主之磨煉聖母，而苦其心志者，爲數實多，爲事最巨。而於利刃刺靈之際，非但無一念之憤慍，無一言之怨尤。反以爲親陪吾主苦難，適所以證其愛主之真誠，肖

似吾主之機會。因是茹苦如甘，安心忍受。吾人居涕泣之谷，不乏含忍之資。惟鮮能具含忍之德，是以每逢艱窘，便覺志餒心灰。今求聖母轉祈，賜我師法其表。 祝言

### 初八日 聖母無染原罪

定像 想見教皇比阿第九位大會天下主教，定聖母無原罪爲聖教會信德道理。

特求 求主賜我聖寵，得純愛聖母之情。

第一端 聖母始胎無染原罪 今日爲聖母孝子渴望之期，懽忻之日。聖教會願普天人士，倍切惻誠，喜慶聖母者，有三義也。一、喜今日爲聖母始孕之期。追溯開闢之初，天主曾許原祖，來日將有一女足躡魔頂，而邪魔不能施其分毫之毒。今日聖母應斯預言。因天主全

能之旨，賴聖子救贖之功，受孕時毫無原罪之累。且滿備聖神恩寵，實爲獄魔撓敗之始，正爲世人慶幸之緣。故我於今日，宜與諸神聖慶賀聖母殊福，偕聖母頌謝天主奇恩。旣爲聖母之喜慶，亦爲我人之喜慶。可望善供子職，將有一日與分於聖母之榮福也。日中每向聖母曰，聖母純美，無染原罪。或曰，我樂之緣，爲我等祈。

第二端 教宗欽定信德道理 二、自古聖教信聖母無染原罪，而未爲定論。一千八百五十四年，中曆咸豐四年教皇比阿第九位，於斯日定聖母無原罪一端，爲我人信德道理。是日也，羅馬士民，咏頌歡慶之聲，振動天地。遠近聖教廣揚之邑，莫不懸燈結綵，以誌懽欣。不啻厄弗索公會議，四百三十一年以聖母爲天主聖母，定爲信德道理，而都人士不勝忻樂，尊榮聖母也。想當時聖教中諸公卿牧伯，行



此大禮所切望於聖母者，亦在保佑聖教昌明，信民清泰也。我在今日，尤宜求聖母屏藩教會，摧伏仇魔，使普天率土，道一風同。羣羊之散亡者，咸歸一棧，惟一牧者牧之。若望十篇今我倍切虔誠，將我與祭領主串經等種種善工，獻於天主，并向聖母曰：吁，瑪利亞，無原罪之始胎，我等奔爾臺前，望爾爲我等祈。

第三端 天主降世贖人先兆 三、慶賀聖母無染原罪，卽喜吾人救贖之恩已近。按依撒義亞先知云：天主降世贖人，自見奇兆，有童女婉子。七篇今斯婉子之童女，已孕母胎，則知救世之靈奇，亦當不遠，卽真天主將降爲人。因是世間，有爲天主而兼爲人，且爲人而兼爲天主者矣。今日聖母孕於母胎，而十七日後，卽月之廿五日，爲耶穌真天主真人聖誕之期。一月之間，兩大瞻禮，互相輝映。今我熱心行

斯聖母瞻禮，卽所以預備領救贖之恩。可細味亞物海星，或又聖母經等句語。祝言

默思天主本性尊美諸端

### 初九日 萬物證有天主

定像 想見天主謂古聖梅瑟曰：予爲自有者。出谷經三篇  
特求 求主賜我聖寵，俾不忘天主在監，時欽天主之尊威。

第一端 證以性理 人生宇內，所以爲萬物之靈者，以其能辨是非，分真僞，弗致捨本而逐末也。俯仰天地之間，品彙甚多，族類各殊，察其性之所由來，原其理之所由起，蓋莫不有生之之大原。惟斯大原，卽所謂天主。其能無窮，造成萬有者也。若無天主，卽無天地萬物，斯乃不易之定理，亦爲信德之要端。今我之爲人，思言行動，無一不圖

利己。要知我之所以能思言行動者，無非係於天主之恩。乃何以忘却本原，竟不念及天主乎。卽物之與我相接者，殊足動人憶主之情。事之爲我所行者，更可助我敬主之舉。當偕達未聖王向主曰：予靈稱頌主，及諸在我者讚美主聖名。一百二篇我於行事之間，須切戒志驚心馳，而忘天主教在監。

第二端 證以萬物 試觀天高地迴，萬象包羅，而四時之錯行，日月之代明，歷千古而不紊，合萬國而皆同，是孰使之然哉。鐘表之分刻無差，可識工人之精巧。園林之芬芳堪挹，足徵地主之風光。揆情度理，凡事皆然。若之何見斯萬象之燦然成章，秩然有序，而不思天主宰化生保存之德，思有以欽崇而感謝之哉。人之通病，每於習見習聞者，雖事屬精微奇妙，而反漠不關心，是誠弗思之甚矣。修道者，豈

可若是。當偕達未聖王曰，諸天頌揚天主榮，堅定天傳示厥掌之工。聖咏十八篇 務於俯仰之間，自有形之品物，得移情於無形之主宰也。求主滿我斯願，倍切真誠，謹行默想注禱之工。

第三端 證以輿論 吾中國向有敬天之舉，而街談巷議，無不曰人可欺，天不可欺。當勞苦倦極之時，亦未嘗不呼天。甚至冤抑者無所控告，每欲訴之於天。是皆知冥冥中有主宰之者在也。且天下萬國，五大洲中，語言文字，風俗習尚，各不相同，而知有造物之意，若合一轍。故雖蠢如黑蠻，陋如斐洲內地之人，不知禮樂聲教爲何物，而觀其祭祀禱告，祈穀求雨之儀，則必宗仰於蒼蒼之表。可知此心此理，四海皆同。一若同聲相告曰，天主造我等，非我等自造。聖咏九十九篇 亦可證之以達未之言，曰，諸異教者稱頌主，眾民稱頌主。一百十

六篇 求護守天神。時以天主之恩。提振我心。 祝言

初十日 天主本性美善

定像 想見聖方濟各沙勿畧仰天而呼曰。吁。至聖聖三。  
特求 求主賜我恩寵。增我識主之明。愛主之熱。

第一段 天主美善無窮。天主爲自有之天主。無所由生。其本性自  
涵無限量之美善。卽其尊榮富有美麗。皆屬無窮。不但已有之物。無  
不生存於天主。且凡未有而能有之物。亦皆卓備於天主性量之中。  
故人獲享天主。卽享萬榮萬福萬樂之原。而此外之光榮福樂。較於  
天主。俱爲無有。故享天主之福樂者。較於世間享萬福萬樂者。奚啻  
天壤之殊。可知先聖前賢。甘受萬苦。誠求享主。念茲在茲者。決非無  
因矣。則我之捐離世有。從事修途。以天主爲心思言行之歸者。豈非

主之殊恩異寵耶。經曰：予爲爾報，其報實宏。創世經十五篇保祿與安當等聖人常向主曰：天主爲予天主，爲予萬有。旨哉言乎，深發輕世感主之情，萬事務以天主爲向。

第二段 天主美善莫明 人爲受造之物，知識有限。天主爲無窮之主，至奇至妙。以有限之明，不能畢達無窮之妙，無煩置辨矣。我卽才兼世上達人，識過諸天神聖，亦不能洞燭天主性體之奇。蓋輝光如日，可觀而不可盡觀。人之視主，可謂類是。聖賢比以無涯之海，無底之淵，洵有以也。今天朝神聖，享主榮光，心滿意足。而於天主性中，常得新奇之福，永無煩饜。可知主之爲主，真淵淵浩浩，不可度思矣。然人於天主之性，雖未能盡明，要不可以不認識。認識愈真，斯愛慕愈切。今日愛主愈切，斯後日享主愈榮。偕聖奧斯定向主曰：主，我願識

爾，亦願識我。

第三端 天主美善永定 世代有先後之殊，時候有古今之別。而天主之尊，永無代謝。無所謂已往未來，億兆年前後之事，無不悉在其目前，瞭如指掌。人欲言其先，則曰無始；人欲言其後，則曰無終。所謂常然真寂，先天而無元，窅然靈虛，後後而妙有者，景教碑語是也。故推論其性體，誠爲一定不易，永久不移。聖經有謂主追悔已行者，惟援人事而立言，非謂於天主有所更改也。從可知天主固永遠愛我，自無始早有意生我於今世，存我於無終。且我若善副其愛情，更將賜我以無窮榮福。言念及此，卽當感激於心。我不能以心之不易者愛之，豈不能以心之有恒者愛之哉。偕聖母感頌天主。 祝言

### 十一日 主性至純無量

定像 想見一汪洋大海，無邊無岸。

特求 求主加恩賜佑，光照我明，益增我愛。

第一段 主性至純 天主爲至上尊神，純一不雜，無聲無臭，無形無像。然謂其全爲目，而無所不見，全爲耳，而無所不聞，全爲手，全爲口，而生造萬彙，訓諭羣生也可。卽謂其無目，而自無所不見，無耳，而自無所不聞，無手無口，而自能生造萬彙，訓諭羣生也，更無不可。分而言之，全能異於全知，全知別於全善，公義非仁慈，仁慈非公義。合而言之，則全能全知全善，以及仁義諸德，同是此性，同是此體，同是此至純至一之天主，而未嘗絲毫之有所異殊。斯理也，解之難釋，悟之難明，而要爲信德之端，決不可有所疑惑者也。昔吾主訓吾爲全人，如在天聖父爲全美。瑪竇五篇全人者，修純一之德者也。凡語言無



巧飾、行事無詐僞、特與長上周旋、竭惓欸之誠、心口如一。在主前何如、在長上前亦當何如。苟有所求、卽并己所求緣由、直陳不諱、全無隱伏之私。總之起居行止、恒能率己真性、盡己實情、而無一不出於正理。如是方可謂之全人、方可謂肖似主之純德。聖若望、伯爾各滿曰、我於長上前、如一泓清水、盛於晶杯。予靈、尙其勉之。

第二端 主性無量 天主性體、雖至純至一、乃亦廣大無窮、六合不能爲邊際。經曰、諸天之天莫能容。衆王經三卷八篇而天地萬物無不充盈、無所不在、無微不照。我於誘惑艱難時、天主亦恒與我偕、恒持我力、恒施我恩。無論往何處、任何職、皆可蒙承主惠、與之交遊。蓋我之與主、不啻魚之在水、無不以之是賴、而有不可須臾離者也。我能以斯理浸潤我心、則身靈自多裨益。試畧言之、一、隨處隨時、常嚴

十視十指之防。不敢絲毫自縱曰。今我獨居。無人聞見。二、殫心勞力。作事忠勤。無心於他人之視聽。亦無意於長上之稱賞。我身既全屬於主。我行亦全係於主。而心志易得正誠。三、恒得與主締交。而神靈恒契主心。四、誘惑時更得剛強。危難時愈能果毅。人雖棄我。而至顛沛流離。究知主不我捐。主爲我證。主爲我酬。仍能奮勇直前。不媿爲諳於內修之人。而時可精進於德也。求無原罪聖母。賜我於默思主性諸奇。多蒙神益。 祝言

### 十二日 天主全能全知全善

定像 想見耶穌謂宗徒曰。天主無有不能。路加十八篇

特求 求主賜我聖寵。能明識主美。而益深愛慕。

第一端 天主全能 吾人不能明天主造化之奇。亦不能識天主全

能之妙。蓋自無中生有，雖一蠅一蠹之微，非無限之能，不可得爲。故信奉天主者，必信認天主全能。曰：我信全能者天主，化成天地。所謂全能者，實含無窮之力。經云：主一言而萬有受成，主一命而萬有受造。聖咏一百四十六篇能於一念間，自無中生成天地萬有，亦能於一念間，滅此萬彙，而別造千萬天地之更美於斯者。故我不數十年前，不知何在。今之有我者，天主造我也。旣天主造我，則我爲天主之物，而神形三司五官，皆當屬天主之權，恒承天主之意。經曰：爾宜忠敬至終，予將與爾永命之冕旒。默照經二篇感發驚奇頌謝等情，務於諸事明識主旨，謹慎恭行。

第二段 天主全知 吾人知識，多賴研求講解，好學深思，漸能精進。天主則異是。其本性旣爲神妙無窮，廣大無疆，不變不易。則其於事

理、必無明昧之別、先後之殊。故凡事物之已有者、將有者、無有而能有者、及未嘗有而易地以觀、或將有者、天主知之、皆明如觀火。卽人之心思意念、至極隱微、亦無能逃厥鑒觀。故動靜云爲、惟求知於主、而務悅樂主心。能如聖伯多祿曰、主、爾知全、爾知予愛爾。若望二十一篇此固修德者之分也。若行事、惟求知於人、多縈情於令聞美譽。外似整潔、內多不義、亦將偕法利塞等同受主譴、可不慎哉。信天主全知之奧、時念天主在監。

第三端 天主全善 可愛之爲善。天主本性爲衆美之歸、萬善之原。獨爲至極可愛、獨能滿足我靈。能貴我富我、加我萬福萬樂。又善者爲通傳已有、好與人同。天主爲萬物之宗、而賜我得生於世、賦我靈性、爲其肖像。又加我超性寵恩、致能上通天主之性。故達未聖王嘆

曰、請嘗且觀。主何飴哉。聖咏三十三篇且其授人規誡、必循人力量、助以寵佑。其受人忤犯、乃動人悔過、引以改遷。蕩子回頭之喻、未足以概主性之善也。我反躬自問、仁善之心何在、能如聖賢之持己嚴密、待人寬厚乎。知所不足、不遑自勉。向天主聖三、虔誠祈禱。祝言

### 十三日 天主至聖至美至愛

定像 想見彌額爾大天神謂諸神曰、誰得與天主比擬。特求 求主增我識主之明、愛主之熱。

第一端 天主至聖 聖德繫於天主本性、其高遠非吾人所能推測。惟至愛者天神在天主座前、不斷呼號曰、聖、聖、聖。蓋其本性之聖、溥於大同。故深愛人之善行、極憎人之罪惡。經曰、爾乃嗜義而疾惡。聖咏四十四篇且其本性之聖、至爲真實、故其示人也、永無差謬。其許

人也，永不食言。昔天主嘗諭古教士民曰：爾宜爲聖，如子爲聖。勒未經十九篇可知。吾人勵志精修，希入聖域，本係天主顯命。所當急務者，不斷防衛己靈，免陷於罪，而日減己平日無心之過。又宜復主當初賦人之聖善，以慰悅主心。向主曰：我等願爾名見聖。聖於我靈，聖於我諸思言行爲。日中屢憶主訓曰：聖者益增其聖。默照經二十二篇。

第二端 天主至美 嘗觀城市宮闕之壯，山川草木之秀，羽毛鱗介之華，未嘗不深歎其美。至於日月星辰之光耀，風雲雷雨之氣化，則若美不勝言。更極於人之心思才力，靈魂之超妙神奇，則又美中之尤美者也。然以之較於天主，不過爲其本性光華之照影。從可知天主之美，無以復加。人若能畧見其美，必將惟天主是愛矣。故偶有世

物之美者，奪爾目，昏爾心，卽當回心舉目，向天主之美。曰：主，請示爾容，我將獲救。聖咏七十九篇或曰：主，速格以救助我。六十九篇若我早能用此良法，必免許多罪過矣。吁，至美之主，我愛爾何遲，我愛爾何寡。日後凡見世美，當習於舉心愛主。

第三端 天主至愛 聖多瑪斯謂人之愛人，因所愛者有可愛之善。而天主愛人，卽畀其善，而使其有可愛之緣。故萬物之如此如彼，皆出於天主之愛，而使其有是美善也。然則其生我爲萬物之靈，卽其愛我於萬有之上。其爲我而生存庶物，卽其爲我而愛此萬有。且因其愛人至切，雖爲造物之主，而願與受造之人，畧分言情，不啻交友。曰：予已弗稱爾爲僕，予已稱爾爲友。若望十五篇又因其友愛之誠，願與人共其福樂尊榮。曰：我有，皆爾有。路加十五篇更願宣其同心。

與人永不睽違。曰：予樂乃與人偕居。喻經八篇噫，慎思此理，能不傾心傾意，愛主於終身乎？求主增我愛德。祝言

### 十四日 天主之睿智仁慈公義

定像 想見達未感謝主恩曰：主治予而予無何乏。聖咏二十二篇  
特求 求主賜我倚主仁慈，畏主公義。

第一端 天主智慮精詳 吾人既信全能者，天主化成天地，亦必信其聰明睿智，爲能統馭羣生，維持萬物，俾各循其道，各得其所，會其極而歸其原也。爲父母者，未有漠然於子女之禍福，而不爲之深謀遠慮。況天主爲至慈之父母，其於斯世兆民，有不敷其顧復恩勤之德者乎？智德經曰：主於眾庶，周徧其用心。六篇蓋於每人之身，施恩加惠，一如獨居於世者。此理雖奧，然思天主無所不在，無物棄遺，亦



得審其一二矣。且經載天主眷顧我人之處，不一而足。曰：自此極至彼極，毅然遂其所欲，秩然處置萬事。智德經八篇曰：予手捧爾，雖爲母者忘其子，予不爾忘。依撒義亞四十九篇因思天主所以措置我者，實有可奇可愛。可奇者，以其能因禍而爲福，轉敗而爲功。觀古聖若瑟被驚，及聖教會被艱諸事而益信可愛者，以其提携指引，助我勝私欲之誘，出世俗之險，而得履修成之路。當偕達未聖王感激曰：主治予，而予無何乏。聖咏二十二篇又曰：我藉主，永不負屈。三十篇定志恒深倚主之情。

第二端 天主公義仁慈 公義出於天主之聖。因其好善惡惡之極，故有善必賞，有惡必罰。賞所宜賞，而無一毫之失於僭。罰所宜罰，而無一毫之失於濫。仁慈由於天主之善。因其本性可愛無比，故量甚

寬宏，心甚惻隱。樂人之遷善，而寵佑以助其成。憫人之爲非，而含忍以待其改。且因天主爲無窮之天主，其公義仁慈悉屬無窮。其公義也，賞則享無限之樂，罰則受無盡之苦。爲賞爲罰，纖毫靡遺。統往古來今之衆，孰能逃厥鑒觀，避其審判者乎。其仁慈也，無論罪人義士，無不受其憫惻。故達未聖王曰：因主哀矜甚衆，銷我逆行。聖咏五十篇曰：予靈稱頌主，及諸在我者讚美主聖名。主乃宥爾諸愆，療爾諸疾，救爾命於死，冕爾以慈愛矜憐。聖咏一百二篇自念生平，屢屢干主義怒，而反多蒙主仁慈。天主於我，每若忘其公義，而以德報怨矣。而我則是非倒置，既昧夫公義之權衡，且受人侵犯，每多耿耿於懷。或見人迷於歧路，不遵訓迪，卽無望其回頭。此豈上主慈惠之心哉。自深媿悔，向主切求。 祝言

## 十五日 天主之浩大崇高

定像 想見達未聖王撫琴而咏曰：巍巍天主，其大無疆。聖咏一百

四十四篇

特求 求主賜我識其尊大，而益崇欽敬。

第一段 天主之浩大證於宇宙之大 天主尊大之思，殊足助人敬

主之心。故聖經多致意於斯，曰：巍巍天主，其大無疆。聖咏一百四十

四篇又曰：主，萬眾之上巍哉，厥榮諸天之上哉。聖咏一百十二篇又

曰：厥巍隆高，舉諸天之上。聖咏八篇又曰：蓋主大哉，宜頌揚至矣。聖

咏九十五篇 欲思主無疆之大，試先以宇宙之廣觀之。夫地球之於

太陽，雖爲渺小行星，然其體亦甚寬廣，周圍約得六萬四千八百里。

倘有人日行九十里，必須歷二年始得環遊。至於太陽之大，更爲奇

妙，較於地球，徑長百有十二倍，身大一百四十萬倍，周圍約七十二兆里。如有人日行百里，必須歷二百年始得周遊。其餘億兆恒星，似若甚小，其實大於太陽者，不止倍蓰。噫，宇宙之大，可謂極矣。然以天主視之，渺若滄海之一粟耳。凡我於誦經拜主時，或在誘感艱難中，每憶天主之尊崇，卽深我謙恭敬畏之忱，則庶乎其可也。感發心情，立定志向，務於天主之事，時深飭度謹儀。

第二端 天主之崇高證於諸天之高 欲推天主無窮之大，更可卽諸天之高，及地與日相去之遠而進思之。天文家謂地與太陽相去之程，折中計算，約有二百四十七兆五十萬里。其每年環周日外軌道之長，不止一千四百八十五兆里。是環日空虛之地，已爲浩浩無疆。然而天主無不充盈其間也。且其與行星與日相去者，多有二十

倍於地球之遠，而相距不止五千兆里。更有恒星與日相去之遙，有十萬倍於地球之距太陽，即較二百四十七兆五十萬里，而又加以十萬倍。更可奇者，據學士之說，每一秒鐘，光行五十萬里。雖其如此迅速，然天上至近之星，發光須三年餘，始克及地。其遠者則有發光數千餘年，始得及地。甚至有發光萬餘千年，始能及地。嗚呼，穹窿寥廓，一至於斯。而經曰：其於主前，猶如朝露之一滴耳。智德經十一篇吁嗟，造物主之浩蕩崇高，誰能擬議哉。然此浩蕩崇高之天主，情甘降世，生於馬槽，而爲襁褓之嬰兒。其愛人而自謙，豈非更奇更妙，更足動人以驚奇感激哉。明日將興聖誕，前九日敬禮，當思倍切虔誠，獲主寵錫。審主工之奇，訝主恩之大。偕達未聖王曰：伊人等因何蒙主睽懷乎，及於人子猶盼視之。聖咏八篇向救世主虔求欽崇之德。

祝言

耶穌聖誕前九日敬禮

十六日

九日敬禮之緣

敬禮第一日

定像 想見依撒義亞先知有言曰、開治主道。

特求 求主賜我聖寵、明悉斯敬禮之緣、而忠信行之。

第一端 瞻禮之奇爲敬禮之第一緣 吾主聖誕瞻禮爲一年諸瞻禮之始、亦爲諸瞻禮之終。爲諸瞻禮之始者、因吾主言行、受難釘死、復活升天諸奧、皆基於誕生降世之期。爲諸瞻禮之終者、因其爲年內末後大瞻禮。尤當虔誠恪恭以行。想吾主與聖母在世、每以此日爲慶期、而思樂夫當年之初度。卽今者榮於天上、尤必欣爲追憶、昭大典於無疆。故我於斯瞻禮之前、宜恭行此九日敬禮。而在此九日

中、謹行內外諸善工、庶可望得瞻禮之恩。且我一年之中、過諸瞻禮、殊多怠忽。今倍我熱心、行斯敬禮、豈非補前愆之一助哉。自訟自承、求主賜我悔改前非。定志於九日內行何善工、以獲主心、以邀主寵。

第二端 聖教之表爲敬禮之第二緣 聖教會欲勉其子民、在聖誕瞻禮前、特行預備。故格外隆其禮制、優其寵恩。一、定於瞻禮前、共有四主日、加工修省、仿復活瞻禮前、有封齋之律。二、瞻禮日、准司鐸於子時行祭。三、并准司鐸行祭三臺、以慶吾主三生之奇。卽自無始生於聖父、及期生於聖母、又以寵愛生於人靈。四、慶日倘逢瞻禮六七、寬免守齋。諸如此類、皆足爲吾人敬主之勸助。可知吾儕之職、固宜倍切熱心、早爲預備。且思此瞻禮爲救贖吾人之大主慶辰、則吾先期預備之職、更當欣然以任、毅然以行。願我敬禮之虔、較往年有加。

靡已，聚精會神。當瞻禮之日愈近，斯愛主之心愈切。

第三端 誕日之恩爲敬禮之第三緣。世之聖帝明王，平日愛民如子，非不養欲給求。而及其萬壽之期，則闔澤覃敷，固有遠勝於尋常數倍者。況吾主耶穌，爲萬王之王，當其聖誕慶辰，有不特沛鴻恩，洋溢乎斯世者哉。況是日爲吾主特選，始居人世之間，始行救贖之工，卽爲上天下地，開其交泰之機者。故我可望於月之二十五日，得主聖寵神恩，賴是寵恩，庶幾改我愆忒，除我惡習，而進於修成之路。然欲得斯寵恩，非預先善備己靈，萬難領受。則當如何慎行此敬禮之工，又可知矣。自審所望者何恩，當行者何德。按第一端所定之志，夙夜勤勞，求聖母轉達。 祝言

十七日

敬禮當有之情

敬禮 第二日



定像 想見古聖梅瑟有言曰、宜行主目所悅之事。申命經十三篇  
特求 求主賜我寵光與毅德、能知何者可得敬禮之益、而用力行之。

第一端 熱願 不知珍重人恩者、必無人肯以恩惠施之。今天主寵恩、爲無價之寶。苟不知珍重、而切願得之、則必難獲。卽有所獲、亦必甚寡。故我於九日敬禮時、首先當有之情、卽切願見主聖誕之期、而蒙主是日欲賜之恩、且憶己神魂之貧困、德功之涼薄、而於當臻之品誼、尙相去甚遠。如是以思、自然願吾主速臨、如病人之待醫速來、而得療其疾病也。天主願我撫我、速格以救助我。主爲佑我救我者、主求毋延緩。聖咏六十九篇日中每誦此類經句、以涵養我心靈。

第二端 堅望 堅心倚望主慈、亦爲九日敬禮至要之務。人能真切

倚望、必將悅樂主心、仰邀主寵。因其於倚望之間、認主爲全能全善、頌主爲至仁至慈也。故聖經記主加惠施恩、每視人倚主之心何若、如二瞽號主垂憐。主曰、爾信予能行此事。彼旣言信。主乃曰、依爾信、成於爾。瑪竇九篇猶言依爾信我神能仁善之誠、可遂爾願。我每乏此倚望之心、或不思天主無窮美善、或過愛在己罪惡之多、以爲雖行祈禱、恐亦無濟於事。是則望德未堅、主寵所以難邀也。不知我罪愈多、愈當趨求主佑。我靈愈困、愈當仰賴主慈。主不云乎、人無病、不須醫、病者須醫。瑪竇九篇偕達未聖王曰、我藉主、永不負屈。

第三端 寬量 吾主固欲施人以嘉惠、然亦欲人宏其器量、以領主恩。經曰、以某尺量度、以某尺量受度。瑪竇七篇斗筲之器、難容一月之糧。半勺之蠡、難注三江之水。量小者不能大受、人所共知也。至於

靈魂之量亦然。欲得天主大恩，必當爲大器以受之。敬主之功極其隆，繕靈之德極其微。如是而得蒙天主大恩者，蓋亦鮮矣。雖天主逾格施恩，有時亦予人以難測。然揆情度理，往往如其量以相加。今我於聖誕前，預備領主大恩，自當振奮我心，恢宏我志，以得器量之寬大。卽審察我身，何事爲主所惡者，慨然芟除。何事爲主所悅者，毅然力行也。求聖母轉達。祝言

十八日

敬禮神益之阻礙

敬禮第三日

定像 想見聖若翰大聲呼號曰：開治主道，正直徑路。路加三篇  
特求 求主賜我聖寵，能去諸神恩之阻礙。

第一端 心意懶 人欲加恩於我，而我阻其德澤之流者，莫如心意懶，一無動念於其間。設有昆弟二人，將祝父壽，其長兄於慶日

前萬事一無思慮，漠不關心，至期惟開鐫獻頌而已。其幼弟乃事事留心，善爲整備，盡其孝敬之誠，以申純嘏之慶。試問二者孰爲歡慰親心，而多蒙其慈惠乎？是不難一言而決。然則信友間，或修道中，每於大瞻禮日，毫不覺神恩之效，其故亦可想而知矣。痛人世之淡漠無心，而多失主寵，求主宥我怠忽之過，力行九日中所定之善工，不敢稍遺。

第二端 放縱己心 靈魂恩寵之第二阻礙，卽其第一阻礙之根。放縱己心，是也。人居塵俗，世事紛紜，物玩之炫異，職分之繁瑣，無一不挂其心懷，擾其思慮，而欲其留神於敬主修身之務，及大瞻禮前，加工預備己靈，以崇敬禮，固覺爲難。故每憐世人匆忙一世，而於靈魂畢竟無益也。我進修院門牆，離濁世囂氣，自當感謝天主。然當知心

之爲物、最易變遷、不可任其放縱。養心之地、苟居之以輕心、將必弛我昭事之誠、損我靈魂之益。故不得不力爲防閑。凡心思之馳騖、言行之急遽、總宜戒之又戒、慎之又慎。須壹志凝神、老成持重、方不愧爲精修棄俗之人。求主增我神勇、凡能攫我心、而阻主恩者、竭力除之。

第三端 志行無恒 心志之游移無定、行事之作輟相參、謂之無恒。無恒乃甚爲躬修之阻。每見善作者未必善成、善始者未必善終。彼淺嘗中輟、半途而廢者、無論矣。甚至操修已久、學行兼優、而因晚節之不終、卒至前功盡棄者、不亦大可哀乎。卽如行一九日敬禮、尙非難事。乃初行數日、畧見虔誠。旣而日漸疏懶、致敬禮之益、未能實獲、遑問其他哉。念已往之蹉跎、作將來之金鑑。多有聖賢明哲、恭行敬

禮，迨瞻禮日愈近，愈切忠勤。我當細心則效之焉。今日爲恭候聖母產主之期，亦可思當日聖母預備主誕，其神情德詣，如何加修，如何純粹。求其賜佑，助我法其萬一。 祝言

十九日

天主降生之奧

敬禮第四日

定像 想見聖若望執筆而書曰，物爾朋已降爲人，居我人間。若望一篇

特求 求主賜我聖寵，能明降生之蘊奧，而體味深之。

第一端 降生之物爾朋爲誰

降生爲人，居我人間之物爾朋，乃天

主第二位費畧，與天主罷德肋一性一體，造化天地萬物之天主。其取吾儕之人性，接於己之天主性，合於己之天主位。雖成一位，而兩性各自分明。實爲真天主，亦爲真人。能受苦立功，滿補人罪，斯乃天

主用其全能，昭其至愛之奧蘊也。以皇皇天主，而爲貧弱之嬰兒，亦其至極謙卑之奧蘊也。倘我於斯至謙之奧蘊，細心尋繹，則不但有以遏驕傲之念，且卽偶逢屈抑，亦可免怨懟於心。庶幾卑以自牧，時覓謙下之機矣。當堅我信德，驚異主謙，悔恨日前之傲。凡誦天主費畧降生爲人之句，重感斯情。

第二段 物爾朋何爲降生 物爾朋降生之故，乃欲補償人罪，拯救我身靈於永禍。此吾人聞之熟，而知之明矣。天主至公至義，欲免人無窮之苦，贖人無窮之罪，必須代人立無窮之功。然而欲立此功，惟物爾朋降世，始可有成。蓋以其爲人，可以立功。以其亦爲天主，可立無限之功。故我能復天主子之高位，可得天堂永福之產者，實賴天主降生，爲我補贖，爲我調和也。保祿宗徒曰：我爲主仇，而得與主相

和。致羅瑪人書五篇。今我感激主恩，并求賜我純愛之誠。每偕聖方濟各沙勿畧曰：上天下地無物足望兮，願竭我希微之愛，酬主聖愛於無終。

第三端 物爾朋降世何若是謙卑 天主降世爲人，一舉一動，皆有無限之功。卽身享安富尊榮，無艱虞困厄，人罪已可盡償。卽揮汗一點，彈淚一滴，人罪亦可盡贖。而必歷千辛萬苦，自生至死，悉爲吾人補贖，自頂至踵，悉爲吾人捐捨者，是皆欲顯其至愛於人，而收拾人心於千秋萬世也。保祿宗徒所云，以無量之愛愛我，洵非虛語。奈世人昏昧，非背棄其恩，卽毫無動念。忖度主心，能不愴然。但捫心自問，我宜還愛於主者，實爲無窮。而我愛主之情，果何如乎。旣履修成之路，能行分外之功乎。能免鄙吝之憾，癩慢之愆乎。悔其已往，慎於將



來。思今日宜加修何善，方可證我愛主之情。向救世主切盼降生之恩。祝言

二十日 天主聖母之福德 敬禮第五日

定像 想見嘉俾厄爾天神謂聖母曰，爾將懷孕生子，立名時稱之耶穌。

特求 求主賜我明識聖母之福德，而益深敬愛之心。

第一端 聖母之預簡 人莫能先擇其母而後生。獨救世之耶穌，既爲無始之天主，將欲降世爲人，自能預選一人爲母，而後受生。得膺是選者，非他，乃達未聖王之裔，聖若亞敬與亞納之女，至聖童貞瑪利亞也。惟其爲天主特選，斯福德尊榮，遠超神聖。今我憶斯榮選，卽當慶賀聖母。且因吾主曾囑聖母爲我等之母，是以亦當自慶。既自

慶得聖母爲慈母，尤當奮然自勉，庶不媿爲聖母之肖子。今我於斯九日敬禮中，增修德業，倍切虔誠，是卽事母之要務也。敬謹跪誦曰：天主聖母爲我等祈，以致我等幸承基利斯督所許之洪錫。因卽留意傳揚聖母之尊榮。

第二端 聖母之福德 聖多瑪斯曰：天主之功，至美無缺。凡選拔人於尊位，必賜以相對之寵恩，使之能稱其職任。今天主旣選聖母於至極之尊，自宜以奇恩異寵，充滿其靈。一、賜其免染原罪。二、以聖寵堅其德性，使其神靈純潔，永無纖芥之疵。三、賜其生子而仍無損童貞。四、始胎時，不但滿被聖寵，且明悟早啟，以致立功愛主，初無一息之停止。天主之愛聖母如是，而其愛我也，亦於千萬人中，擢我於清修之地，或榮我以神品之階。且欲玉成我德，而多賜以逾格之恩。問

我之報效於天主者，果何如哉。感頌主德，懼負主恩。務當自強不息，以酬天主優渥之惠，以法聖母純粹之修。

第三端 聖母之素備 聖母自始孕母胎，至救世主誕生人世，無時不整潔己靈，以備吾主臨格。夫聖母無惡情之擾，私欲之偏，即使未嘗加工預備，固已粹然至潔，可胎懷吾主。而乃慎其五官，謹其三司，畏避塵囂，潛修幽室。凡超性神功之高遠，修靈德業之精深，斷非筆舌所能罄述，亦非意念所能推測。觀其三歲入堂，卽虔誠默禱，超越眾聖。而厥後之熱心益熾，亦從可想見矣。要其所以如此整備者，惟願深契主心，渥承主寵，及早得見救世主降生也。我備聖誕慶辰，亦宜如是勤修。今九日之功已去其半，速當奮勉我志，益熱我心。偕聖母預備主臨，庶可與聖母共承主惠也。求聖母訓我善備主臨之法。

祝言

二十一日 天主將生之期 敬禮第六日

定像 想見聖保祿宗徒曰、及其時已滿、天主遣厥聖子。致加拉他

人書四篇

特求 求主賜我聖寵、恒心待主慰顧之恩。

第一端 救世主來時、在天主許亞當後四千餘年。此四千年中、古祖先知、莫不深望救世主降來。若問其來何暮之故。聖師答曰、人獲罪而卽得天主降生救贖、必不知本性因罪而墮壞。亦不知己身無力以振興。更不知救贖之恩何如大、救贖之功何如奇也。然則此數千年間、世人未遇救世之主、卽無救靈之術乎。曰、非也。天主至仁至慈、既許人以救贖之恩、人可倚望將來救世主之功勳、而得免靈魂永

死。從可知天主將施恩於人。每欲人先識己之困乏。庶幾愈明是恩之寶貴。而愈著其感恩之情。愈驗其沾恩之效。今當欽頌主仁。讚美主智。安心以待救贖之恩。另於神志乾枯之候。恒心禱主。

第二段 救世主來時。在先知預言悉驗之後。古昔天主隨時遣發先知。訓示世人。逐漸預備其心。助其深信救贖之奧。共沾救贖之恩。且使普天率土。得知救世主所立之教。乃至真至聖。蓋天主欲人信一奧理。每示人以可信之憑。欲人修一美德。亦每增其進修之助。其體人柔弱。賜人恩佑。固如是。周且詳也。回首日前。初應聖召之時。或在憂疑之中。豈未嘗身試其事乎。當驚奇天主無限之慈。感激天主至仁之惠。更求天主賜我整備心靈。以致幸承寵錫。

第三端 救世主來時。在世人罪惡滿盈之候。天下人捨本離原。奉木

偶土人爲主，敬無靈頑物爲神。如德亞人雖認真主，然多違主誠，溺於驕吝詐僞，及其餘種種諸罪。而天主不再降烈火以焚燬之，亦不再發洪水以殄滅之，反而大動慈心，將普天之罪，移於聖子之身。遣之降世受苦，補贖人罪。噫，天主之仁深於海，而如山之孽障，不足以塞其流。天主之愛烈於火，而滔天之罪波，不足以消其熱。今日者世人迷心魔妄，甘與天主違離，而天主反加以德澤者有之。且適於辜恩負德，忤逆主心之時，而主乃動其轉機，引其悔過者亦有之。捫心自問，此何莫非事之親歷者乎。宜如何銜感，報主隆情。求天主聖三，賜我切望，待主降生。 祝言

二十一 人受救世諸恩 敬禮 第七日

定像 想見聖若望論物爾朋降世而書曰，我儕咸受其恩寵。

特求 求主賜我珍重吾主無量之恩、報答其無窮之愛。

第一段 生造之恩 聖若望紀萬日晷之初篇曰、厥始物爾朋已有、斯物爾朋實在天主、實卽天主、萬物繇之受造、匪斯無一物、乃物爾朋已降爲人、已居吾內、是知當時降世之物爾朋、卽渾然無始、造化萬物之天主。旣曰非斯無一物、則我之得生於今世者、實賴其造化之恩。我之將存於永遠者、亦賴其保存之德。今我在此數日中、預備慶其聖誕、當還念我所由生、以及神形諸有、悉爲物爾朋大造之功。更幸我生於天主降生之後、且生於聖教廣傳之地、而爲奉教父母之裔。則被天主化育之恩、愈爲溥博。當如何感激於心、圖報其萬一耶。當發愛德之情、并獻心身於天主。凡飲食動作、不敢忘主生養之恩。

第二端 救贖之恩

~~~~~

物爾朋加人恩德，更有大於生存養育者。因其愛人至極，降世爲人。以萬民之罪，悉任於一己之身。甘受千百苦難，獻功勳於天主聖父，免吾人於永罰。卽所謂救贖之功也。聖奧斯定嘗謂，斯功更大於造化之恩。曰：若無吾主救贖而再造，則人受造於斯世，將一無裨益。且天主化，成天地，惟出一言。經曰：主一命而萬有受造。聖咏一百四十八篇而救贖之功，必須親歷萬苦多艱，而後有成。思念至尊天主，降生於馬房，呱呱啼泣，以創救世之始基，必將思有以報之。保祿宗徒曰：生者當不爲己而生，當爲爲其死而復活者生。致哥林多人後書五篇是卽報之之法也。我若偏情未死，求一己之榮，自身之便，有過於仰慰主心之事者，可見無良之甚。而於救世主前，宜抱慚無地矣。卽向吾主曰：願死於我，而活於爾。宜屢誦此言。



恒抑偏私，而無間克己之功。

第三端 承嗣之恩 物爾朋降世，償世人罪債，平聖父義怒，救人出  
地獄之門，贖人脫惡魔之手。其愛人之心，猶以爲未足，更欲吾人承  
嗣天主，同爲天主義子，同得天國之產。斯承嗣之恩，實出於降生之  
功。取吾儕之人性，合於天主之性，而以其天主之性，賜吾人類也。保  
祿宗徒曰：天主遣厥聖子於世，欲人亦爲其子。致加拉他人書四篇  
又曰：我儕旣爲天主子，則承天主產。緣承天主產，得與耶穌基利斯  
督同產。致羅馬人書八篇我平素若能以此念存心，則意緒高遠，行  
事聖善矣。當殷勤黽勉，無忝爾承嗣之位。向救世主，深謝諸恩。祝  
言

二十三日

耶穌聖嬰之德表

敬禮 第八日

定像 想見耶穌語徒曰，弗變爾爲若孩，天國靡入。瑪竇十八篇

特求 求主賜我常保嬰孩之美質，勤修超性諸德。

第一端 聖嬰之清潔 天主物爾朋降世爲人，在襁褓之中，非但嬰孩本性之美質，無不萃於厥躬。抑且顥悟特神，功能卓絕。所有本性之美，悉成超性之德。足爲吾人取法者，首先思其清潔。庸常之嬰孩，心淨無罪，此不過本性之美。而吾主聖嬰之清潔，特見爲超性。因此聖嬰，本爲萬善之源，諸德之宗。且因其深恨諸罪，身受痛苦，以消滅人罪，賜人寵佑，以遠避於罪也。我欲仰慰聖嬰，而承其恩錫，當師法其純潔之德。在此九日中，復定我心志，願失天下萬有，盡罹天下萬苦，不願獲一微罪。并專務存此善心，非因畏主之罰，實繇愛主之誠。謂主曰，再求多洗予逆行，重化我心潔清。聖咏五十篇卽加意慎防

素陷之失。

第二端 聖嬰之謙遜 進思聖嬰之謙遜。凡爲嬰孩、皆謙卑自適、初無驕傲之心。但因不知所有尊高之位、所受卑辱之差、故其謙不足爲功。若耶穌聖嬰、明識自己尊貴無窮、爲世人所宜欽敬。亦明知自己深受屈抑、生於馬房、多爲世人輕賤。然仍不怨不尤、甘心忍受、以補天主聖父之光榮。我若據超性之理、甘受人世之欺凌侮辱、斯爲效法耶穌聖嬰、而可望悅樂其心。故當殷勤惕勵、日進於謙德之修。不願享世俗光榮利祿、而樂與耶穌含辛忍辱焉。求主賜我認識卑微、時深謙下之心、不失謙遜之機可也。

第三端 聖嬰之順命 更思聖嬰之順命。凡嬰孩憑人處置、不知抗拒、不知譏評、不知怨誹。其聽命也、出於自然、亦不爲超性之功。獨物

爾朋雖爲襁褓之嬰，且有天主上智，其坐臥起居，受人使令，知多有未能盡適其宜。然而默默無言，不形勉強者，以其明司所見，知有聖父之命宜行。故愛情所樂，一惟父命是從。夫修德者能日征月邁，遏絕偏私，而語言行止，常契天主聖意，恭行長上之命，宛如嬰孩之樸誠，幸何如也。想聖母見救世主孩提時所著之德，而心領神會，日增其功。我當懇其轉求賜佑。 祝言

二十四日 耶穌聖誕前日 敬禮第九日

定像 想見先知意撒義亞諭怯懦者曰，加神勇，且勿懼，天主將降

臨救爾等。三十五篇

特求 求主賜我今日善爲預備，以待主明日之臨。

第一端 今日之思念 人心常有所思，而每不自覺其思，於是思念

之善惡，悉任其自爲消長，而不能一定。豈知道固有前定者乎。今者爲耶穌聖誕前日，願定我心意念，皆注於明日之瞻禮，以備吾主寵臨。備之若何，首在謹行告解，以潔我心身。次在勤繫聖善之思，以潤我神靈。且於終日之間，記念聖母與聖若瑟，奉責撒肋報名之令，自納匝肋前往白冷一段情形。思其長途跋涉，不遑啟處，何其辛苦。思其數日偕行，相敬如賓，何其端肅。更思其逆旅難容，無人收納，又何其神恬氣靜，謹遜含容。苟存此念，自能虔誠忠敬，倍切熱心，以副聖教會今日之所望也。感發我情，稱頌聖母聖德，每以此事繫懷，庶幾仰效二聖途中之善表。

第二端 今日之心情 人心爲外物所感，每不能自主。然愛欲有權，亦可勉力自持，以合乎事理之中正。天下事理之中正者，莫若與主

相契。故今日者當提我愛欲、振我心情、以善備吾主誕生之慶。一、思皇皇天主、爲救贖我而成襁褓之嬰、則企慕之情倍切。二、待主降臨我心、生活我靈魂、則願望之情彌篤。三、恐我靈未能善備、致吾主容身無地、則恐懼之情轉深。四、念吾主仁慈無量、其心樂與人偕、則倚賴之情尤摯。凡此諸情、可在默想中、一一感發、日中亦每注意。

第三端 今日之動作 我人平素之行、大抵範以規矩、自晨至暮、胥有一定之時。今爲吾主聖誕前日、豈不願破其常例、加行默禱、多勤神業、以盡我預備之工。乃事竟有相反者、每於瞻禮前日、或勞心、或勞力、常覺不遑。一若今日之冗煩、較平日爲尤甚、得無慮事之分心已甚乎。雖然、可無慮也。適於此勞瘁之中、可得預備瞻禮之善法、在乎踴勉從事。內懷補贖之心、合於聖教會今日大齋之意。且於作苦

之時，每憶聖母當日途中困頓，托足無門，卒之身棲廐中，產聖子於馬槽，備受風霜之苦。我尙未至於斯，敢不安心忍受乎。則身雖勤於外事，而神自注於主前。可謂一舉兩得，而善承主之寵佑。求聖母與聖若瑟轉求天主，賜我今日思言行爲，皆中主心。祝言

### 二十五日 耶穌聖誕瞻禮

定像 想見耶穌臥於馬槽。

特求 求主賜我聖寵，能覺聖若瑟與聖母當日之情。

第一端 耶穌聖嬰之可愛 基利斯督已爲我等誕生，咸來欽敬。日

課經 此乃聖教會之訓言，勸普世信人，今日神往白冷，觀吾主生於馬槽之景況，而倍熱其衷情。夫造化天地之大主，隱藏其赫赫在上之尊威，而降爲世間柔弱之嬰兒，果何爲哉。正欲顯其愛人至極，樂

與人偕。且欲令人泯其畏懼之情，而傾心愛慕之也。我今叩拜聖嬰，如見其伸手向我，柔聲語我曰：「苦難者，荷任者，俱來就予，予將慰之輕之。」瑪竇十一篇又曰：「予來非判世，實爲救世。」若望十二篇謹聆此言，曷勝欣慰。伏念吾主自天降世，備受多艱，以引吾人上升天國。其慈惠若此，真覺可愛無比矣。身非木石，能不感深肺腑，而以愛還愛，以心體心乎。雖曰罪深惡重，每切悚惶，而謁其慈容，聽其溫諭，斯虔誠恃怙之心，自不覺油然而生矣。感發我情，稱頌主慈，日中每以主在馬槽之景況，置我目前，以養我神愛之心。

第二段 耶穌聖嬰之貧苦 保祿宗徒曰：耶穌原爲富裕，緣爾等乃爲貧乏。致哥林多人後書八篇且貧乏至於斯極，以致此身至急之需，不得完備。惟見廢屋一間，不蔽風霜，內有馬槽一具，爲其誕生之



處。於是應驗依撒義亞預言，爲痛苦之人矣。依撒義亞十三篇吾主居斯極貧之境，非出於不得已，實係自願之，而自擇之。所以然者，欲訓吾人輕世俗之榮，肉情之快，而修甘貧之德。克己之功也。蓋世俗與肉情，爲救靈之大阻。而甘貧與克己，爲升天之要路。謝主開我斯路，賜我精於神貧苛刻之修。定心立志，務期仿效其萬一也。

第三端 耶穌聖嬰之謙良 曰法子，予性良善，心謙遜。瑪竇十一篇吾主被人輕棄，而身棲敗廐，窘辱已甚。乃竟甘心忍受，毫無怨懟者，非其良善而心謙，奚能若是。夫此馬槽中之嬰孩，卽全能之天主，聖父之上智，先知達尼厄爾所見億兆天神侍奉者也。七篇今者若一無能爲，一無知識，安居於驢牛二畜之中。此其謙德之淵微奧妙，果孰能明之，孰能解之哉。蓋吾主知傲爲諸罪之宗，痛千古以來，被其

毒害者，永失己靈。且知謙爲眾德之根，欲後世之有志修成者，先知務本。故其降生救世，首以謙遜之功，開其端也。謝耶穌聖心，賜我以此訓，并求佑我力行。向耶穌聖嬰，懇切祈禱。 祝言

二十六日 聖斯德望瞻禮

定像 想見聖人舉目仰天，求主爲投石加害之人。  
特求 求主賜我聖寵，能效聖人信勇愛之德。

第一端 聖人之信德 斯德望初亦執如德亞人之成見，竊意救世主當享今世之富貴尊榮，而不至若是之貧苦。故疑而未信，與俗浮沉。及一聆吾主聖訓，而向時之成見，一概破除。卽心悅誠服，爲主七十二弟子之一。迨耶穌升天後，蒙宗徒選擢，晉升六品。其信德與聖神恩寵，並得充盈。勤宣教務，大著靈奇，歸化者日眾。宗徒行實六篇

噫，聖人之信德，何其大哉。今我既得聖神寵佑，破世俗之偏見，而認識真宗。且又幸在修途，聞見迴殊於庸眾。是則信德之根，天主亦嘗種於我心矣。問我發生之信德，能如斯德望之條達暢茂，敷榮成實乎？謝耶穌聖嬰，賜知賤視世榮，信望天福，務於行事間，不離超性之意致，以證我信心。

第二段 聖人之勇德 時異端人見斯德望教化之行，聖跡之奇，心深妬忌。會同如德亞明經士及民間老長，誣以違犯教律，左道惑人，訴之於政部。聖人亦知昌言明道，爲眾所忌，將觸刑戮之誅。然而心無所懼，仍毅然於大眾前，証耶穌爲真天主。斥彼等之強梗，殺害救世天主，抗逆聖神之罪。又指休徵於天，以證己言之實。謂之曰：吾見天門已啟，人子立天主右。宗徒行實七篇，彼等聞言忿甚，拽聖人至

城外投石擊之。聖人欣然就死，致命於耶穌升天後之歲末。噫，聖人之勇德，何其大哉。我終身恐無致命之機，然而聖師謂修道者，統其所有，全獻於主，實亦成致命之功。聖伯爾納鐸曰：斯類致命，於苦爲殊輕，於時爲愈重。蓋言其苦身克己，循規蹈矩，必死而後已也。我能如是不亦懿歟。求主賜我愛慕苦刻之心，而思所當勉。

第三端 聖人之愛德 聖斯德望被人桀石以投，膚裂血流，身已將死，若自忘其苦，效吾主之表，爲其仇高聲求主曰：主，請勿決伊人以斯罪。宗徒行實七篇噫，聖人之愛德，更何其大哉。昔吾主嘗語眾人曰：宜愛爾仇，加恩於憎爾者，祈爲窘難爾，詆誣爾者。瑪竇五篇若斯德望者，洵能遵主聖訓者矣。我受微細難辛，或被絲毫挫撓，自問能有如是之情乎。欽崇讚美耶穌爲爲道致命之宗。謝其賜聖斯德望

首先致命之榮。求其加我毅勇，恒能賢勞主事，師法聖人。祝言

### 一十七日 天神報信牧童

定像 想見牧童夜半護羊，聞天神奏樂空中。

特求 求主賜我聖寵，能覺牧童當時所有之情。

第一端 天神報知牧童 基利斯督降世爲人，實爲救人永命。今既誕生，自宜速報世人。然不報富豪顯貴閒散之徒，而報貧賤樸誠勤儉之人。如路加紀當時郊外牧童未眠，守夜護羊，乍見異光四射，各生震怖。天神倏現，謂曰：勿驚，予來報爾福音，足樂眾心。救世主基利斯督，今日爲爾誕於達未郡云云。二篇從可知吾主所重者，超乎世情之外。我儕素位而行，類斯牧人。避塵世之囂，修清貧之德，夙夜匪懈，守護身靈。五官之用，惟其謹，心情之動，惟其慎，則吾主亦將照以

寵光、慰以聖訓。而此心歡樂、不啻牧者之得見異光、得聆福音也。慶賀牧童、獨能躬逢其盛。求主賜我與分於牧童之福。定志加意謹守五官。

第二端 救世主之標記 天神曰、但見襁褓小嬰臥馬槽、斯爲標記。同上小嬰者、謙遜之標記也。襁褓者、寒素之標記也。馬槽者、克苦之標記也。天神以此三者、欲牧童知爲救世主、又欲吾人共知爲救世主也。其義何居。解之者曰、救世主爲救贖人罪而來、而人罪莫不根於驕傲貪財縱欲之病、須用三者之藥以醫治之。且救世主欲授人避罪之方、導人救靈之路、故於誕生時、卽先行其言、示人以謙遜甘貧苦刻之表。夫耶穌爲襁褓小嬰、置於馬槽之語、吾儕聞之熟矣。然恐未嘗深思其義、亦不明天神所告之標記謂何。并不知救世主一

生之行，早基於是。而衷懷淡漠，亦何神益之可蒙乎。須知凡默想主之法言懿行，必須細味其中奧旨，先務得心志之明，而後可望情意之動。求耶穌加我以神光，增我以聖愛。凡於誦書默禱，慎無泛濫淺嘗。

第三端 光榮救世真主 天主欲光榮已聖子之誕生，因遣千萬天神，歌頌於空中。經紀多神俄見，頌聲滿空曰：天主受享榮福於天，良人受享太平於地。同上吾主生於貧苦，謙卑至極，而羣天神同聲歌頌，謂其能補天主之光榮，賜世人以和樂。可知天神之欣喜，正在天主顯榮，世人安睦。而救世主之休功，適在尊崇上主，調變兩間也。今我聆天神之言，豈不欲在此良人之數，而獲享太平乎。惟當心善意良，堅定我慕義求仁之志。庶幾仰能平安於主寵，俯能平善於人間。

食德飲和、神形康泰、而得榮主於世、受福於天也。偕天神感頌耶穌。  
祝言

二十八日 牧童往詣白冷

定像 想見牧童望白冷而急步前行。

特求 求主賜我以牧童見主時、所有之情。

第一端 牧童相勸 天神散去、牧童胥言往也、亟至白冷、往視天主

今、攸爲奇、而示於吾。路加二篇可想天神去後、牧童始相聚議、思天

神所告之事、若是其奇、固出於今宵之意外。思救世主誕生之處、若是其貧、更出於平日之意外。但若欲赴其地、而觀其事、則風霜凜冽、且慮深夜難行。卽謂午夜衝寒、而攜手偕行、不慮牛羊將誰爲守護乎。然而牧童絕不計此、振己善心、彼此勸勉、踴躍起行。此卽吾人勸



善之表也。故修德者居一堂一院，固當同心同意，專務修成。又當交相激勵，勸善輔仁，爭先求謙愛和平諸德，庶無愧於牧童之行耳。問我之於人，果能如是乎。謝主賜我以諸昆弟善表之恩，求主寵佑，使能師從人善，更務自端品詣，有以矜式同人。

第二段 牧童急行 牧童主意既定，再無疑慮，遂惓惓就路，往拜耶穌。聖史謂其急行云。同上其行之所以急遽者，有三德。一、不疑天神之報，而信德活潑。二、殊切見主之心，而愛情懇摯。三、希主賜恩降福，而望德堅貞。斯何如善表乎。夫往拜耶穌，非特牧童有是機也。每日晨起，護守天神，亦喚人速往拜主，而獻其一日之思言行爲矣。且吾主顯其至愛，日夜隱於聖體龕中，人能及早趨拜之，自必多蒙其恩錫。是以熱心之輩，每不敢脫畧於斯。而我果能敬拜維勤，無荒無怠。

乎。抑或嬾於晨興，每多簡忽乎。求主恕我前日疏慵之過，定志聞鐘聲速起，急行默想以前拜主之功。

第三端 牧童見主 牧童既至白冷，天神所示之處，乃見瑪利亞暨若瑟暨臥於馬槽嬰孩。同上當時牧童趨進馬房，見夫巾幘端莊，肅然可敬者，聖母也。見夫鬚眉俊偉，藹然可親者，若瑟也。見夫馬槽中襁褓嬰孩，淒然可憐者，肉目雖不覩天主神威，而信德之眼，實識其爲救世真主耶穌也。斯時牧童所覺之神情，所受之恩錫，豈可以言語形容乎。今祭臺上之耶穌，較於馬槽中之耶穌，更爲隱悶，更難見其本真，然而我嘗聞吾主親傳之訓，更明於牧童所聞天神之報。若能堅我信心，虔誠致敬，豈不將愈見信德之功，而多蒙信德之賞哉。偕牧童敬禮聖母聖若瑟，朝拜吾主。 祝言

## 二十九日 牧童宣傳主誕

定像 想見牧童無任欣喜，隨遇人告以主誕。

特求 求主賜我聖寵，俾與吾主交際之餘，能有牧童之熱心。

第一端 牧童傳言主誕 牧童既見吾主，盡誠致敬，拜禮獻儀後，各欣然旋返。聖路加言其於聞見諸奇，頌揚天主以歸。二篇是則牧童見主之功效也。夫芻蕘之徒，詎解頌揚之盛事，而乃一見傾心，頌揚載道，直欲令斯世咸來朝拜者，何哉？愛主之心，既不勝灼熱於中，斯頌主之言，自不禁流露於外也。問我誦經默禱，與祭領主之餘，亦能心熱於中，而德輝於外乎？主嘗曰：口所言，出於心所盈。瑪竇十二篇若愛主之念，果盈於心，則往來酬應之間，必有一二善言，出之於口，以顯揚主榮矣。求主賜愛情之味，涵養我靈，愛情之火，炙熱我心，并

隨時務以嘉言法語，感格他人。

第二段 時人徒聞主語。經曰：聞者驚愕牧童之言。同上牧童興言先知古祖渴望之默西亞，已誕生於馬房。天神如何顯現，如何告語，如何賡歌。奇矣哉！果足駭人聞聽矣。吾意時人驚愕之餘，必將迅速趨前敬禮，不遑授館，爭先延至其家，是固理之所當然，奈何徒深奇異，毫無動靜。詎非疎慵頑鈍之極歟。我每思吾主降生誕世諸奧，亦嘗驚愕吾主之德能。然徒知驚奇駭愕，而不隨吾主之訓，不效吾主之表，亦將安所用哉。適見與當日聞牧童之言者，同病耳。今者我當神往白冷，跪伏馬槽前，朝拜耶穌，感頌其恩，熱心愛慕，以補世人之冷淡無情。定志善行默禱之工，而不虛此實效。

第三端 聖母心藏主言 瑪利亞聞牧童之言，見牧童所行，乃懷於

內、乃符於心。同上由此觀之、可知聖母之行、與時人絕然迥異。凡所見所聞、事有係於聖子者、如日前身領天神之報、往見依撒伯爾等事、今日聖子誕生、天神現示牧童諸奧、俱蓄於心懷、以作隨時恭默思道之題、亦爲此生陶情淑性之資、更爲後日宗徒信史之助。論者謂聖路加於耶穌傳教以前行跡、紀之獨詳、多自聖母口授、良有以也。我當效法聖母、於默想聞道後、審如何可獲心靈之實益、而黽勉求之。凡自晨至暮、每舉所得之寵光、所有之善念、以培養心情、增修功德、則庶乎其可也。偕聖母聖若瑟敬拜耶穌。祝言

### 三十日 虔誠事主之緣由

定像 想見聖保祿宗徒語我曰、宜知恩而虔誠事主。  
特求 求主賜我事主之虔誠。

第一端 爲天主之故 半月以來，日思天主聖子降誕之理，而憶天主無限愛人。旣念天主無限愛人，當思何以還愛天主。保祿宗徒曰：宜知恩而虔誠事主。故我可進思虔誠事主之緣由，以知自勵，以酬主愛。其緣由之繫於天主者，卽謂天主生養保存我，降生救贖我。天主此心，早存於未有天地之先，實以無窮之愛愛我。所以聖賢恒自謂曰：天主愛人之心無窮，已於無始之際，爲我謀畫，爲我經營，作爲今我一生，爲時甚促。卽盡心愛慕，竭力奉事，猶未能仰報洪恩於萬一。況復心慵於主事，情繫於世幻，不知盡我有限之時，以勉效涓埃之報。亦何面目，以見至仁之大主乎。作如是想，自能振我全神，以求精進於德焉。余靈，盍以天主永愛吾人之思，改我怠忽因循之弊。求主增我神愛，日內時發愛主之情。

第二端 爲自身之故 善人虔心事主，誠爲愛主，然卽所以自愛。蓋善於自愛者，能使己身爲肖主之身。試問我之所以棄俗修道者，豈僅爲救己靈魂，行平常信友之路而已哉。豈不願愈顯主榮，多修功德，多行補贖，以世苦爲天福之券，而超然列於聖賢之班乎。但既有斯志，必須異常忠勇，始克有成。凡爲善士，恒懼失其初進時之虔誠，而一息尙存，此志自不容稍懈也。念當年初入德門，每覺學如不及，猶恐失之。豈知日復一日，年復一年，志氣漸餒，神力漸衰，德業之修，殆非昔比。嗚呼，歲聿其暮，年已將除，亟宜乘機自省。凡居常所宜行之種種善工，尙有一二如曩日之虔心者乎。祈主還我救靈之樂，而以大德堅之。聖咏五十一篇每自謂曰，曷爲來此修途。

第三端 爲他人之故 凡修德者，不論居何院，入何會，恒宜以利濟

眾人爲心。因是論之，將欲爲人求主赦罪，爲人平息主怒，爲人代禱主恩。俾得寵佑均沾，身靈並救。則必其愛德灼熱於中，全心契主。先爲天主寵渥之人，然後可於主前，易得所求，而不虛所望。噫，若是之人，可謂事主虔誠，而爲成己淑世者矣。爾既有志淑人，須知法之最美，務之最急者，宜先成聖德於身。吾主論己宗徒而向聖父曰：予爲彼自聖，致彼亦得爲聖。若望十七篇旨哉言乎，願深思之，而篤行之。則庶乎其不差矣。求主保聖人轉祈天主，俾我常照上文默想三故，虔誠事主。祝言

三十一日 三百六旬之終

定像 想見一人於歲底，持籌握算，清查計簿。  
特求 求主賜我知己往之得失，以定未來之行止。



第一端 斯年何年 嗚呼、天主之愛我、亦至矣哉。歷觀斯年之中、賜我以本性超性之恩寵、源源不絕、沛若江河。凡存我之生命、養我之心身、護我於諸危險、且或免我於重大誘惑、不致有顛蹶之虞。或賜我以卓異神恩、使能勝艱鉅之任。統計我身內外諸需、無一不被其深仁厚惠。奚啻慈父母之爲己子女、先時而謀者矣。嗚呼至矣、斯年可謂聖寵之年矣。而還問我之於天主、斯年果爲何年乎。天主所欲於我者、我能奉行於年內、而爲事主修身、熱心之年乎。且爲加功增德、精修之年乎。抑爲不忠不信、辜恩負德、多過忒之年乎。感謝主無數之恩、求赦我絲毫未報、反多罪過。日間每懷此意、而倍切熱心。

第二端 斯年何在 吾人一年之中、思言行動、無一不因乎時、此寸陰所以貴乎尺璧也。時乎時乎、不再來、曾日月之幾何、而斯年已去。

我而終矣。思夫勤者修德，惟日孳孳。遏抑其偏情嗜欲，謹守其三司五官，神業諸工，與時俱進。其種種辛勞，今皆已往而不知何在。怠者忘其修己淑人之分，而玩時愒日，不求德業之進修，惟圖肉身之安適。其種種佚樂，今亦不知何在。一轉念間，勤者當何如欣慰，惰者當何如懊惱也。我當靜心自省，且求主光照，能明審我之居常，果何所似。苟能與勤者爲侶，殊堪喜慶。然若與惰者同儔，回思許多有用之時，而未之善用，不知異日將何以當主判之威嚴，恨何如也。速宜倍益虔誠，以稍補年中之缺，亦以增年內之功。

第三端 斯年何往 上言一歲之年華已盡，今日都不知何在。然亦可謂其一一皆在，而未嘗遠去者，何則？年內之思言行事，或善或惡，或勤或惰，其勞佚雖爲陳述，其功過則永遠常留。他日將置天主公

義之秤衡。以定永遠無窮之賞罰。則斯年雖往。亦如未往也。噫。我若  
早能以此念縈懷。自必殷勤黽勉。勤求德業之不遑。寅畏謹嚴。遠避  
愆尤而不染。則將除之歲。已爲主前豐稔之年矣。何至悠悠忽忽。竟  
虛度斯年乎。雖然。往者不可諫。來者猶可追。立心定志。砥行飭躬。庶  
明日新年之相慶。不爲虛語也。謝天神聖人一年之恩佑。并求繼續  
將來之德澤。且懇彼偕我謝主。念吾儕讚頌天主。云云。聖盎博羅削

聖奧斯定合讚

祝言



## 補遺

領聖體日之默想

領聖體之預備

定像 想見耶穌持麵餅語宗徒曰、爾領而食此、此是我軀體、乃爲爾付畀者。

特求 求主賜我聖寵、使領聖體前、善能整備。

第一端 備以信德 我欲領主聖體、得懇摯熱中、多承主錫、自當善爲預備。而預備有遠近之殊。遠備者、先行告解、此雖非不免之例、然究屬有益。且有時亦爲緊要。忒倫得公會議第十三支七章就寢前、預看默想題目、關涉領聖體之義。或未寐或既醒、恒以領主之事縈懷。近備者、思主實在聖體中、而發我活潑之信德。若無此信德、而以

肉目視之，則惟見麵餅之一小分，何能發其熱心乎。倘或見主昭然顯示於祭臺，則當時之情將何如虔恪。然我以信德之目，見主於麵形內者，不啻顯聖跡而示人之真。如是，則恭敬、謙遜、愛德、望德之心，油然而生。向主曰：吾主耶穌，我信爾將全全降臨我心，堅我信德。并定志隨時誦閱講論聖體諸書。

第二段 備以謙遜 人既信在聖體中，實爲至尊至聖，生存救贖，賞善罰惡之天主。自將更深其謙下之心，思己爲卑賤罪人，不堪領主於懷。是以聖教定制，人領聖體前，必三次拊心曰：卑污罪人，辱主俯臨我心，曷以當之。伏惟吾主特降一命，我心諸疾，必全愈矣。推此意義，自念日前罪惡彌身，一無善狀。卽在今日，亦多怠忽淡心之過。所立功德，未能全悅主心。將不禁喟然歎曰：吁嗟耶穌，我何人斯，敢當

爾萬物大主、降來顧我乎。今當在主聖體前、視己如不忠之臣、不孝之子、無顏對己君父、而愈著謙恭。

第三端 備以倚望 主曰、苦難者、荷任者、俱來就予。予將慰之、輕之。

瑪竇十一篇又曰、弗食予肉、弗飲予血、不得生活。若望六篇思主此

類諸言、雖畏懼主尊、亦當生倚賴願望之心。且愈覺在己昏愚柔弱、愈當恃怙主仁、渴望主臨、加我寵光神勇。蓋此願望之情、爲領聖體者所宜有、而吾主亦深欲於我人者也。故於領主前、可向主曰、至仁至甘之耶穌、昔爾在世、每與罪人言談坐食。且嘗謂病者須醫。我多罪過、身神病憊、懇主速來療我治我。我乃最爲可憐、望主愈著仁慈於我。偕聖伯多祿格拉伯爾向聖母祝禱曰、懇求聖母、分爾聖心一星之火、爍熱我心。更望聖母肯以爾聖心、假我片時。庶恭領爾聖子、

盡我所宜。 祝言

### 領聖體指要

人領聖體，每歎己心神枯槁，不知所思，無能如聖善靈魂之意，致深宏，多嘗神味。夫聖善之靈，所有熱心之意，隨在變通，不拘於法。然領聖體前後諸工，未嘗無法。我可推求忠悃，取其意義，是爲領聖體指引，亦熱心之一助焉。

一、前夕。就寢將寐，可思身將領主聖體，計吾主未來之前，尚有幾多時刻。自謂曰：明日某時，天地萬物大主，欲臨我胸中。我心爲天主之居，而得有天神所無有之福分，榮何如也。噫，我願終夜祈禱，備主寵臨。請求護守天神，主保聖人，代我欽崇讚美，補予不及。

二、清晨。將起身，想像吾主語我，如昔語撒格曰：速下，今日我當舍於



爾處。路加十九篇卽踴躍而興曰：主，予何敢當，我乃貧者窮者，主何賜我若是之榮。予靈當歡慶曰：爾之貧乏將濟，爾之疾病將醫，爾之悅樂將充盈。吾天主，我願有至愛天神之愛，至潔聖母之心，俟爾寵臨。盥洗時曰：再求多洗予逆行，重化我心於潔清。衣我以天筵之禮服，潤我以諸德之光瑩。

三、將領聖體。倍切熱衷，發信望謙遜諸德之心，一如上章之義。求護守天神與主保聖人，一在左，一在右，引我赴天神之筵。

四、領聖體時。想像己心宛如白冷馬舍，瞬息間吾主在焉。卽偕聖母，聖若瑟、天神、牧童、三王，伏拜主前，感發欽崇、驚奇、謙抑、感恩、欣躍、愛慕、祈望諸情。

五、領聖體後。聖女德肋撒謂時在領聖體後，爲向善之靈魂，最爲珍

寶。其行感謝之工，連數刻之久，不覺爲長。以其善發諸德之情，如上端所指，虔誦領大赦經文，復避靜內所定之善志，修道人所矢之聖願。更以神形諸有，統獻於主，益熱立功修德之心。修道者志切救靈榮主，以普天教務爲懷，偕同天朝神聖，求主滿教宗及五洲主教神父之願。賜以教行化浹，正道昌明。求主賜諸外教者，棄邪歸正。使天下萬民，稱頌主名。求主消滅異端邪妄，馴伏聖教諸仇。求主賜帝王和睦，及萬民太平。末以種種祈求，託於聖母。將普世萬國，另以中國人民，置吾主足下。哀求吾主垂憐矜憫，挽之於迷途，救之於永死。可與聖母言聖教定其無原罪之端，爲信德之理，嘗顯其莫比之榮。今還懇聖母轉求天主，早賜聖教廣揚，以免聖子聖血受諸侮辱。此爲領聖體前後大略，欲得其詳，可閱師主編卷四之一、二、四、七、十。

三、十四、十六、十七等章。自能多蒙神益焉。

### 恭領聖體

定像 想見吾主坐宗徒中，同食晚餐。

特求 求主加我信心，增我愛德。

第一端 定聖體禮 宗徒及聖史記吾主定聖體之禮，授司祭之權。

謂主受難前，被負之晚，濯宗徒足。後復席，取麵餅，謝聖父，祝聖剖開，分與己徒。曰：爾領而食此，此是我軀體，爲爾等付畀者。爾等行此，以憶我。後又取爵，謝聖父，與徒曰：爾各飲此，是我血之爵，將傾流爲爾及爲多衆，以得罪之赦。瑪竇二十六篇，路加二十二篇，瑪爾谷十四篇，致哥林多人前書十一篇於此可思吾主之至愛，甘願以己至珍體血，作我神糧。又思宗徒之多福，得懷吾主於心，與吾主締結。乃亦

自慶曰、後未幾時、我亦將有此幸、主將經我舌、臨我心矣。發信、望、愛、恭敬、謙遜之情。日中每以主晚餐之事、置於目前、感主奇恩。

第二端 領聖體諭 聖體聖事、原係淵微奧妙、自古驚人之奇跡。故

吾主於傳教之二年、早以斯理訓人、以備宗徒之心。聖若望述吾主之言曰、爾祖食瑪納於曠野、悉已死亡。予乃自天而降之活糧、食者永生。而予畀之食、卽予肉軀、爲世人生命而付者。如德亞人互爭曰、斯人何能與我食其肉。耶穌不但不易其言、且重申其訓曰、予實實語爾、汝曹弗食人子肉、弗飲其血、不得生活。予體真食、予血真飲。若望六篇我謹聆主言、深思其義、自能多得神光、多增神愛、多加神樂、多感神情、以蒙善領聖體之神恩。

第三端 聖體恩效 聖體之效、可考於聖經、而知驗於宗徒者。一、主

愛愈慈。語徒曰：小子，可居於予，而予居於爾。若望十三篇十五篇從前未見吾主語氣如是慈柔，愛情如是親密。二、主情愈見。宗徒自謂吾主曰：主言至明至顯，一喻不立。十六篇三、徒靈愈潔。主曰：爾曹身已潔淨。十三篇四、徒心愈明。蓋與主言曰：今識爾知全，信爾真出於天主。十六篇五、愛德愈誠。而願生死不離吾主曰：使偕爾致命，弗背爾。眾徒說皆然。瑪竇二十六篇此聖體之神恩奇效，宗徒得之於前。我若虔誠善備，亦可得之於後。願將以上所言領聖體預備，及領聖體指要，篤信謹行，可也。聖類斯公撒格頻領聖體，獲益殊多。因其預備之工，極得其精也。誠求聖人轉達。祝言

### 聖體之神效

定像 想見吾主曰：汝弗食人子肉，不得生活。若望六篇

特求 求主賜我聖寵，得明聖體神效，且得驗之於己身。

第一端 聖體增人神潔 信德之理，凡人虔誠預備，善領聖體，可得微罪之赦，洗滌神魂之污，又得遏私欲之偏，制誘惑之猛，免陷於重罪。故聖教會稱爲眾罪之恩赦，預防諸罪之天藥也。忒倫得公會議十三支二章更得寵照新光，愈明罪惡之醜，而不敢復犯。且得聖佑神力，愈能剛毅果強，而退絕罪緣。於是勤領聖體者，靈魂瑩潔，世間無物可比，而大悅天主之目。我若有意於此，可效類斯德表。其每主日領聖體，恒以七日之前四日，爲感謝聖體。其後三日，爲預備善領。謝聖人授斯懿表，更務師法其芳型。

第二端 聖體養人神命 吾主立斯超奇聖事，寓己全體於麵酒之形，爲人靈飽飫。自可知領之之效，爲人超性生命之養。而聖體之所

以養人超性之命者，亦非難喻。蓋猶人本性之命，以其肉身得與靈魂結合。如是人超性之命，亦惟賴靈魂與天主締交。且締主愈密，則神力愈強。據聖濟彼良主教之言，人領聖體，神魂與主深締，甚於二蠟相融爲一。則其內靈之堅強健壯，更可想見。稱爲膏糧及帝王之珍膳，非虛語也。我於諸艱諸誘，迄今若能恒心向善，不至顛仆者，多賴聖體之厚養。能不深感激之心乎？卽我望持守至終，永不失聖召之恩者，亦賴聖體神恩之扶掖。豈不尤宜熱中欣慕，願神魂與聖體相依，而敬行預備乎。

第三端 聖體耀人神彩 聖體增靈魂之美麗，而耀其光彩者，因每變化吾人於吾主之身，使吾人活吾主之命，而得肖似吾主也。聖奧斯定代主語人曰：予乃豪族之糧，爾可食予。然非爾變予於爾，爾將

受變於子。聖多瑪斯曰：嘉樹接於野樹，革野樹之性，而使生嘉實。吾主聖體亦然，接於吾人，革吾惡習，通傳其美德，使我偕其生聖善之花實也。慎思此理，知聖體能移易我性，增益我神形之美者，非尋常可比。尙其欣慰深之。然要不忘此神恩之高下，依人修業之淺深。我據以上所言預備，與指要之義，而虔誠恭領，可也。念聖母懷主於心，其所得恩效，超諸天神意想之外。慶賀之，羨慕之，求其賜佑。祝言

### 聖體爲質

定像 想見吾主謂我曰：爾其識主恩錫。若望四篇

特求 求主賜我聖寵，能明吾主於聖體內，給何憑証於人。

第一端 仁愛首榜 人之交友朋者，不惜貲財，以致傾其產殖，斯爲世所鮮有。若爲友朋身居牢獄，代受縲紲，更爲千古罕聞。至論爲友



朋之故、受慘酷極刑、終至捐軀捨命、愈爲人事之所無、而出人意外。然而此類諸行、吾主皆行之於我、而猶爲未足、又以己全體爲人飲食、若欲變化吾人、與之共爲一體。曰、領予體、飲予血、伊懷予、予懷伊。若望六篇於是謂聖體爲仁愛之首榜、不亦宜乎。不幾時、我將往與祭、主亦將標此榜於我身、我豈無以表還愛之心乎。主曰、爾行亦當若此。路加十篇我爲爾如何行事、爾爲我亦當如是行之。爾恒宜如是存心、寧失貲財利便、以及肉身性命、不敢犯一小過、使我心愛。余靈、我果能之乎。求主寵佑、專務得斯神效。

第二段 真福之質 聖保祿宗徒曰、我人皆將復活、然非皆能變易於基利斯督之榮光。致哥林多人前書十五篇善人復活、肉身有光明、無損、迅速、透實、諸奇。惡人復活、其身醜陋重濁、痛苦難堪。吾人避

禍求福，孰不望將來榮光之復活，而享真福之常生。然據聖教之訓，吾主於聖體聖事，實授人榮光復活之憑。故司鐸送聖體後，每感嘆曰，聖哉主筵，於是領基利斯督，而交後日榮光之質。聖事禮典斯訓之理，實出自吾主之言。蓋嘗曰，食予肉，具永命，予末日復活伊。若望六篇觀此，我當切望領主，不第爲靈魂之福，亦爲肉身之榮。且斯榮福可登之級，幾無限量。聖保祿曰，此星之明，異於彼星。死者復活，亦然殊等。致哥林多人前書十五篇須發信望之德，凡遇可領可不領之間，不敢失其機宜。

第三端 增榮之券 聖體不特爲榮光復活之質，且爲加增永福之憑，其理不難明曉。按聖經言，人榮福之度，準其德功之量。曰，主度各人功行以報。瑪竇十六篇然功行之得爲超性，而獲天堂之報者，惟

愛德是賴。故人愛德愈增，則其功愈大，將獲報愈厚。而愛德之增，乃爲領聖體最先最大之恩效。是知聖體爲加功於世，增榮於天之券。洵有以矣。能不願頻領之，以益我身靈榮福於無窮耶。聖達尼老得天神二次送伊聖體。可求之助我善備，得領天神之糧。祝言

### 聖體爲諸奇異之標跡

定像 想見達未聖王撫琴而咏曰：吾至仁至慈之主，建立諸奇異之標。

特求 求主賜我聖寵，明識聖體內所蘊諸奇，而深感激。

第一端 奇奧之標 聖體爲耶穌全體，其聖血聖魂無不俱備。然耶穌爲天主聖子，生於天主聖父，與聖父共發聖神。是耶穌聖體所在，聖父聖神亦在。而天主三位允咸赫臨，是聖體爲三位一體之標也。

且吾主以其全知，得斯至奇之法，定斯聖事，膳養我人。以其至愛，在斯聖體聖事，永結我人。以其全善，分斯無窮之惠於人。以其全能，成斯奇奧之跡。以其慷慨，盡其所有付畀於人。是聖體爲天主本性諸美諸德之標也。卽吾主曩時受難贖人，今日加人寵佑，將來復活我人，賜以永福，莫不以斯聖體爲標記。我自幼至今，領主聖體，不知次數。亦嘗記憶其中所蘊諸奇，而感激主恩乎。今我深心謙遜，求主赦宥。偕達未先知稱頌吾主曰：吾至仁至慈之主，立斯奇異諸事之標跡，以食諸敬畏己者。聖咏一百十篇日中屢誦此類經句，以感主恩。

第二端 異能之跡 聖體聖事，顯天主全能之奇。一、以司祭數句經言，麵酒變爲耶穌全體。二、麵酒惟存其形，而無其質。三、吾主渾身全體，寓於麵酒之形，且全寓於麵酒形之諸分。故形雖分析，而聖體不

剖。四、一身居千萬區處。五、猶是此身，在天榮光莫比，著本來面目。在地隱於他物之形，不露聲色。如是諸類，目雖不見，智雖不及。然悉爲信德之端，永無疑義。我能堅信德於內心，著信心於外行。在聖體臺前，能虔誠致敬，主前必愈得爲功。蓋凡人信主奧理，皆係目所不見。獨於聖體之理，所信者且有反於目所見，口所嘗，鼻所嗅，手所觸者也。當發信德欽拜之情。天主旣多行奇事於我，我當務善行預備以領主恩。

第三端 至德之標 吾主於聖體聖事內，更以諸德之表，垂示吾人。隱於卑微物像，掩己尊榮，雖知人將簡慢，而亦不之顧惜，示其謙也。司鐸之品詣，無分高下，行祭誦經，立時臨格，任其措置，示其順也。被人瀆冒，受人侮辱，不震赫怒，示其良也。樂與人偕，至於世沒，永不睽。

離示其愛也。寓麵酒形內，不限時日，至形像壞而後已，示其恒也。且常作我主，作我醫，作我師保，守其在世之職掌，加恩賜佑，示其忠也。嗚呼，慎思此理，細觀此標，人非木石，能不圖師其德，而報其恩於萬一哉。向耶穌聖心激發衷情。 祝言

### 月省條目

一、敬主 自晨至暮，神業諸工，毫無減短否。悉遵規矩否。盡誠竭力，務有熱心否。於是細審默想，與祭，公私省察，告解，領聖體，拜聖體，看聖書，誦玫瑰經，飯前飯後經，及恭敬聖母，與護守天神，及主保聖人，種種諸工，行之何若。又省日中行事前，正心誠意，行事後，畧行察閱，行事間，思主在監，屢念誦句，與主結契，皆能行之惟勤，寸心無愧否。

二、待人 先問與長上如何情景，能否尊敬之，如代天主位者，禮貌無

欠缺，言語無怨訕否。我爲屬下，品詣能慰悅上司，不加其憂苦否。順命能無奴僕之懼心，而存信愛之德意否。言行毫無欺詐否。規矩全守否。無離奇之行否。次問與人交際，無簡慢侮辱之過否。無傷仁愛否。昆季之間，同心同德否。能存謙下之心，思己在衆人之下否。人得罪於我，能忍耐含容，不與計較否。能汎愛衆人，無偏私之弊否。起居動止，悉能感悅他人，不愧爲修道人否。出入應酬，光陰無虛費否。能心切救靈，乘機誘掖他人，隨時得以聖善之言，涵養其熱心否。又與所屬之人，能寬猛並濟，仁智兼施否。能莊臨慈畜，無傲狎之憾否。且能及時察閱其行爲，勉其遵規守職，身先立表，率其修功進善否。

三、自治 深省首惡之偏，曾否芟割。縱嗜欲，貪安適，及其餘偏情，曾否遏制。三司五官，如何謹守。心情思念，如何隄防。視聽能端肅，語言能

莊重否。隨地隨時，能以克己爲懷否。循守職分，勤敏忠慎否。補贖之工，行之何若。日常公規，守之何如。清晨聞鐘，卽起否。飲食衣履，皆能中節，而適宜否。凡事能措之以時，行之有恒，而秩然有序，不致鹵莽輕脫，朝三暮四否。有過，卽知自謙悔改否。遇順，能知歸恩於主，遇逆，又能果毅堅強否。若爲離俗修道，而發聖願者，自問守之如何。忠信，修之如何。勤恪，末省避靜時所，之善心美意，今皆行之何如。

### 每日省察要式一

謝主 吁，在天天主聖父，我跪爾臺前，因爾子耶穌聖名，及其無限功勞，又因聖神無窮之愛，我感謝爾，賜我內外諸寵。深謝爾賜我前後諸惠。更謝爾賜我本日諸恩。爾爲諸恩德之大原，自當欽崇爾，歸美爾，頌謝爾於無窮。我可愛之耶穌，我亦謝爾無數神恩。爾爲加此



神恩於我，甘願捨身傾血，備嘗無數艱難。特謝爾以爾聖體聖血，厚養我靈，醫治我心。噫，予靈讚美主，及一切在我者稱頌主名。

天主聖神，爾爲聖父及聖子之手指。因爾無比之善，賜我神形諸惠。我今亦頌謝爾無量數之寵恩。

聖母諸天神之后，至愛者諸神，上智者諸神，我願偕爾等感天主之愛，頌天主之恩，榮顯聖三之聖名。天主罷德肋天主費畧云云

求恩 在天聖父，以爾愛子耶穌之名，求遣爾聖神於我靈，賜我今所欲得之三恩。一、能明識我罪過之醜陋，深惡之，而速卽改悛。二、能明識我行事之偏曲，深惡之，而急行整治。三、能明識人世之虛假，深惡之，而刻意遠離。求主聖神之火，爍熱我等冰心，以能貞身服勤主命，并能淨心翕合主旨。

自省 本日所有私省之題，曾否服膺弗失。當躬所戒首惡之偏，曾否精心遏制。吾主願我忠勤之德，曾否謹慎前修。思言行動，有無得罪於主。特於謙遜仁愛之德，有無抱愧於心。諸凡神業，行之何如。果能虔心榮主，切心修成否。

痛悔 在天聖父，爾以無窮之愛，愛我。以無限之賜，賜我。我不但不知還愛於爾，以報爾所賜諸恩。而且怠忽實甚，每多獲罪於爾。噫，負恩若此，我將何以爲人，何以爲心乎。天主因爾大仁慈矜憐我，求爾勿記我罪惡，勿忘爾慈悲。爾愛我甚於父之愛子，非世人意念所能想及。今求爾看耶穌分上，爲爾聖子之功，赦我諸罪，赦我諸過，免我淡漠疎慵諸失。且更賴爾聖佑，堅定我心，寧死不願故犯一微細之罪。至聖者父，我願全心全靈全力，愛爾事爾。我尤願如爾聖子耶穌，時

時事事、承行爾旨、喜悅爾心。

耶穌我真主、我天主、我回顧昔時、細觀今日、所見維何。爾之於我、有無窮仁愛之恩。我之於爾、有許多冒瀆之失。爾曾語修女瑪加利大曰、汝視此心、如何愛人、然我所受於人者、惟辜恩侮辱冷心而已。更可傷者、人心既獻於我、而仍陷於負心之過。噫、斯何人哉、我實是也。何太忍心害理乎。今特趨赴爾聖心中、因爾心爲諸恩之總匯、生活之井泉。呼號爾仁慈、懇求爾憐憫。以爾聖心之血、洗滌我靈。以爾聖心之火、焚爍我心。賜我再不敢故有所犯、致憂爾無窮愛我之聖心、致傷爾無窮可愛之聖心。

天主聖神、爾爲聖父及聖子所發之愛。我蒙爾寵恩之渥、得與聖父聖子聯神妙之親。然我今自問、果會何爲乎。以我不忠寡信、拂爾聖

愛之情者，其罪甚多。惟爾聖愛無窮，每欲增我修德，以成榮主淑人之器。豈知我不能仰副爾聖意，反損聖父之榮，辱聖子之名，更負爾聖神之愛。每念及此，自覺無顏對爾，不禁痛恨刺心。我今虔誠切意，求爾以聖愛之火，消融我罪惡之滓，再不致予靈少染不潔，以污辱爾宮。更求爾賜我能契耶穌聖心，能得耶穌生命，能效耶穌德表，諸事皆能愈顯聖三之光榮。并求爾，因無玷聖母之功德，聖若瑟及諸聖人聖女之轉禱，允我所求。

定志 至聖聖三，我今堅心定志，不敢再有獲罪於爾。我願殫心竭力，善行內外諸工，以愈顯爾聖名之榮。我且復獻我善志，願留意於私省之題，恒務時遠於惡，日進於德。以副爾生存救贖，加恩賜寵，無始無終無限之愛情。

每日省察要式二

赫赫威嚴、審判生死者主。在我目前、迨其未行判我、我將自行鞠訊。吾天主、吾恩主、我跪爾臺前、虔恭欽崇爾、讚美爾、顯揚爾。

謝主 主賜我諸恩、我將何酬。予靈讚美主、及一切在我者、稱頌主名。予靈讚美主、勿忘其賜爾諸恩。吾主天主、爾以永遠之愛愛我、早有意加多恩澤於我。且我所望者、因爾無限仁慈、以爾寵恩實效、選我得享爾尊榮。爾昔時自無中造我、爲爾肖像、且以神形內外諸恩賜我。不斷保存我、且不斷保存萬有、措置咸宜、以爲我益。爾託我於天神、令其自始至終、時常護守我。自億兆人中、賜我得爾信德之恩、蒙爾聖神之愛、與爾永福之產。脫我於魔役之醜惡、得爲爾親友之恩榮。有多生命之危、爾安全我。有多陷罪之機、爾救脫我。又於無

數人中。賜我以聖召之恩。拔我出於塵俗之外。更賜我格外神恩。能以持守至今。爾爲我而永留聖體聖事於人間。爲爾記念。爲爾遺囑。爲我祭獻。爲我伴侶。爲我飲食。爲我善終之資。爲我身後真福之質。爾無窮愛我。三十三年爲我劬勞。未又捨身傾血。而爲贖我靈魂之價值。爾心愛我若是之甚。浩浩乎其聖恩之總滙。淵淵乎其仁愛之泉源。爾加無數奇恩異寵於真福童貞聖母。又賜爲我主保。爲我慈母。聖教會及普世信人。自其手內。多得無數之恩。於此記憶本日之恩。吁。至聖聖三。爲爾諸恩。我深心感謝爾。卽將耶穌聖心奉獻爾。庶其代我報謝。補我力所不能。

求恩 吾天主。求爾諸恩之上。再加一恩。懇啟我瞽。求賜我明識。光照我暗冥。竦動我心靈。賜我能自知我過。深心痛悔。盡力改悛。伏求

聖神降臨 云

自省 午時省察之目。上次省察，有何怠忽。有過，曾否筆記。解衣就寢，諸事適宜否。默想之題，曾記憶否。聞鐘卽起否。抑延遲疎懶否。床鋪及時整治否。日內諸工，速獻於主否。撇除雜念，專思默想本題否。心志馳騖於無用之事否。拜主能勤謹否。默想能及时卽起，分毫無緩否。能凝神壹志，內外虔恭否。望彌撒熱心否。用早膳不形急遽，不失威儀否。

晚時省察之目。上次省察與記過，能否謹慎行之。午餐晚膳，飯前飯後經，能否各得其宜。倘有念聖書，能留心納聽否。散心時，能善度否。言語有何過失，意志有何偏曲。或坐或立，或行或止，有何不善。往來交際，有何不依本分。念玫瑰經，誦閱聖書，預備默想，及一切神工，能忠

敬熱心否。

全日省察之目 一日之功課、本身之職分、行之如何勤敏、拜聖體、如何虔誠、或在堂殿、或在家庭、端正默靜諸規、如何謹守、時候如何善用、行事前、誠意正心、行事後、反躬自省、行事間、心靈契主、謙遜含忍、仁愛諸德、能無愧怍否。本身首惡之偏、時能抑制否。隨地隨時、不愧爲修德之人否。

痛悔 吁嗟吾靈、爾得主寵恩、而報以罪過。被主仁愛、而還以冷心。爾之良心、果如是乎。爾又獲罪於主、乃無限美善之天主、無窮愛爾之天主。是爾違吾主修成之模範。是爾傷吾主仁愛之聖心。自滅天堂之福、自增煉火之薪、自冒失主聖寵、漸陷大咎之危。恐既自退於德、貽禍心身。又將減主寵錫、累及他人。吁嗟吾靈、愚何如也、悖何如也。



吾主天主，我思念及此，自深痛恨，自覺刺心。痛我得罪爾至尊天主。恨我得罪爾至仁恩主。噫，若我一生永無罪過，永常全心愛爾，如爾於永遠全心愛我。豈不宜哉？豈不幸哉？奈何怠忽因循，而竟失此至宜，失此大幸。噫，能不痛哉？今者惟有呼號爾仁慈，懇求爾憫憐。主，爾可憐我，爾最慈悲，千萬可憐我。爲爾至聖之心，爲爾永遠愛我之情，洗我神魂清潔。允我懇切祈求，使逆爾之罪人，逃爾之亡羊，爾且呼之轉回。我既趨赴爾前，求爾赦宥，爾必慨然俯聽我禱，鑒我倚望之誠。爲補贖我所犯罪諸過，卽以爾無窮聖血之寶，亦以聖母莫大之功，且以諸聖人聖女一切勳勞，奉獻於爾。卽求爾赦我罪，加我神力神勇。賜我時遵爾旨，時進於修，再不負爾至聖之心。

定志 自念我身神脆弱，力量虛微。若主不爲扶持，雖有善願，終屬空

虛。切望恩保主母至聖瑪利亞，常爲我劣弱之固城。賜我常與聖母所愛之衆，常爲耶穌聖心所愛之徒。凡我所作所爲，所思所想，所念所慮，所談所論，由爾請求，藉爾神功，皆合爾子及爾聖旨。天主天神護守我者，亦佑啟我而保全我者，我既有志立功補過，求爾爲我導引，爲我師保，助我再不復有所犯。且於修德之途，時能踴勉步趨。庶幾克成我素志，不負爾厚望。末後可思所犯過惡之機緣，及其改修之方法，而預爲隄防。

